

**NATIONAL ASSEMBLY OF
SEYCHELLES**

Thursday 14th December 2023

The Assembly met at 0903am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Nou zofisyé Lasanble e osi nou piblik ki pe swiv nou byenveni pou nou travay pou sa lazournen ozordi. Nou a komans avek Prezantasyon Papye. Madanm Clerk, ou a fer bann prezantasyon.

MADAM CLERK

Mersi Mr Speaker. Bonzour Mr Speaker. Bonzour tou bann Manm ek tou bann *staff* Lasanble, tou dimoun ki a lekout. Bann papye ki pe ganny prezante *ce matin* i;

S.I. 99 of 2023 - Export-Import Bank of India (Dollar Credit Line Agreement) Debt Order, 2023.

S.I. 100 of 2023 - Domestic Violence Act (Commencement)

Notice, 2023

S.I. 101 of 2023 - Construction Professionals Council Act, 2022 (Commencement) Notice, 2023.

Seychelles Commercial Bank – Annual Report of 2022.

Seychelles Petroleum Company Limited – Annual Report of 2022

Financial Services Authority – Annual Report 2022.

Islands Development Company Limited – Annual Report 2022-2023

Public Enterprise Monitoring Commission – Public Enterprises Annual Performance Report – 2021

Report of the Auditor General – 2022.

Mersi Mr Speaker.

MR SPEAKER

Mersi Madanm Clerk. Bon, avan nou pran bann lezot biznes ki lo *Order Paper* ozordi. Onorab *Leader* Lopozisyon in demann mwan pou fer en *matter of privilege*. E mon a donn li laparol.

HON SEBASTIEN PILLAY

Mersi Mr Speaker. Bonzour Mr Speaker. E bonzour tou koleg Onorab. E bonzour tou dimoun ki pe swiv nou. Mr Speaker, mon *matter of privilege* i an relasyon avek lartik 41 (3) nou Konstitisyon. E lartik 41(2) nou Konstitisyon.

Mr Speaker, nou'n resevwar atraver *Gazette* en Proklamasyon ki Prezidan in apel son deklarasyon *State of Emergency* dan pei. E ki ler nou regarde i pa parey sa dokiman ki'n ganny pibliye lo *website State House*. I antyerman diferan.

Me avan mon komanse Mr Speaker, mon ti a kontan *submit* devan ou; si eski provizyon Lartik 41(3) in ganny swiv? E si eski ou'n ganny dan 72 erdtan sa proklanmasyon sinyen parey i leka e parey i ganny site anba Konstitisyon? Eski ou'n ganny sa Proklamasyon Mr Speaker?

MR SPEAKER

Non, mon pa'n gannyen sa Proklamasyon.

HON SEBASTIEN PILLAY

Mersi Mr Speaker. Lefe ki ou pa'n ganny sa Proklamasyon, i montre en kler vyolasyon lartik 41(3) nou Konstitisyon. Akoz i dir ki poudir sa Proklamasyon i

bezwen ganny anvoye kot *Speaker* dan 72 erdtan.

Menm ler kot i pa pratik pou fer li, sa Proklamasyon i kapab ganny anvoye kot ou. Me 72erdtan i bezwen ganny respekte. Akoz si ti annan ankor en lot size *emergency* ki ti'n leve, Lasanble ti pou bezwen syeze menm si i ti en Dimans oubyen en lot zour.

Me sa ki nou pa dakor avek Mr Speaker, se ki lefe ki sa Proklamasyon in ganny fer e lefe ki ou pa'n ganny, ou pa'n ganny sa Proklamasyon sinyen dan 72 erdtan, i montre ki Legzekitiv pa pe respe Lasanble Nasyonal.

Mon'n resevwar en dokiman legal ki ou'n soumet avek mwan, e ki mon'n osi soumet avek lezot Avoka. Apart lezot, mon'n soumet sa dokiman devan Onorab Basil Hoareau ki en ansyen Manm Lasanble.

E Onorab Hoareau i konfirm avek mwan ki poudir lafason ki sa bann keksoz pe prosede i pa anliny avek Konstitisyon. E pa respekte rol sipervizyon ki Lasanble Nasyonal i annan lo Legzekitiv.

Mr Speaker, dan sa Proklamasyon ki devan mwan i mansyonn Zil Mahe. I dir ki,

"Whereas during early morning of Thursday 7th

December 2023, a disaster occurred at Providence, Mahe Seychelles, where there was an explosion in an explosive store, resulting in serious loss and damaged to property. Injury to persons and disaster risk or threat to safety or persons and property in areas around Providence, Mahe Seychelles.

And the serious disruption in the functioning of the community on the island of Mahe, Seychelles, Prezidan pe deklar en State of Emergency, e i donn ler ki son State of emergency pou pran lefe. I dir pou dir from 6am on Thursday 7th December to 6pm on Thursday 7th December, ok?

E i dir pou dir sa Proklamasyon pou ganny pibliye lo website State House. Ozordi i fer egzaktaman 7 zour depi ki sa Proklamasyon in ganny pibliye lo website State House. Alors sa Proklamasyon ti devret pe ganny diskite dan Lasanble Nasyonal ozordi, apre sa 7 zour.

Me ki Lepep Seselwa i bezwen konnen, lo website State House Proklamasyon pou State of Emergency i diferan. Annefe swivan sa leksplozyon, sa ki lo website State House i dir,

“Following an explosion at the CCCL explosive store that

has caused massive damage to the Providence Industrial Area and the surrounding areas and major disruption caused by flooding due to heavy rains, the President has declared a State of Emergency for today the 7th of December.”

E sa i vedir ki i ti en State of Emergency lo Sesel antye. E ler Komisyoner Lapolis ti vin dan Bonzour Sesel e eksplike ki i ti pe koz lo sa State of Emergency, i ti enform Lepep Seselwa ki sa State of Emergency ti aplik pou Praslin, La Digue e tou teritwar Sesel. Prezidan ti menm dan son press conference koriz Komisyoner, e dir pou dir li i pa okouran si zot in met Praslin ek La Digue ladan i ava fer Jonathan gete.

Mr Speaker, all these states of events i montre ki poudir i annan en labi lo nou Konstitisyon. Menm si Prezidan pou deklar en State of Emergency 1erdtan, sa dokiman i bezwen vin devan Lasanble Nasyonal, akoz se nou ki annan rol sipervizyon lo Gouvernman. Sa largiman ki Konstitisyon i bezwen ganny li as a whole, mon konpran. Me selman Lartik Konstitisyon i kler.

Akoz menm ler pou lev en State of Emergency, Prezidan ti devret enform Lasanble

Nasyonal. Savedir ou ti'n devret ganny enformen.

I malere Mr Speaker, ki sa kalite pratik pe arive. Akoz pou mwan i montre klerman ki i napa respe pou Lasanble Nasyonal. Me sa ki pli serye pou mwan, se ki lartik 41 (8) i dir ek nou koumsa "ki poudir anba Konstitisyon Prezidan i devret met sa *State of Emergency* dan en landrwa kot tou dimoun i kapab war.

E landrwa kot zot in mete dan sa *Gazette* ki sa in ganny pibliye, se lo *website State House*. Mr Speaker, mon bezwen *submit* ankor devan ou ki *given* sa bann *circumstances*, eski *website State House* i landrwa kot tou dimoun pou al get sa *State of Emergency*?

Mon sizere Mr Speaker, ki ou met sa item lo *Order Paper* ozordi, anliny avek nou Konstitisyon e swiv lespri e lentansyon nou Konstitisyon, pou asire ki tou dimoun i ganny drwa konpran rol sipervizyon ki Lasanble Nasyonal i annan lo Legzekitiv.

Lefe ki Prezidan e Legzekitiv pa'n anvoy sa Proklamasyon dan 72erdtan kot ou Mr Speaker, i montre ki ou'n ganny *sidelined* e sa i pa akseptab. I pa akseptab pou ou, e i pa akseptab pou nou Manm Lasanble.

Nou pa kapab zis dir ki poudir lefe ki *State of Emergency* i *no longer subsist*, Lasanble Nasyonal pa devret pe regard bann aksyon oubyen bann lafason ki sa *State of Emergency* in ganny deklare.

Mr Speaker, alors mon pe demann ou privez Lasanble in ganny vyole, par lefe ki nou devret pe konsider sa *State of Emergency* an relasyon ek sa Proklamasyon ozordi.

E mon ti a kontan met devan ou ki anliny avek sa ki nou met imedyatman lo *Order Paper* konsiderasyon sa *State of Emergency* ki Prezidan ti fer le 7 Desanm. Mersi Mr Speaker.

MR SPEAKER

Mersi Onorab. Bon, *Leader* Lopozisyon ti apros mwan Mardi le 12, 2023. E i ti met a mon latansyon ki ti annan en *State of Emergency*. E i ti eksprim lartik Konstitisyon ki sa *State of Emergency* ti'n devret ganny...

Sa deklarasyon *State of Emergency* ti'n devret ganny mete avek Lasanble. A se moman *Leader* Lopozisyon pa ti demann mwan pou okenn aksyon, oubyen okenn leksplikasyon. Me selman i ti met sa dan mon latansyon. E sa ti dan prezans Madanm Clerk Lasanble.

Mon ti pran sa *statement* ki Onorab *Leader* Lopozisyon ti fer, pou mwan egzaminen kisisa ki'n arive. E ki lefe i devret annan.

Mon'n konsilte *Legal counsel National Assembly* Mrs Iman Toulon, e osi *Attorney General* Frank Ally lo sa size lo lenterpretasyon lartik 41 dan Konstitisyon. Mrs Toulon, nou *Legal Counsel* ti donn mwan en *briefing* verbal kot i ti egzamin bann lartik, e fer serten analiz. E apre i ti soumet avek mwan en *briefing* an ekirir.

Attorney General ti diskit avek mwan, me i pa'n donn mwan okenn dokiman an ekirir lo son lenterpretasyon. Me selman tou lede ti plito annakor avek ki mannyer pou enterpret lartik 41 sa Konstitisyon. E mon pe kont lo zot, mon pe servi zot lopinyon pou fer mon desizyon lo sa size.

Legal counsel ek *Attorney General* tou lede ti met bokou lanfaz ki lartik parey nenport Lartik Konstitisyon e parey nenport Lalwa, i devret ganny regarde an antye. E swiv bann sekans provizyon ki annan dan en nenport lartik oubyen Lalwa.

E ansanm avek sa, zot ti dir lenterpretasyon i bezwen regard lentansyon en provizyon ki'n ganny mete dan

Konstitisyon oubyen dan en Lalwa.

Setadir ki bann *Framers of Constitution*, bann loter Konstitisyon ti anvi fer avek en tel lartik. Pou repas lo fe briyevman, Proklamasyon ti ganny fer le 7 Desanm. Lartik 41 (3) i demande ki Proklamasyon i devret ganny soumet avek Lasanble avan 72erdtan.

Lartik 41(2) i dir aköz i lye sa soumisyon Proklamasyon *State of Emergency*, pou permet Lasanble pou konsidere si en *State of Emergency* ki'n ganny deklare i devret ganny aprouve pou li ganny prolouze par lao 7 zour.

Savedir i annan 7 zour kot en Proklamasyon *State of Emergency* i pa anba ziridiksyon Lasanble. E osi lartik 41(5) i donn Lasanble lotorite pou li *revoke*, pou li retir a nenport moman apre ki in aprouve pou retir son laprouvasyon pou sa *State of Emergency*.

I kler ki letan ou get Lartik 41 an antye, sa ki sa lartik i pe vize, se en deklarasyon ki endefini oubyen ki prolouze. E sirtou prolouze par lao 7 zour.

Pou leka an kestyon, sa deklarasyon ti aplik pou 12erdtan. E i ti terminen 6er aswar le 7 Desanm 2023. Sa ti

avan e lontan avan sa 72erdtan dan ki Prezidan i ganny demande, pou li soumet son Proklamasyon avek Lasanble Nasyonal.

E dan leka si Lasanble Nasyonal ti pou konsider sa Proklamasyon avan 72erdtan, i ti pou napa okenn aksyon pou li pran. Akoz sa *State of Emergency* ti'n fini terminen.

E mon oule dir - mon oule dir sa soumisyon pou Lasanble dan lartik 41 i ganny fer zis pou 2 rezon; Enn pou Lasanble aprouve pou li ganny *extend* par lao 7 zour. Oubyen pou li *revoke* pli tar si in aprouve.

Napa Lartik Konstitisyon ki dir ki Lasanble pou deliber dan lezot fason lo en Proklamasyon. Son responsabilite i pou fer sa 2 desizyon. *Ok?*

Etan leka, ki ti napa *State of Emergency* ki ti anfers, mon konsidere ki soumet sa Proklamasyon ek Lasanble apre ki i ti'n terminen, ti pou napa okenn lefe valid. E pou sa rezon i pa tous privez Lasanble.

Mon konpran i kapab ganny argimante, ki Proklamasyon parey Onorab Pillay in dir ti'n devret ganny soumet avek Lasanble dan nenport a. Me sa i lenterpretasyon ki pa pran kont

lentansyon sa lartik dan Konstitisyon.

E mon ensiste ki parey Ziz i dir nou souvan Ankour se pa neseserman mo Lalwa ki fini konsiderasyon. Se osi lentansyon Lalwa.

Alor konsiderasyon, mon santi konsiderasyon Lasanble Nasyonal i ti pou'n aplike zis koman en tyek lo desizyon Prezidan, pou fer sir ki son pouvwar pou deklar en *State of Emergency* i pa ganny servi malapropo, oubyen abize servi son bon rezon. E sa konsiderasyon Lasanble i devre an partikilye lo proteksyon drwa sitwayen.

Alor, se sa akoz mon mazine poudir sa nesesite ki soumet avan 72erdtan, i neseser pou deside si Lasanble i devre pran sa 2 desizyon ki mon'n eksplike. Vi ki sa pa ti leka, mon pa war okenn rezon pou mwan kontinyen avek sa size pli lwen ki i ete. E mon pa war nesesite pou nou met li lo *Order Paper* Lasanble.

Lo serten lezot pwen - lo serten lezot pwen ki Onorab Pillay in leve, mon'n realize ki ti annan serten *discrepancy* bezwen servi en mo Angle, dan diferan versyon. Me sa i prensipalman lo serten detay.

Mon pa dakor avek Onorab Pillay letan i dir, sa 2

versyon ti antyerman diferan. Non. I annan serten detay ki ti diferan. Lo size piblikasyon ki Konstitisyon i mansyonnen i devret ganny pibliye dan *Gazette*, wi.

Me selman mon krwar osi ler Konstitisyon ti ganny ekrire i pa ti pe pran kont lezot posibilite piblikasyon. Ki ozordi avek teknoloji in evolye. E mon satisfè ki dir piblikasyon lo *website State House* i en landrwa kot tou dimoun i kapab war, ganny akse avek e sirtou letan in ganny met an piblik dan medya nasyonal.

Lo size si sa Proklamasyon ki aplik pou Mahe oubyen pou Sesel an antye, mon akseptè mwan osi mon'n note sa diferans lo la mon oule zis dir mon krwar Komisyoner Lapolis, pa ti egzakteman korek byen enformen letan i ti fer sa deklarasyon lo medya, lo televizyon.

E mon konpran akòz ti'n fek arive, e in ganny apele lo medya pou li eksplik aktivite lapolis. E in mansyonnen sa ki apre in ganny korize. La i la mon desizyon lo sa size.

Bon, mon pa pou pran en deba enterminab lo la. Me selman mon ava les bann Manm ki annan en komantr spesifik pou fer an relasyon avek mon desizyon pou fer li. E

mon demann zot pou reste bref, *e to the point*. Onorab Pillay, ou kapab annan en komantr.

HON SEBASTIEN PILLAY

Mersi Mr Speaker. Mr Speaker, ozordi nou pe fer nou travay Lasanble, ou'n fer ou *statement* e ou'n donn ou *ruling*. Mon pa dakor ek ou *ruling*, me mon pa kapab kestyonnen ou *ruling*. Alors mwan mon *still* santi ki poudir i nou rol pou met en *supervisory check* lo sa ki Gouvernman i fer.

Si i ti'n deklar en *State of Emergency* par egzanp dan en lot sikonstans, menm pou 2erdtan, kot larme i al lo semen i bat dimoun and *then* i fini... mon pa pe dir sa pou Gouvernman mwan.

MR SPEAKER

Sa i en lot sikonstans. Mon *ruling*...

HON SEBASTIEN PILLAY

Mon pe montre, mon pe montre...

(Interruptions)

MR SPEAKER

Mon *ruling*... *Order!*

HON SEBASTIEN PILLAY

Mon pe montre Mr Speaker ki mannyer...

MR SPEAKER

Mon *ruling* i pa sa sirkonstans.
Let's stick to that.

HON SEBASTIEN PILLAY

Yes. Mon pe montre ki mannyer i rol Lasanble pou annan en *droit de regard*. Ou'n dir ou menm ki Komisyoner ti pa ti korek lo sa ki i ti dir, drwa mouvman bann zabitan lo Praslin, La Digue ti ganny restrikte *for whatever reason*. Me sa i nou rol koman Lasanble pou regarde ki'n arive.

Alors Mr Speaker, mwan mon annan zis sa pou dir ou. Si sa i ou *final word*, then mwan mon averti ou poudir mon pe al met en *case* dan Lakour Konstitisyonnèl an relasyon ek vyolasyon sa Konstitisyon ki nou'n *swear* pou nou proteze! Mersi Mr Speaker.

MR SPEAKER

Mersi Onorab. Onorab Cosgrow.

HON WALLACE COSGROW

Mersi Mr Speaker. Bonzour Mr Speaker. Mr Speaker, parey Onorab *Leader* Lopozisyon in dir ou, ou *ruling* ou'n donn ou *ruling* baze lo ou lenterpretasyon. Me mon ti anvi zis met devan ou malgre nou'n

dir ki Lartik Konstitisyon i bezwen ganny lir *as a whole*.

Mon anvi met devan ou lartik 3 Konstitisyon, ki dir ki parey Onorab *LOTO* in dir poudir ki *72 hours* apre sa piblikasyon, sa Proklamasyon Speaker Lasanble Nasyonal i sipoze ganny *the facts and circumstances leading to that declaration*. E apre 7 zour sa piblikasyon, sa piblikasyon i bezwen ganny met devan Lasanble pou *consider the facts and circumstances* ki'n lead to sa.

I pa vedir parey ou'n dir zis pou retire ouswa pou *extend* sa *State of Emergency*. Me pou konsider *the fact and circumstances leading to* sa *State of Emergency*.

So, mwan mon krwar nou ti devret ozordi annan sa lo *Order Paper* e nou konsider sa bann *facts*. Parey *Leader* Lopozisyon in dir, si ti annan serten keksoz ki'n ganny fer mal pandan sa bann letan, nou annan drwa regar lo Gouvernman pou nou dir zot ki poudir sa zafer ti ganny fer mal.

E se sa ki *Leader* Lopozisyon pe dir, se sa ki nou pe demande ki sa i vin lo *Order Paper* pou nou kapab diskit lo bann *facts and circumstances leading to the proclamation of State of Emergency*, ki dayer

mon krwar in mal ganny kordinen. Akoz ou pa kapab Prezidan i dir enn, Komisyoner Lapolis i dir en lot keksoz, *Attorney Zeneral* is *nowhere to be found* dan sa bann zafer. Mersi Mr Speaker.

MR SPEAKER

Mersi. Lo pwen ki ou'n fer ki relye avek sa ka ki *the facts and circumstances* i devret ganny soumet avek Lasanble. Sa lartik i fer kler ki i ganny soumet avek Lasanble, pou Lasanble aprouve si sa Proklamasyon i devret *extend* par lao 7 zour se tou. Setou ki sa lartik i aplike. Onorab Loze?

HON JOHAN LOZE

Mersi Mr Speaker. Mr Speaker, mwan mon sagrinen ki ozordi nou ki annan en *supervisory role* lo aksyon Legzekitiv, nou pe *suborn* nou lekor e *basically surrender* nou rol sipervizyon ki nou, nou annan.

Lo *website State House* ti annan en *poster*. Parey ou'n dir avek teknolozi, ti kapab tir en portre Proklamasyon sinyen par Prezidan. E met lo *website State House*, e *still* met zot *poster* si zot ti anvi.

Ti annan en *poster* Mr Speaker, ti napa Proklamasyon pibliye okenn par sa zour. *Fine*, in ganny fase dan sa fason. In

annan *discrepancy* dan sa ki'n ganny gazete avek sa ki ti lo *website State House*.

Me selman Mr Speaker, pou dimoun deor pa akiz nou konmkwa nou form parti en *cover up*. Annou *at least table* sa size e nou annan en konversasyon.

En konversasyon i pa bezwen al en fason ouswa en lot. Be nou bezwen diskite akoz i annan dimoun ki'n ganny afekte. In annan dimoun ki son drwa mouvman in ganny siprimen lo Praslin ek La Digue posibleman ilegalman, posibleman ilegalman. Be annou fer sa konversasyon Mr Speaker. Annou pa form parti en *cover up*. Mersi.

MR SPEAKER

Onorab Georges.

HON BERNARD GEORGES

Mersi Mr Speaker. Mr Speaker, mon oule lev en *matter of privilege* devan Lasanble. Mon santi ki mon privez koman en Manm pe ganny abize par Pillay, Cosgrow, ek Loze ankor.

(APPLAUSE)

HON BERNARD GEORGES

Mwan mon annan en Mosyon, mwan mon annan en Mosyon lo *Order Paper*. E la in ariv 9er

edmi, e en *matter of privilege* in ganny *raise* byen. Ou, ou'n donn en *ruling* byen *that's where the matter should have stop*. Mon pa war aköz Onorab Cosgrow ek Onorab Loze in bezwen vin entervenir.

E menm Onorab Pillay entervenir, konmsi zot pe fer rapel kont ou desizyon. Ou'n donn ou desizyon Mr Speaker, nou privez koman en *Caucus* ki anvi bouz avek travay Lasanble pe ganny abize. Alor mon pe demann ou silvouple, *let's stop* sa bann demagozi *move on* avek travay Lasanble. Mersi.

(APPLAUSE)

MR SPEAKER

Mersi. Nou'n terminen avek sa size. Mon'n permet sa bann komanter, pou fer sir ki tou *issue* i ganny met klerman. E espesyalman, pou ki napa lakizasyon ki annan *cover up*. Serten moman ou bezwen *extend* privez ki ou donn bann Manm. E mon'n donn li pou fer sir ki napa okenn komanter ki'n ganny neglize. Mersi.

Nou aprezan prosede avek biznes lo *Order Paper*, e sa se Mosyon. E mon ava apel Onorab *Leader* Biznes Gouvernman pou prezant son Mosyon.

HON BERNARD GEORGES

Mersi Mr Speaker. Bonzour tou bann Manm Onorab, Clerk, Deputy Clerk, sekretarya Lasanble e tou bann dimoun ki pe swiv nou. Mr Speaker, devan nou, nou annan en Mosyon ratifikasyon. E sa Mosyon i lir *comme suivant*.

In accordance with article 64(4) of the Constitution, this Assembly resolves to ratify the Partnership Agreement between the European Union and its Member States of one part, and the Members of the Organization of the African, Caribbean and Pacific States, of the other part.

Mr Speaker, mon pou aret la e mon pou demann en dimoun segonn sa Mosyon. E apre avek ou permisyon, mon ava annan 2 keksoz pou dir. Mersi.

MR SPEAKER

Mersi. Nou a ganny segonnman. Onorab Andre.

HON CLIFFORD ANDRE

Mersi Mr Speaker. Bonzour tou Manm Onorab, tou dimoun ki a lekout. Mr Speaker, mon ti a kontan segonn sa Mosyon lo mon kapasite koman nou reprezantan pou *ACP EU* pou Lasanble Nasyonal Sesel. Mersi.

MR SPEAKER

Mersi. Mosyon in ganny segonde. Nou a kapab pran entervansyon bann Manm. Nou a komans avek Mover Mosyon Onorab Georges.

HON BERNARD GEORGES

Mersi Mr Speaker. Mr Speaker, mon ti dir i annan 2 keksoz pou souleve. Premye keksoz se ki mon pou demann ou permisyon pou mwan pa entervenir a sa moman, me pou rezerv mon drwa pou entervenir en pe pli tar lo sa Mosyon.

Me a sa moman...

MR SPEAKER

Order silvouple. Onorab si ou pa entervenir la. Zis dir mwan *matter of procedure* ki ou annan.

HON BERNARD GEORGES

Wi, mon ti pe al lo la. Mon ti pe al lo la. *Now, that the question has been proposed* par ou devan sa Lasanble, anba *Order 44* nou *Standing Orders* mon oule *move* pou en *simple amendments*. E mon pe demann ou permisyon, akoz mon bezwen fer sa koman en *simple amendments to the Motion*.

Mon oule *move* Mr Speaker, ki sa bann, sa 5 mo

swivan i ganny azoute a lafen sa Mosyon. Kot i fini la, kot "*the other part*", mon pe *move* pou en *amendment to read "signed on 15th November 2023"*. Zis pou nou fer sir ki nou sa Mosyon nou pe defini li egzaktman ki se sa enn sa Mosyon - eskiz mwan, sa *Partnership Agreement* se sa enn ki'n ganny sinyen le 15 Novanm 2023. *I move in term of my Motion to amend* Mr Speaker.

MR SPEAKER

Wi Onorab, mon aksepte sa amannman. Eski sa i devret ganny segonde e vote? Onorab Andre, ou pe segonde?

HON CLIFFORD ANDRE

Wi Mr Speaker, mon segonn sa lamannman ki pe ganny propoze. Mersi.

MR SPEAKER

Ok, wi nou a debat lo la. Onorab Pillay, ou annan en pwen?

HON SEBASTIEN PILLAY

Wi, wi Mr Speaker. Pa pran sa mal, me mon bezwen dir annou sanz plas kekfw a ou ava vin dan plas Onorab Georges, e li i ava pran plas Speaker. Akoz se li ki decide...

MR SPEAKER

Onorab! Onorab! Ou komantr i mal apropo. Speaker, Onorab Georges in met en amannman. I diskresyon Speaker pou aksepte oubyen non. E mon'n aksepte ou napa naryen pou dir lo la. Mersi. Mersi.

HON SEBASTIEN PILLAY

Mr Speaker, mon pa ankor koze Mr Speaker.

MR SPEAKER

Mersi Onorab. Dan sa ka, ou'n mal komanse. ou'n mal komanse.

(comments off-mic)

MR SPEAKER

Onorab! Bann Onorab, mon pa pou permet Ki sa Lasanble i al an dezord ozordi.

HON SEBASTIEN PILLAY

Ok, Mr Speaker.

MR SPEAKER

Savedir bann ki pe fer komantr, mon pe *warn* zot poudir bann komantr ki mank respe pou Speaker, mon pou pran aksyon avek. E mon pou demann Manm kit lasal. Si i kler...

HON SEBASTIEN PILLAY

Ok, Mr Speaker.

MR SPEAKER

Mersi.

HON SEBASTIEN PILLAY

Ok Mr Speaker. Mersi bokou. Mon ava *apologies* ek ou pou sa komantr ki mon'n fer. Me selman pou mwan mon komans, mon komans doute konmsi ki ou pe fer....

MR SPEAKER

Eskiz mwan. Ou pe adres lo Mosyon la?

HON SEBASTIEN PILLAY

Mon pe adres lo lamannman ki'n propoze.

MR SPEAKER

Ou pe adres lo lamannman ki'n ganny propoze? Wi.

HON SEBASTIEN PILLAY

Apré mon a fer mon deba lo Mosyon. *Standing Order* i donn mwan sa privez pou fer sa. Mon en Manm Lasanble.

MR SPEAKER

Wi, ou kapab adres lo Mosyon ki'n ganny propoze.

HON SEBASTIEN PILLAY

Mr Speaker, sa lagreman in vin devan *Assembly Business Committee*. E nou, mwan ek Onorab Lemiel nou ti fer kler nou pozisyon ki ler sa lagreman

ti vini nou pa ti ankor ganny okenn lenformasyon. Me sa nou ava pran li an sa ki konsern sa lagreman li menm.

La ozordi, nou ganny dir pe propoz en *simple amendment* ki pe entrodwir en dat dan sa lagreman, le 15 Novanm. Mr Speaker, *be this is not a simple amendment. This is not a simple amendment.* I ti devret prezant son lamannman ki i annan pou fer.

I don't see ki mannyer Mr Speaker, la mon bezwen demann ou ki mannyer mwan, mon ti anmenn en Mosyon ki napa ti bezwen demann ou pou pas an relasyon avek ek Komisyon lanket, ou pa les mwan. Onorab Georges son Mosyon napa 10 zour i les pase. I vin ek lamannman nou les pase.

Me mon pa krwar sa lamannman i devret pe ganny admet koman en *simple amendment*. I ti devret donn *notice of amendment* ki le fer anba *Standing Order*. Ekout sa ki dir ou vot kont, me Onorab Georges i vin pli pir ki en diktater Mr Speaker dan Lasanble.

MR SPEAKER

Mon pa pe fer komanter lo Onorab Georges....

HON SEBASTIEN PILLAY

Alors, mon pe enplor ou Mr Speaker pou aplik *Standing Order*. Lamannman en Mosyon i ganny fer dan en fason. Nou tou dan Lasanble nou ti'n devret ganny sans war sa lamannman ki i pe propoze.

MR SPEAKER

Mon krwar sa lamannman i en senp lamannman. Akoz i pa sanz *the substance of the Motion*. Dan okenn fason i zis azout en detay ki *link* sa dat avek sa lagreman, e se tou. I en senp *amendment*. Manm ki annan lot komanter dan deba lo sa lamannman? Bon, si napa Manm ava vot lo sa amannman. Manm ki an faver leve lanmen silvouple?

Mersi. Manm ki kont? Mersi. Lo Mosyon pou *amend the Motion laid on the Order Paper by adding signed on 15th November 2023*. 22 Manm in vot pour, 0 kont, 9 in *abstain*. Sa Mosyon pou *amend* in ganny aprouve. Nou a kapab prosede avek Mosyon.

Manm ki oule entervenir lo sa Mosyon silvouple? Bon, byen Onorab Georges ou'n lev ou lanmen la ou'n pare pou *intervene* ou lentervansyon lo sa Mosyon?

HON BERNARD GEORGES

Yes, Mr Speaker. Parey mon ti'n dir, mon ti anvi *move* sa *amendment* avan, avan mon retourn lo mon lentervansyon.

MR SPEAKER

Koman *mover* Mosyon, mon a donn ou laparol premye.

HON BERNARD GEORGES

Mersi. Mersi Mr Speaker. Mr Speaker, premyerman mon ti a kontan lo lapar Gouvernman *apologies* avek sa Lasanble pou lefe ki sa Mosyon i vin la a sa moman. E apre ki nou'n travay lo Bidze. Parey Manm i ava vwar, swivan sa lamannman oubyen menm si avan sa lamannman ler zot in lir sa Mosyon.

Pardon, sa *Partnership Agreement* zot ti ava'n vwar ki Gouvernman atraver Minis Zafer Etranzer in sir sa *Partnership Agreement* le 15 Novanm 2023. Setadir mwens ki 1 mwan pase. Annefe en mwan demen. E zot ava'n osi vwar ki sa *agreement* i pou annan en lefe lo nou pei apartir le 01 Zanvyé 2024.

Alor nou'n, nou'n bezwen koman en Gouvernman anmenn sa Mosyon devan Lasanble Nasyonal pou ratifikasyon, la a sa moman ler deba lo Bidze avek bann *Financial Bills* in fini. E avan 01

Zanvyé 2024, se pou sa rezon ki mon'n demann bomaten mon'n *apologies* pou sa pti peryod letan ki'n annan.

Me nou en Lasanble ki en Lasanble ki responsab e ki performan. E mon sir ki bann Manm ava aksepte sa Mosyon ratifikasyon ozordi dan lespri e pou bann rezon ki in ganny anmennen. Mr Speaker, in annan depi lontan, lontan menm mon rapel ler mon ti ankor en etidyan Langleter dan bann lannen '70.

E nou pe koz en bann lannen pase. Mon rapel ki Anbasader Calixte D'Offay ki a sa lepok, li osi i ti en etidyan en pti pe pli aze ki mwan. E mwan nou'n ti'n ganny demande pou nou al *Brussel* pou al attend en konferans ant sa ki ti apel a sa lepok *ACP*. Bann gro *ACP - African, Caribbean and Pacific States*, avek Linyon Eropeen pou met an plas en mekanizm korperasyon ant *EU* avek bann Leta Afriken ki ariv *Caribbean* ek Pasifik ki ti'n bann ansyen koloni.

Zeneralman okenn bann pei ki ti form parti a sa moman ti *European Economic Community EEC*, e ki ozordi i *the European Union*. Alor i annan depi en kantite letan dan nou listwar, en partenarya ki'n egziste ant Lerop avek bann pei

Lafrik, Karaib e Pasifik pou lesanz komers.

Akoz, prensipalman se Linyon Eropéen i en blok komersyal. E sa in anmenn en kantite, en kantite benefis pou bokou pei. Nou pa bezwen al pli lwen ki nou vwazen Moris *next door*, ki ti benefisyé anba en tarif preferansyel pou li eksport disik avek Linyon Eropéen.

Bokou pei Karaib osi ki prodikter disik *Barbados, Jamaica, Bahamas, up to a point*, bann zil *ex koloni Franse, Martinik, Guadeloupe, Sainte Lucie*. Tousala ti benefisyé anba en tarif preferansyel pou zot eksport zot disik.

E bokou pli tar nou, nou'n antre dan sa zwe atraver nou ton ki ganny lapés isi prensipalman par 2 pei Eropéen, *La France* avek *Espagne* e benefisyé atraver sa bann lesanz.

E Mr Speaker, depi sa bann lannen 1970 in annan en seri *agreement*. E *agreement* prensipal e bann marmay AC taler i ava koz lo la dan pli gran detay - sete *Cotonou Agreement* ki li i pe pran fen la le 31 Desanm, dan zis a pepre 16 zour ou 17 zour. I pe ariv a lafen.

E set anba sa *Cotonou Agreement* ki sa bann lesanz komersyal ti ganny anglobe ant

Linyon Eropéen en kote ek bann pei *ACP* lo lot kote.

Antretan in annan levolisyon osi dan lafason ki bann pei *ACP* i regroup zot, dan non ki zot servi. Me tousala i ava ganny eksplike an pli gran detay taler. Mon pa en eksper dan sa bann keksoz. Mon la zis ozordi pou *move* en Mosyon ratifikasyon.

Sa Mosyon li menm, sa *Partnership Agreement* li menm e sa, sa rezon ki ozordi nou bezwen tay avek.

I pou pran lefe parey mon dir le 1 Zanvyé. Annefe, li, li menm li i pa pou pran lefe le 01 Zanvyé. I pou pran lefe apre en serten kantite ratifikasyon in ariv kot son sekretarya.

Me sa ki pou arive, se ki le 31 Desanm *Cotonou Agreement* pou aret anfors an viger. E anba sa *Partnership Agreement* ki nou pe al ratifye ozordi, oubyen ki mon pe demann Lasanble pou ratifye, i annan en provizyon ki dir, ki i kapab ganny *provisionally brought into operation*.

Setadir i kapab vin dan en fason provizwar, son bann konteni. Son bann benefis anba la, i kapab vin an viger pou sak pei ki ratifye sa *agreement* avan le 01 Zanvyé 2024.

Donk, sa ki nou pe fer se etan donner ki nou pou perdi

nou kouvertir anba *Cotonou Agreement* le 31 Desanm, nou anvi ki apartir le 01 Zanvye nou kapab benefisye dan en fason provizwar parey in ganny aksepte dan sa - parey in ganny propoze dan sa *Partnership Agreement* apartir le 01 Zanvye.

Dan en fason ki nou pa pou perdi okenn benefis ki nou gannyen avek Linyon Eropéen, si nou pa fer li.

Mon annan en *droit de réponse* a lafen sa Mosyon. E mon konnen ki pou annan serten konplent lo laspe neokolonyalist si nou anvi met li koumsa, kot nou, kot nou bezwen swiv kalandriye en lorganizasyon ki bokou pli pwisan ki nou.

Me a sa moman mon pa anvi antre ladan. Mon a rezerv sa pou pli tar. Me mon anvi zis dir Mr Speaker, ki Linyon Eropéen in en partner *fair* avek nou. In en partner kot nou'n ganny bokou benefis. Manm ki ava koze taler, i ava koz pli for lo la. Me mon pe koz sirtou dan domenn lapès, malgre ki bokou dimoun pou dir e mwan mon partaz zot lopinyon ki kekfwa nou ti a kapab fer pli byen atraver partenarya ki nou annan avek Linyon Eropéen dan domenn lapès. I annan toultan annan lespas pou nou agrandi, pou nou fer pli byen.

Malgre tousala, sa ki enportan ozordi se ki nou annan en partenarya e nou pe ganny en kantite benefis. Par egzanz lo bann pti por lapès ki nou'n fer dan bann distrik, bann keksoz koumsa. Alors, i pa en zour ozordi pou nou dir avek Linyon Eropéen, pa ou ki pou dikte avek nou, ki nou, nou pou fer.

Nou pa pou koup nou nennen pou fer plezir nou figir Mr Speaker. Sa ki mon anvi met devan Lasanble ozordi, set en nesesite. Se en nesesite ki devan nou e ki en nesesite ki pou anmenn benefis.

Alor avek sa detrwa mo, an rezervan mon *droit de réponse* a lafen, ler tou dimoun a koze. E anna tandan ki *Chair* ek lezot marmay IAC i pran laparol e i al dan bokou plis detay ki mwan mon'n fer lo sa Trete, lo sa *Partnership Agreement*.

Mon oule *move* Mr Speaker, *in term of my Motions* ki sa *Partnership Agreement* ki ti ganny sinyen le 15 Novanm 2023 *Samoa* ant Linyon Eropéen lo en kote ek bann manm lorganizasyon ACP lo lot kote, i ganny ratifye par sa Lasanble Nasyonal. Mon remersye ou Mr Speaker.

MR SPEAKER

Mersi. Onorab Andre, segonder Mosyon ou ti a kontan adrese la? Ou annan laparol.

HON CLIFFORD ANDRE

Mersi Mr Speaker. Bonzour ankor enn fwa tou Manm Onorab e tou dimoun ki a lekout. Mr Speaker, mon privezye pou dan Lasanble e pe fer en kontribisyon lo sa lagreman.

Akoz mwan ek Onorab William, nou'n si oule letan sa lagreman ti pe ganny konsevwar mwan koman en *head ACP EU delegation* pou Sesel, nou'n ganny sans partisip dan sa negosyasyon.

E osi Depite Madanm Clerk ki ti akonpany nou koman *staff* Lasanble, ou *desk officer* pou *ACP EU*. In temwanny serten nou bann negosyasyon ki nou'n fer. E swit a Onorab William bouze e in ganny ranplase par Onorab Gill. E sa in fer ki nou'n kontinyen met nou bann konsern a en nivo pli o.

Akoz letan nou zwenn koman *JPA Joint Parliamentary Assembly*. Nou tous lo sa, e nou annan bann *rules of procedures* ki al anliny avek konponan parلمانter ki nou pe travay lo la, la.

Mr Speaker, be mon ti a kontan met devan wi parey

Onorab Georges in dir sa in siksed *Cotonou*. *Cotonou* li in siksed lo May. Me i annan en keksoz ki nou bezwen kler. E joman parلمان *ACP* nou'n met sa for letan nou *attend* sa bann foronm. Nou pa zis ale pou nou asize, e nou met sa for.

E nou santi ki polisi Linyon Eropéen set akoz letan i an glob tou pei sorti Karaib, tou pei sorti Pasifik e tou pei sorti Lafrik, Letan en rezolisyon i ganny met devan, *ACP* toultan i gannyen. Toultan i *win*, toultan i pas en rezolisyon ki'n ganny mete.

Oubyen si nou pa an faver rezolisyon ki'n ganny mete par *EU*, nou *voting system* toultan nou *vote it down*, oubyen nou vote sa ki pou nou. Oubyen sa ki pou zot ki annan bokou valer, letan zot diskite nou vot an faver.

So, *ACP had a powerful voting power* letan i asiz kot Linyon Eropéen menm si bokou *funding* si oule i sorti kot Linyon Eropéen. E zot in vwar sa, e zot in rod en fason pou zot sey met fen e fer li par rezon.

Vre i annan spesifisite ki par rezyon, me menm par rezyon Mr Speaker, letan nou pou gete ozordi nou annan *small island developing state* ki enkli Sesel.

Nou'n seye - nou'n seye pou nou *Rwanda* pou nou met en groupman ansanm, kot bann pei ki dan *ACP* me bann ki an referans avek bann pti leta zil, i kapab annan en groupman.

Akoz spesifisite sa bann pei pa parey avek *Grande Terre* letan nou gete bann ki annan problemn depasman dimoun, bann ki annan problemn koudeta ensidswit, lager.

So, nou'n argimante - nou ankor pe argimante ki nou bezwen annan en groupman lo sa staz ki pe reprezant bann pti pei. Annefe Sesel ti ganny demande pou *chair* sa groupman. E ki nou ankor, e *Samoa* ti Vis *Chair*. E nou ankor pe devlop sa groupman.

Akoz mon dir sa Mr Speaker, pou bann Manm ganny en konpran. Mon konpran aköz Legzekitiv ozordi oubyen Gouvernman i bezwen bouze e anmenn ratifikasyon sa Konvansyon devan nou.

Sa set aköz le 01 Zanvyè definitivman si nou pa'n siny sa lagreman, nou pou perdi nou pou *at a loss* dan diferan. Nou pa ratifye; sinyen, ratifye tou lede nou pou *at a loss*.

I annan Mr Speaker, bokou, bokou pei Lafrik ki'n enkli nou bann zanmi *Tanzania* e *Uganda* ki o bor nou ki pa'n

sinyen le 15 Novanm. Kekfwa zot pou revwar e travay lo ki mannyer zot kapab sinyen e ratifye.

E mon mazine nou koman bann pei zanmi, nou kapab sey konsey zot oubyen *advise* zot pou koman en *regional body* nou bezwen zot lo sa *regional body*, pou nou kapab annan plis lafors. Aköz mwens ki, mwens pei ki annan savedir *voting rights is loss*.

So, sa i bann konteks ki mon krwar nou kapab kontinyen. Annefe Mr Speaker, i annan en group *ACP* ki mon ladan, ki nou diskit lo sa bann zafer e bann *non-signatory* in ganny mete dan sa group lo *WhatsApp*.

Mon'n oule komans koumsa Mr Speaker, pou montre ki poudir nou bezwen dir letan nou santi i annan serten keksoz ki nou bezwen travay lo la. E Linyon Eropèen i konnen sa zot.

Ler mon al *meeting*, mon koleg ki'n akonpanyan mwan i kapab dir ou zot toultan zwenn mwan, e nou toultan koze e zot tonm dakor. *Allemagne* in deza vin kot mwan, pou dir mwan zot dakor. *Espagne* in vini in dir zot dakor. *La France* in vini poudir zot dakor avek bann pwen ki nou'n met devan, an term lapes.

E osi ki mannyer sa partenarya pou marse.

Mr Speaker, i enportan note ki dan sa lagreman, i annan bann *key areas* ki'n ganny etale pou nou kapab fer bann korperasyon. Onorab Georges in koz lo *trade*. En *trade* i en konponan ki nou travay lo la, akoz i en fason pou nou kapab anvoy nou prodwir Linyon Eropeen, menm si par ler zot met bann kondisyon ki en pe strik me se sa ki ganny diskite.

Annefe i annan en lot protokol ki zot pe travay lo la. *Rules of Origin*, kot bokou, bokou pei Lafrik i konsernen, akoz i dir ou koumsa ou pa sipoze deforest en *area*. Akoz si ou met *the rules of origin*, letan ou dir lorizin sa zot al *investigate* ki sa prodwir agrikol i sorti dan en *area* ki ganny - ki'n sibir *deforestation*, zot kapab dir ou zot pe refize pran sa prodwir dan zot pei Linyon Eropeen.

Largiman ki monte se ki, bann pei Lafrik i dir ou par ler nou napa landrwa pou nou fer sa aktivite. Alors nou bezwen *deforest* en *area* pou nou kapab fer serten aktivite.

So, sa i bann konsiderasyon ki pe ganny diskite. E mwan mon'n form par dan sa bann diskisyon, mon

kapab dir zot napa en konklizyon ki'n arive. E zot pe gete, e nou, nou pe kontinyelman met bann pwen devan.

Ankor en lot laspe, parey Onorab Georges in dir se ki wi, nou pe ganny bann benefis parey bann por lapès. Se annefe se bann larzan ki'n ganny met dekote, an rezilta bann korperasyon lapès ki annan ki nou kapab benefisye ozordi.

Anse Aux Pins byento i ava annan louvertir bazar, e larzan i sorti dan sa fon pou nou kapab fer sa bazar. Alors i annan bann benefis.

Me selman nou toultan krwar, e mon *still* krwar *attending* sa bann *meetings* i annan landrwa kot nou kapab fer pli byen. Annou get en pti kou dan konteks.

Dan konteks Mr Chair, Mr Speaker, eskiz mwan, mwan en pwen ki mon met devan annefe nou toultan *champion* bann Mosyon lo, Sesel i fer sir ki i devan dan *ACP EU*.

En keksoz ki nou koz lo la, se ki nou koman pti Sesel mon apel li koumsa akoz nou pti. Me nou enn bann paradi dan lemonn, zot *attest* to sa zot dakor avek sa. Me nou pa kontribye anver, me nou viktim.

Alors, enn bann pwen ki mwan mon'n deza met devan,

se ki si zot annan loportinite pou zot *blacklist* nou, eski nou pa kapab fer diferan kalite *blacklisting*? En *climate blacklisting*, avek en *financial blacklisting*?

Eski nou kapab get ladan? I *mean* nou'n diskite, nou'n vwar poudir i annan pwen. Zot osi zot in aksepte poudir i annan pwen, akoz se zot ki bann *polluter*. E alors nou santi ki anba lagreman, i bezwen annan bann fason ki zot ki pran responsabilite.

Nou konnen la *COP 28* pe terminen oubyen in fini terminen. E in annan serten lavansman lo sa \$100 bilyon ki ti ganny mete. Sa i en kestyon ankor ki nou ti diskite a fon dan *ACP EU*. Alors sa lagreman i pou enn ki pou annan en kontinyite.

Me selman Onorab Georges si ou annan sa lenformasyon, si napa e sa i en kestyon ki nou'n privilezye. Mon oule remerci Onorab Wiliam pou envit mwan pou sa *meeting* ki zot ti gannye avek *Foreign Affairs*.

Anba *Cotonou*, i annan bann *funding*, espesyalman pou parلمانter *attend* bann *meeting JPA* e bann *normal regional meetings* ki pou ganny fer prezan. Eski Gouvernman Sesel in pran konsiderasyon

sa? E sa *funding* kote in ganny mete dan nou Bidze?

Akoz i vre kekfwa i ti devret vin avan Bidze, kot nou ti a kapab poz en pe kestyon avek *Ministry of Foreign Affairs* oubyen Minister Finans letan zot vini, pou nou kapab kontinyen *attend*.

I annan enn an Fevriye ki pou fer *Angola*. E avan sete Linyon Eropeen ki ti pe *fund*. Eski sa pou kontinyen? Si i pa pou kontinyen, parey lagreman pe demande. Eski i annan en landrwa dan nou Bidze. Mon pa konnen si *Ministry of Foreign Affairs* oubyen Minister Finans, selman mon konnen napa kor Lasanble. Lasanble normalman i *fund* zis pou en Manm Parlman, me i pa *fund* pou *head of delegation*.

Eski sa Bidze i pou ganny, oubyen kote i ganny *located*. Mon konnen kekfwa sa kestyon i enn ki difisil pou reponn la. E nou bezwen get avek Minister Finans pou nou kapab vwar ki manner i annan bann *contingencies* ki nou kapab tap ladan, pou nou kapab kontinyelman *attend*.

Akoz i annan *Committee of Ambassadors* ki zwenn. Zot zwenn *Brussels* laplipar ditan. Akoz lamazorite bann Anbasader i annan *Brussels*, e bann *counsel of Ministers* zot

zwenn. Me i annan osi *Head of States* ki zwenn *ACP Head of States* ki zwenn detanzaot, pou zot pas en pti pe lo bann keksoz ki'n ganny diskite e vwar.

E i annan *JPA - Joint Parliamentary Assembly*. So, nou bezwen fer sir ki sa bann letap i kontinyen e ki nou kontinyelman annan en dyalog en diskisyon. E *JPA* i mars parey Lasanble isi bann Minis. Minis sorti dan *counsel of Ministers* i ganny kriye, sirtou bann ki prezidans Linyon Eropéen zot ganny kriye.

E bann kestyon i ganny poze avek zot, zot donn nou bann larepons e nou remet bann kestyon parey i ganny fer toultour.

En pwen ki mon ti a kontan kontinyelman demande Mr Speaker, se ki i annan parey sa enn, in annan partisipasyon kontinyel parlamanter, nou kontinyen annan dan bann sektor ki'n ganny mansyonnen ki enkli; *Human Rights Social Development, Environmental Natural Resource Management, Peace and Security, Human Rights Democracy and Governance, Migration and mobility*.

Migration and Mobility Mr Speaker, i pa en keksoz ki vreman tous Sesel. Me selman i tous kontinan Lafrik. So, nou

bezwen kontinyelman partisip dan sa bann aktivite. E mon pou demann Legzekitiv, mon kontan a plizyer repriz Minis Ferrari in dir ki partisipasyon Lasanble i bezwen ganny fer sirtou letan nou pe koz en lagreman ki pou annan en lenpak lo sa pti pei oubyen sa pei.

Me dan sa konteks mon bezwen koz lo Sesel, akoz mon dan Parlman Sesel. Ki pou annan en lenpak lo Sesel, pou ki demen letan i vin dan Lasanble nou okouran.

At least i annan Manm Parlman ki okouran parey dan sa konteks ki okouran ki sa lagreman pe koz lo la. E akoz in ariv koumsa, e kwa ki dan lefitir nou kapab posibleman negosye pou nou aranze e fer sir ki sa pei i kontinyelman benefisye ladan.

Mr Speaker, avek sa 2 mo, mon pou donn mon lasirans Onorab Georges ki mon pou siport sa Mosyon. Akoz mon enn - enn ki personnelman benefisye anba *Cotonou Agreement* ki'n siksed parey mon'n dir. E la i vin *Samoa Agreement*.

Akoz mon krwar ki nou bezwen annan kontinite. E nou bezwen kontinyen fer lavwa pti Sesel, pti ki i ete me selman i pwisan dan domenn; dan bann

domenn *peace and security*, nou pwisan e nou ganny demande pou nou kontinyelman *chair* bann Komite ki egziste dan sa konteks.

Alors avek sa 2 mo, mon ti a kontan remersye ou e ankor enn fwa donn mon lasirans Onorab Georges ki mwan, mon pou lev mon lanmen pou fer sir ki sa lagreman i ganny ratifye. Mersi.

MR SPEAKER

Mersi Onorab. *À ce point* mon pou donn laparol Onorab William *Chairman IAC*. Akoz mon konnen poudir dan son rol i koz lo eksplik sa trete. Onorab William ou annan laparol.

HON WAVEN WILLIAM

Mersi Mr Speaker. Bonzour tou dimoun ki a lekout. Mr Speaker, mwan osi mon pou aport mon sipor pou sa ratifikasyon. Akoz parey Loter Mosyon in fer nou konpran ki irzans e lenportans par deryer pou sa ratifikasyon.

Mr Speaker, lagreman partenarya *Samoa* ant Linyon Eropéen e son bann letan Manm *EU* ek Manm lorganizasyon Lafrik, Karaib e Leta Manm Pasifik pou *ACPS* i devan Lasanble Nasyonal pou ganny ratifye.

Lagreman partenarya ti ganny sinyen an *Samoa - Apia* par Minis Tourism e Zafer Etranzer Mr Sylvestre Radegonde le 15 Novanm 2023. E mon krwar i byen ki Onorab *Leader Zafer* Gouvernman, in anmenn sa lamannman senp, pou met sa Mosyon an konteks. Akoz i ti ganny sinyen le 15 Novanm 2023. E byensir sa i ganny fer antre.

Mr Speaker, nouvo lagreman pe siksed lagreman partenarya *Cotonou*, ki pe ariv son lafen. E i bon fer konnen poudir ava *Cotonou* nou ti annan 4 seri *Lomé* Konvansyon, ki ti pe ofer parey in ganny dir *focus* lo komers. Me ozordi nou vwar poudir sa in evolye ki kouver bokou lezot sekter.

Ratifikasyon sa lagreman a fasilite sa tranzisyon legal anba en nouvo lakor partenarya ant Linyon Eropéen. Sa nouvo lagreman ki'n ganny divize an 3 rezyon Mr Speaker. Lagreman ant Linyon Eropéen avek bann pei pasifik. Lagreman ant Linyon Eropéen avek bann pei manm Karaib e lagreman an partenarya ant Linyon Eropéen e bann pei Manm rezyon Lafrik Mr Speaker, ki form parti anviron 79 pei, kont 27 pei manm Linyon Eropéen.

Sa nouvo lagreman ki'n ganny divize Mr Speaker, i

kouver bann tel size priyoriter kle; par egzanp drwa imen, demokrasi e gouvrenans, e lape avek sekirite, imen avek devlopman sosyal, agrandisman lekonomi enkliziv e soutenab, devlopman soutenab e lanvironnman, sanzman klima, migrasyon e mobilite.

Mr Speaker, sa nouvo lagreman ki pe siksede Lagreman *Cotonou*, oparavan ti annan bann diferan lagreman parey mon'n dir oparavan. 4 seri *Lomé*. E sa lagreman i pou en tenm 20 an, sa lagreman an partenarya i konpri en provizyon anba *part 1* ki kouver lobzektif, prensip, dyalog partenarya, Koreans polisi, parti prenon striktir e lezot size an relasyon ek sa lakor.

Mr Speaker, part 2 i kontenir stratezi priyoriter, depi lartik 8 ziska lartik 76 sa bann size priyoriter zot tonm anba bann tel ka tel parey drwa imen, demokrasi, Gouvrenans e sitwayen o sant devlopman lape e sekirite imen e devlopman sosyal enklizivite, lagrandisman ekonomi. Enklizivite e soutenabilite sanzman klima e lanvironnman soutenab, migrasyon e mobilite.

Part 3 i kouver lalyans global e korperasyon enternasyonal, i fer provizyon

pou re-affirm lenportans parti prenon an mentenir e ranforsi lalyans global, pou asir en sistenm militilateral, efektiv pou en monn modern baze lo bann prensip soutenab dan lartik 78 a 80.

Parti 4 i koz lo mwayen e korperasyon e enplimantasyon dan Lartik 81 a 85. I donn mwayen korperasyon e lenplimantasyon sa lagreman ki baze lo diversifikasyon, devlopman enternasyonal, korperasyon resours domestik piblik; resours prive enternasyonal, det e soutenabilite det Mr Speaker.

Parti 5, i koz lo kad enstitisyonnel sa i koz lo etabli en kad sa lenstitisyon konzwent ek lezot departman. Sa diferan nivo gouvrenans, lorganizasyon OACPS ek Linyon Eropéen. Depi lartik 86 a 95.

Zot fer provizyon pou lenstitisyon konzwent Some Sef Deta OACPS avek Linyon Eropéen, konsey Ministeryel konzwent; Komite Anbasader konzwent, rasanbleman konzwent parلمان e repetitif a nivo rezyonal e langazman e lezot parti prenon parey Onorab Andre in koz lo la.

Part 6, i fer provizyon final i fer provizyon dan lartik 96 a 104 ki kouver laplikasyon teritoryal lezot lagreman e

laranzman konsantman pou *bide* lagreman rantre anfans e laplikasyon provizyonnel; dirasyon e revizyon, terminasyon diskisyon, *dispute settlement*, onor lobligasyon aksesyon; stati obzervater e teks otantik Mr Speaker.

Sa seksyon i kouven sa 3 protokol rezyonnal ek Linyon Ewopeen. Protokol rezyonnal Afriken Linyon Ewopeen, i kouven korperasyon, i enkli soutenabilite, *growth and development* Mr Speaker. E parey mon'n tous lo la oparavan pa bezwen ki mon repet ankor, sa 2 parti prenon ki konpri 27 leta Manm Linyon Ewopeen e 79 leta manm kontinan Lafrik e son bann zil, leta manm Karaib e pasifik.

Nou pe koz nou en popilasyon Mr Speaker, anviron 2 bilyon zabitan e ki reprezant anviron 50 pousan syez dan Lasanble zeneral Nasyon z-Ini. I montre ki sa mouvman i en gran lafors Mr Speaker.

Mr Speaker, sa nouvo lagreman ki pou pran lefe le 01 Zanvye 2024, akòz vye lagreman *ACPEU* i ekspire le 31 Desanm. E vwala irzans akòz sa ratifikasyon pe vin devan nou.

Mr Speaker, i bon osi note ki sak leta evolasyon sa bann lakor partenarya ant Linyon Ewopeen avek leta manm pei

Lafrik, Karaib e *Pacific* depi lagreman *YAOUDE* 1963 a 1969; Lakor *Lomé* an 1975, Lakor *Cotonou* an lannen 2000 e la nouvo Lakor *Samoa* in annan sanzman sorti koman zis en lakor komers ekonomik pou enkli bann lezot size enportan Mr Speaker.

Mr Speaker, si mon ti zis en *layman* letan ou pe lir sa lagreman ou ti poudir be sa lagreman i *unfair*. E Mr Speaker, ou bezwen regard li pa zis lo nivo enternasyonal, me o nivo global.

Mr Speaker, letan ou vwar bann sityasyon, bann desizyon enternasyonal ki ganny pran ki Sesel i ganny enpakte lo la par egzantp.

Blacklisting ou pe koz ou *GDP Capita*, nou pe koz *Multi-Dimensional Vulnerability Index* Mr Speaker ki Sesel pe pouse. Nou pe koz bann nouvo mekanizm pou bann nouvo led ki pe ganny met a dispozisyon, sirtou anba sa size dan letan nou pe koz *loss and damage*.

Mr Speaker, Sesel i bezwen gard son plas otour latab kot sa bann diskisyon pe ganny fer. Alor ratifikasyon Mr Speaker sa lagreman i tre enportan. E parey loter Mosyon in dir, bokou dimoun deor la i kapab dir poudir be sa bann

lagreman i *unfair*, Sesel pa ganny bokou.

E Mr Speaker, dan sa monn global dan sa vilaz global parey nou toultan dir nou pe koz globalizasyon, lentegrasyon ensidswit, Mr Speaker, pti Sesel i bezwen - i bezwen form parti sa bann lagreman pe kontinyen reste otour latab pou li kapab zwe son rol fer son lavwa tandé pou li kapab benefisye dan sa vilaz global.

Avek sa 2 mo Mr Speaker, ankor enn fwa mon pou dir ki mon pou donn mon sipor pou sa ratifikasyon. Mersi.

(APPLAUSE)

MR SPEAKER

Mersi Onorab. Mon a donn laparol Onorab Sebastien Pillay.

HON SEBASTIEN PILLAY

Mersi Mr Speaker. Mon pou ganny mon privez *Leader* ozordi. I annan Manm ki'n lev lanmen, ki le koze avan?

MR SPEAKER

Non, non. I senp. Ou ti a kontan koz pli tar?

HON SEBASTIEN PILLAY

Yes.

MR SPEAKER

Ok, mon a permet ou napa problem. Mon a donn laparol Onorab Aglae.

HON EGBERT AGLAE

Mersi Mr Speaker. Bonzour tou Manm Onorab e tou dimoun ki a lekout. Mr Speaker, mon remarke ki ozordi i pou dernyen zour *sitting* pou sa lannen. *Unless* i ariv en lot ka dirzans dan en sans ki nou bezwen *reconvene*.

Osi mon konstate ki poudir Mr Speaker, pandan sa lannen ki nou'n travay nou'n pas lo diferan bann Trete ki neser pou nou pei e nou lenfliyans ki nou, nou annan avek nou bann relasyon bilateral ouswa multilateral avek bann pei.

E ozordi nou pe fer sanmen sa. E osi mon konstate Mr Speaker, ki sa Trete ki devan nou i en gro trete 403 paz presizeman ki fer ki sa dele letan ki nou'n gannyen pou nou pas lo la, byensir i pa ase. Donneren konteni irzans ki'n ganny dir, ki nou bezwen ratifye, sinyen. Fini sinyen i bezwen ratifye avan le 31 Desanm sa lannen pou pran lefe apartir le 01 Zanvye.

I fer ki koman nou koman Parlman, nou rol Lasanble nou pa'n ganny ase letan. E sa i pa premye fwa i arive sa bann

keksoz parey. Me dan sa konteks sa lagreman sitan sa lanpler sitan enportan, i annan en kantite eleman size enportan dan sa Trete li menm li. Mon santi poudir nou pa pe fer gran zistis.

Me selman parey in ganny dir, nou napa swa me pou fer li. E osi nou konstata Mr Speaker, nou dan sa Lasanble mwan koman en Manm mon'n ganny elekte pou mwan koze e defann prensip ki mwan mon krwar ladan. E parfwa mon santi poudir i annan serten nou dan sa Lasanble, ki sey rod tou fason pou sey denigre nou kanmarad.

E la taler bomaten mon'n tann loter Mosyon, li konmsi ki poudir ki mannyer nou pou koze.

(Interruption)

MR SPEAKER

Nou lo Trete Onorab. Nou lo Trete silvouple.

HON EGBERT AGLAE

Mon pe al lo sa Trete Mr Speaker.

MR SPEAKER

Wi *ok*, al lo sa Trete.

HON EGBERT AGLAE

Be sa bann kalite mantalite ki nou pa kapab kontinyen.

(Interruption)

MR SPEAKER

Nou pa pou pran... nou pa pou pran largiman ant en Manm avek en lot. Koz...

HON EGBERT AGLAE

Atraver ou Mr Speaker, mwan mon pa en dimoun ki antre dan bann konfli. Me selman kot i byen mon pou dir i byen. E kot i mal mon pou dir i mal. Akoz mwan nou tou nou annan en nivo lentelizans isi dan sa Lasanble. E mwan mon Aglae e mwan mon pou kontinyen koze.

Mr Speaker, Trete... (zot kapab riye zot. Mon pa soubalter personn isi mwan!) Mr Speaker, en keksoz ki mwan mon anvi fer resorti lo pozisyon Sesel *in regard to* bann Trete ki nou, nou sinyen. E *rightly said*, mon'n dir nou napa swa me nou bezwen *be at part* avek sa Trete EU.

An relasyon kot *Cotonou Agreement* pe al fini le 31 li osi. e si nou koman en pei, nou pa sinyen sa Trete byensir nou pou war nou an deor. Letan mon pe dir an deor, i vin avek sa bann konsekans byensir. Akoz sa bann pwisans Linyon Eropen

ek son bann *partners* ki atase avek byensir, zot annan *the upper hand* sirtou avek nou bann *seeds*. Nou bann pti pei parey Sesel.

E zot, zot dikte lafason politik lemonn i evolye. Politik ekonomik, politik sosyal dan tou bann diferan e nou war sa e nou konnen sa nou. Me selman nou bezwen *toe the line*, aköz nou bezwen zot, zot in ed nou dan lepase. Nou annan plizyer proze, nou annan bann *Grants*, nou annan bann proteksyon nou *EEZ* ki zot form par ladan. *UNAFOR*.

Nou annan bann lezot sipor teknik ki parfwa zot anmennen, zot pou donn nou pou nou kapab koman en pei avanse. E sa *is just the crest*, aköz si nou pou koz lo benefis *reel*, i annan en kantite mansyon ki pe sorti dan sa Trete, en?

E zot in sit 6 pilye priyorite ladan, demokrasi ek *human right*, devlopman ekonomik soutenab; zot in koz lo lanvironnman ek sanzman klima.

Zot in koz lo laspe devlopman imen ek sosyal, lape e sekirite, migrasyon avek bann mouvman ki annan an term dan nivo global. *Now* Mr Speaker, pa tou dan sa bann priyorite ki neserman aplik

pou nou pei Sesel. Aköz petet lo nivo devlopman ki nou, nou'n arive ozordi ki'n fer ki pa tou pwen ki neserman ki aplikab pou nou.

Nou'n fer en kantite progre, e mwan mon salye 43 an progre ki fer ki dan sa 6 pilye la ki'n ganny mete bokou pa aplikab pou nou ozordi, e nou merit fyer pou sa. Konpare avek nou bann pei frer dan larezyon sirtou dan rezyon *SADC*, ki bokou zot pa ankor kapab *attend* lo sa bann nivo e sa bann lendeks mondyal o parey nou nou'n reisi *attend* pou sa.

E sa i pa ariv dan 3 an sa. Lo sa konteks Mr Speaker, bann keksoz ki mwan mon santi ladan ki pei in sinyen sa avan le 15 Novanm, *ok*. Me kestyon se eski nou'n al a profon ladan pou vwar osi ki bann lefe ki kapab anmennen. I kapab pozitiv e osi i annan bann lefe negativ ladan.

E la Mr Speaker, nou, nou bezwen rod tou fason a lavenir ki mannyer nou benefisyen anplis. Wi, pei pou sinyen, pei napa swa. Lasanble pou pas son mazorite, son mazorite. Me annou pa bliy lepase ki ti ganny dir osi atraver bann Trete Linyon Eropen. E mwan mon rapel byen mon ti dan 6enm Lasanble mwan Mr Speaker.

Kot Onorab atraver ou, sa letan Onorab Ferrari letan bann Trete Linyon Eropéen ti vini ti dir ti persekit sa Gouvernman ki ti la poudir, nou pa'n fer ase. Nou pa dakor ek sa, ti kapab fer pli byen. Ti kapab fer koumsa.

Me selman taler atraver Ou Mr Speaker, mon fek tann Onorab William in dir poudir pa tou keksoz ki ou konnen ki nou pou kapab pe dir nou pou ganny tou keksoz isi laba.

Me selman ti dir, e ozordi zot sanz *tune* ek nou. So, annou fer sir bann keksoz ki nou dir. Akoz mwan mon bezwen fer sir ki mon dir ler mon dan Lopozisyon. Ki si demen nou ariv o pouvwar an 2025...

(APPLAUSE)

HON EGBERT AGLAE

...mon bezwen konnen ki sa parol. Mon bezwen konnen ki sa parol ki mwan mon'n dir ler mon dan Lopozisyon, pa vin konny mwan deryer letan nou vin o pouvwar 2025.

So, lo sa Mr Speaker, annou pran en legzanp ki mwan mon anvì koz lo la se lafason ki nou ganny trete koman bann pti pei, atraver sa bann lorganizasyon. Nou koz lo devlopman e sanzman klima e devlopman soutenab Mr Speaker. Letan mon ti al *attend*

IPU, e mon ti dir sa dan *meeting* Mr Speaker.

Propozisyon ki blok Lafrik ti met devan sete pou anmenn en Mosyon aplik lefe sanzman klima, nou, nou pa en gran kontribiter nou 0.01 mon krwar mannyer i dir. Nou pa en kontribiter direk, kot i konsern domaz ki'n anmennen *regards to* sanzman klima.

Me letan nou, nou met nou *claim* devan atraver blok Lafrik poudir be Mosyon kot i konsern akse, etabli en fon kot i konsern *loss and damage*, ki sa bann pei Eropéen ti fer? Zot ti vot kont dan *IPU*, kont.

Me selman la dan lagreman in mete byen blan e nwar pou donn sipor pou bann ki konsern. Me la pou mwan aksyon pa swiv. Pa swiv bann lagreman ki nou, nou pe form par avek.

So, mon krwar i responsabilite demen pei dan okenn *forum*. E atraver ou Onorab Clifford Andre in fer sorti nou bann partisipasyon dan okenn *forum* ki nou, nou al *attend*. Nou bezwen fer resorti sa bann konsern.

Pa akoz ou pe donn mwan en pti sou en pti kas en pti sipor, ki mwan mon bezwen reste trankil. Ki ler mwan mon santi poudir be gete nou pa pe onor sa ki nou'n tonm dakor,

kantmenm nou'n sinyen nou bezwen *voice out* sa bann konsern, akoz i pa byen.

So, pou mwan mon poz kestyon, be ki ou anvi fer *in regards to* sa size sanzman klima? Ki mannyer ou pou ed bann pti leta zil? Si bann set demann parey pa pe ganny konsidere.

So, i bann keksoz ki nou bezwen reflesir lo la, reflesir lo la. E mwan Mr Speaker, mon pa pou kapab pa dir Sesel a mon lopinyon pou mwan menm, poudir be annou pa sinyen akoz byensir si nou pa be at part nou pou war nou dan en lenstans persekisyon.

Nou pou vin parey bann pei pare *Venezuela*, parey Nor Korea. La parey en pe dan Larisi, nou pou vin bann pei ki pou ganny *outcast* si nou reste nou an deor dan sa fason.

Me *be mindful*, lemonn global, politik lemonn pe sanze li. I pe sanze avek bann nouvo imerzan ki pe monte. E nou pou war bann keksoz ki pou arive a lavenir kot menm pei pou bezwen war li dan en fason pou pran en desizyon lo ki kote ki *side* ki li i pou pran.

Lot konteks Mr Speaker, ki size ki mon anvi tous lo la *in regards to* i annan bann proze ki *on going* ki pe ganny finanse

par Linyon Eropéen an sipor avek bann lezot *partner*.

E nou pou bezwen byensir, akoz si nou pa be *at part* definitivman i posib ki bann proze i tonm dan delo ler ou napa serten sa bann lagreman. I posib Sesel pa pe benefisye. Se sa bann *catch* ki vin avek sa bann keksoz si nou deside pa onore.

Rol Lasanble Mr Speaker, e nou partisipasyon, e tou kou nou dir sa, nou annan reprezantan *ACP EU* isi dan sa Lasanble. E mwan mon santi poudir bann Manm ki form par, i bezwen osi kapab letan i annan bann diskisyon ki pou ganny fer avan nou, nou al siny lagreman Trete;

Lo sa konteks politik, menm si nou dir pa met politik, me selman sa lagreman li menm li i annan en konotasyon politik. Sa i politik Linyon Eropéen ki pe enpoz lo son bann Manm, lo son bann *member states*. *Directly* sa. I politik mondyal ki mannyer i pe ale.

So, nou bezwen *at least* annan bann reprezantasyon nou osi laba koman bann Manm Parlman pou kapab osi donn nou bann *inputs* kot i neser.

E kot i konsern pozisyon Sesel defann e ki nou *stand*, si

nou war en keksoz pe afekte nou, pa pou dan nou lavantaz nou bezwen *stand* nou *ground*. Akoz i annan pei ki'n fer sa, e i annan bann Trete ki parfwa i annan bann modifikasyon ki vin avek pou fer ki i *suit* bann *needs* bann lezot pei.

Menm parey *WTO*, letan nou ti dir ki i annan serten keksoz ki nou kapab antre poudir re negosye, re koz lo la.

Akoz i annan pei ki ganny bann keksoz en pti pe favorab letan ou regarde, sirtou bann pti leta zil. Me si nou koman en pei, zis nou ale nou aksepte sa ki ganny met devan nou. Akoz sa relasyon ki nou annan i pa pou neserman dan nou benefis.

So, si fodre rod *funding* e ladan i fer mansyon bann *funding* ki kapab ganny donner avek *member state* bann Parlman. Me nou, Nou bezwen al *ride* sa. Si Lasanble i dir napa, me nou ava rode. Annou rod fason pou nou gannyen pou nou kapab anmenn nou bann Manm parlman.

So, Mr Speaker, an konklizyon anvi kontrent letan pou kapab dizer sa gro dokiman ki la devan nou, Sesel i bezwen war li dan en pozisyon a lavenir pou li kapab osi tras son desten dan en fason.

Nou konnen nou depan lo bokou nou bann pei zanmi. Nou bezwen kontinyen *build* bann relasyon, pou nou kapab si demen nou deside pa antre anliny avek serten sa bann lagreman konvansyon, me nou bezwen santi ki nou bezwen bann lezot pei zanmi ki kapab siport nou. Akoz nou pa konnen ki kapab arive.

E se sa ki mon dir avek sa Gouvernman, zot bezwen serye kot i konsern *built a relationship bridge bilateral* ouswa miltilateral.

E annou aret fer bann gaf par ler, kot nou kre bann kontansyon kot bann pei zanmi, kot nou dir nenport kwa ki parfwa i afekte en pe nou bann relasyon.

So, nou koman en pei souvren, nou egziste e nou bezwen kontinyen egziste. E nou bezwen sipor byensir akoz nou pou bezwen sa bann keksoz parey.

So, avek sa Mr Speaker, mwan mon a profite pou swet ou, ou fanmir, tou Manm Onorab, tou pep Seselwa pou zot pas en bon Nwel ek Lannen. Menm si sityasyon pa neserman dan faver tou dimoun ozordi. Mersi.

(APPLAUSE)

MR SPEAKER

Mersi Onorab. Zis en pti remark lo dernyen pwen Onorab Aglae. Salye bann... lo kote *LDS* in demann mwan pou zot kapab adres en pti mesaz pou zot *constituent* a lafen. Si mon fer li pou sa, mon pou bezwen *extend* sa pou tou Manm.

Donk, Onorab petet ou ti a kontan zis rezerv sa mo pou dernyen moman, koumsa ou pa bezwen repet ou lekor. Tre byen. Mon pou fer en lot lapel, silvouple annou pou enn fwa sey konsantre lo Mosyon ki devan nou. E Trete ki nou pe konsidere.

E mon demann sa en pe anvi ki sa i nou dernyen *item*. Pa dernyen, me nou dernyen zour travay, mon anvi ki nou montre latitud serye ki nou piblik i ekspekte. Mersi nou a pran poz la. E nou a rebran lo Trete 11er. Mersi.

(BREAK)

MR SPEAKER

Byen nou a rebran deba lo Mosyon. Mon ava apel Onorab Phillip Arissol.

HON PHILLIP ARISSOL

Mersi Mr Speaker. Bonzour Mr Speaker. Tou koleg Onorab e tou dimoun ki pe swiv nou. Mr Speaker, letan ki nou pe antre

dan nouvo lannen, i enperatif ki nou abord problem enportan lo kontinyasyon nou korperasyon avek Linyon Eropeen.

Lakor partenarya *Cotonou* ki ti enn fondasyon nou kolaborasyon i al byento terminen le 31 Desanm 2023. Sepandan sa partenarya ant Sesel e Linyon Eropeen i reste an sekirite atraver lakor nouvo lakor sa partenarya *Samoa*, apre ki nou ratifye li.

Lakor partenarya *Samoa* ki pe ranplas lakor partenarya *Cotonou*, i reprezant en nouvo sapit dan nou relasyon avek Linyon Eropeen e son bann leta Manm.

Menm si larantre anfors formel, lakor partenarya *Samoa* i kapab pran en pe letan, i enportan pou nou note ki apartir le 1 Zanvye 2024 pei ki'n siny sa lakor enkli Sesel pou komans aplik li lo en baz provizwar annakor avek lartik 98(4) sa lagreman.

Mr Speaker, sa laplikasyon provizwar i garanti ki nou korperasyon kontinyel avek Linyon Eropeen i kontinyen san problem. Sa i permet nou benefisy sipor e loportinite partenarya ki a lagreman i ofer nou.

I en netwayaz lafors e lenportans nou relasyon avek

linyón Ewopeen e souliny nou langazman. E ankouraz nou pou nou promot nou lyen benefis mityel. Pandan ki nou pe avanse, i esansyel pou nou abòrd sa tranzisyon avek loptimizm e determinasyon.

Lakor partenarya *Samoa* i prezant Sesel bann nouvo loportinite an kolaborasyon e krwasans. E mon annan konfyans ki i pou ouver laport pou en lavenir prospere pou Sesel.

Mr Speaker, sa lakor i servi koman en kad legal pou relasyon ant Linyon Ewopeen *EU* e lorganizasyon Leta Afriken, Karaib e *Pacific*, *OACPS* ki dekri 6 pilye priyorite pou korperasyon pandan sa 20 prosen lannen ki pe vini.

Sa bann priyorite i demokrasi e drwa imen, krwasans e devlopman ekonomik dirab, lanvironnman e sanzman klima; devlopman imen e sosyal, lape e sekirite, migrasyon e mobilite.

Mr Speaker, sa lakor i annan pou bi ranforsi kordinasyon ant Linyon Ewopeen avek bann Leta Manm *OACPS* o moman pe adres defi mondyal lo sa bann pilye priyorite.

Sa kad konpreansiv i reflekte en langazman pou zefor kolaborasyon pou abòrd

problenm kle, tel ki drwa imen, devlopman ekonomik lanvironnman, devlopman sosyal, lape e sekirite e migrasyon e mobilite.

Lakor partenarya *Samoa* i reprezant en langazman pou ankouraz devlopman dirab, ankouraz krwasans ekonomik e adres defi mondyal parey sanzman klima e proteksyon nou resours natirel.

Letan nou aplik sa lakor, sa i ava en fason provizwar kot nou demontre nou devouman nou lobzektif partaze e nou volonte pou angaz an kolaborasyon enportan avek nou bann *partner* enternasyonal.

Anplis ki sa, laplikasyon provizwar sa lakor pou permet nou akse resours enportan e sipor Linyon Ewopeen e son bann Leta Manm ki san dout pou ranforsi nou zefor pou lavansman byennet nou sitwayen e devlopman pli larz nou nasyon.

Sa i reprezant en loportinite enportan pou Sesel benefisye avek lasistans teknik, devlopman kapasite e lasistans finansyel ki kapab kontribye pou realiz nou bann devlopman nasyonal priyoriter.

Mr Speaker, letan Sesel i aplik sa Lakor, sa i en laprev nou langazman pou defann

prensip demokrasi, bon Gouvernans e respe pou drwa imen. Ler nou aksepte sa lakor nou pou reaffirm nou devouman dan valer fondamantal e demontre nou laspirasyon pou ranforsi nou partenarya avek nasyon e lorganizasyon, ki partaz menm lide e menm vizyon avek nou.

Pou ki Sesel i kapab kontinyen benefisye avek korperasyon *EU*, ki pe kontinyen e asir bon tranzisyon sorti dan *Cotonou Partner Agreement*, *Partnership Agreement*. Pou vin dan sa nouvo lakor partenarya *Samoa*, i enperatif ki nou pran bann mezir neserer pou nou aplik provizwarman sa lakor.

Mr Speaker, tranzisyon sorti dan lakor partenarya *Cotonou* ki pe ariv a son lafen le 31 Desanm 2023 pou antre dan lakor partenarya *Samoa* i sinifye en loportinite pou Sesel ranforsi plis kolaborasyon ek Linyon Eropen e bann Leta Manm ansanm avek lorganizasyon Leta Lafrik, Karaib, *Pacific* ki pli larz.

Sa tranzisyon, i prezant en sans pou nou armoniz nou priyorite avek provizyon global e perspektiv sa nouvo lakor ki ganny fer pou satisfere bezwen nou nasyon e nou pep ki pe evolue.

Letan nou aplik provizwarman lakor partenarya *Samoa*, nou demontre nou langazman pou mentenir e amelyor relasyon pozitiv ki nou kiltive anba sa lakor, anba lakor partenarya *Cotonou*, laplikasyon provizwar pou permet nou kontinyen rekolte bann benefis ki nou ti gannyen dan korperasyon ki ti egziste deza pandan ki nou kre semen pou langazman pli profon e loportinite elarzi, avek lakor partenarya *Samoa* ki pou fer nou.

Mr Speaker, toudmenm ratifikasyon lakor partenarya *Samoa* par Sesel parey nenport ki lakor enternasyonal, i kapab soulev plizyer pwen konsern.

E Sesel i bezwen evalye laplikasyon ekonomik sa lakor, enkli sanzman potansyel dan relasyon komers, lenvestisman e lasistans devlopman. Sa i enplik evalye dan ki fason sa lakor i kapab afekte lendistri lokal e lekonomi an zeneral.

Etandonnen ki laksan sa lakor i lo lanvironnman e sanzman klima, Sesel i bezwen egzaminen dan ki fason sa lagreman i anliny ek Polisi Lanvironnman e langazman ki egziste.

Sa i kapab enplik evalye lenpak potansyel sa lagreman lo resours natirel e *eco-system*

Sesel. Alor Mr Speaker, laplikasyon provizwar sa nouvo lakor, i prezant nou avek letan ki nesese pou nou konplet prosesis domestik ki nesese pou ratifye, ratifikasyon konplet e son antre anfers.

Sa i ava asire ki Sesel i kapab fer tranzisyon dan nouvo kad partenarya, san okenn lenteripsyon dan sipor e lasistans ki nou gannyen avek bann partner Eropeen e ACP.

Mr Speaker, an konklizyon laplikasyon provizwar Lakor Partenarya Samoa i reprezant en letap kle anver garanti en lavenir pli briyan pou Sesel e son pep. Mon ankouraz tou Manm dan sa Lasanble pou donn sipor sa linisyativ, rekonnèt son potansyel imans ki annan pou prosperite e byennet nou nasyon. Mersi Mr Speaker.

MR SPEAKER

Mersi Onorab. Laparol i pou Onorab Loze.

HON JOHAN LOZE

Mersi Mr Speaker. Mr Speaker, mon komans par tret en senp size, kwa sa *gunboat diplomacy*? *Gunboat diplomacy* se en form *la diplomatie* ki ganny ranforsi par menas ouswa lafors. *Threats or military force*. E mon komans koumsa,

akoz *interestingly enough* an lannen 2023 ki pe al terminen la, Sesel i war li ankor enn fwa in ganny *blacklisted*.

A sak fwa ki nou annan sa bann keksoz pou sinyen ou ratifye, nou annan sa bann negosyasyon pe deroule avek Linyon Eropeen, Ou vwar *blacklisting* i *turn up like the proverbial bad penny*.

Mon pa konnen kote i sorti, *somehow* i la li i asize dan salon pe get ou. Ou'n ganny *blacklisted*. Apre ki - mwan koman en Lezislater mon'n fer *bonne enfant*, mon'n pas tou Lalwa ki PS ek SS Finans in anmenn devan Lasanble in dir nou sa nou bezwen; *ESSAMLG* in dir nou pas sa, *FATF* in dir nou pas lot. *OACPS* in dir nou pas sa. *Still* nou *blacklisted*?

Prezan *turnout* nou *blacklisted* pou en badinaz ki'n pase sepa 2019, e ki lo osi *like the proverbial bad penny* i kapab zis *turning up* li *whenever* zot deside zot bezwen en lenformasyon, *date from* sa lensidan 2019, nou a ganny *blacklisted* ankor si nou pa donner lenformasyon ki nou napa. I enteresan sa.

Every time! I annan en keksoz ki sa zans i oule ek nou, nou ganny *blacklisted*. Mon konpran pozisyon Onorab Georges mwan kot in dir *"we*

cannot cut off our nose to spite our face”.

Be mon ava adisyonn en *colollary* lo sa ki Onorab Georges in dir. I dir ki *“we cannot cut off our nose to spite our face”, even more so* letan i annan en pistol lo nou latet.

La ou’n pran en pistol ou’n met lo mon tanp, ou’n dir mwan fer sa, fer lot. Be wi Onorab Georges pa kapab *cut off* naryen la. Ni zerb mon pa pou koupe; *gunboat diplomacy!*

So, mwan personnelman e sa i mwan Loze mazanbik epe, mwan mon pa pe vin *mâche mes mots*. Mon pa pe vin fer krwar sa i sa ki i pa ete. No tou nou konnen ki sa i ete, selman baze lo nou pwennvi personnel, posibleman nou pa kapab koze e dir.

Baze lo nou bann responsabilite ki mon annan, posibleman nou pa kapab koze e dir. Loze i kapab koze, li i kapab dir. E *interestingly enough* sa i menm lannen ki Linyon Eropéen in pran li en desizyon, pou vin zet son bann *dechets* toksik Marie-Louise. *Whatever* malpropte ki i anmase dan lanmer, i pou vin met Marie-Louise.

E nou, nou’n dakor ek sa nou. Nou’n sinyen, nou’n aksepte. *Again*, mon pa blanmen si enn in aksepte,

gunboat diplomacy Mr Speaker. *They have bigger guns*, zot annan plis lenfliyans ki nou. Zot annan plis pouvwar ki nou.

Mon’n asize mon’n ekoute konbyen dimoun in dir ki *we cannot lose our seat at the table*. *But again*, mon pou poz en kestyon. *Are we at the table?*

E la mon a klarifye, akoz si mon pa klarifye olye get mwan koman en Seselwa sitwayen prive *l’homme politique* e patriyot ki pe koze, mon pou ganny gete koman en politisyen ki pe fer politik e ki pe akiz Gouvernman LDS. *Have we been at the table for the past 30 years?*

Depi lepok ki mon Gouvernman ti o pouvwar, *have we been sitting at the table?* Nou lo en ban larap ater anba latab kekpar pe *gather scraps*. Sa ban larap ki nou pou perdi.

Lontan nou lo en ban larap nou. *We are not at the table*. Nou krwar nou *at the table*, akoz zwe ki ganny zwe, fason ki sa bann dimoun i aranz zot sega. Zot dir ou *at the table* ou met en kravats ek en palto lo ou i tap, tap lanmen lo ou ledò i dir ou *“mon frère”*.

Eski ou son frer ou? Ou pa son frer ou. Ou lo en ban larap anba latab *gathering scraps*, sa ki ou pou perdi se en *seat* anba latab. *But then again*, mon koz

koumsa ozordi e mon oule fer en keksoz kler.

Aprè 2025 letan *United Seychelles* i retourn o pouvwar mon pou kontinyen koz koumsa menm. Mon pou kontinyen koz parey mon pe keze ozordi, e sa mon garanti sa. Mwan koman en zonm, mon dir sa parol. Mon pou koz parey!

E dan lepase nou'n annan dimoun ankor ki'n koz koumsa. Dan lepase nou'n annan dimoun ki'n dir fodre anmenn *MNA at the proverbial table or the proverbial* ban larap; fodre *bring MNA on board*. *MNA* fodre i la, fodre prezan, fodre i dan tim, fodre i annan en *droit regard*. Zet en lizye, ozordi i Minis li. Oli *MNA*?

I anmennen *MNA*? Non. Non. *MNA* i ankor la anndan. Mon pa pe dir anmenn mwan, mwan. Be i annan en gro lekip laba. Pran dan son lekip anmennen. Ti pou al negosye ek Linyon Elopeen, ti pou al fer pli byen. Oli nou pe fer pli byen? Non. Nou pa pe fer pli byen.

E mwan mon pa pe koz sa dan en konteks *US vs LDS*. Akoz si nou pran sa zistwar Linyon Elopeen koman *US vs LDS*, ki son *US*, ki son *LDS* nou pou toultan tonm dernyen nou tou.

Nou pa ni pou war laport kot i ete. Sa zans pa ni pou les nou ariv lo *finishing line*. So, i

annan serten kalkil nou bezwen kalkile. Serten rekalière nou bezwen rekalière nou fas avek sa bann dimoun.

Akoz nou vwar zwe ki mannyer i ganny zwe lo *Grande Terre*. Nou vwar ki mannyer tou dimoun lo *Grande Terre*, sakenn pe defann son lenterè dan son fason kont lenterè lezot.

Be nou osi isi ater lo pti later nou, nou pou fer parey? Nou pou les sa bann dimoun zwe nou kont kanmarad? Akoz si zot zwe nou kont kanmarad, sa ki Onorab Ferrari ti pe demande dan 6em Lasanble e ki mwan mon pe demande ozordi, zanmen nou pou gannyen, en? Nou pa pou sorti lo sa ban larap. Nou pou mor lo nou ban larap.

Ozordi nou annan nou en sekter nou lekonomi ki pe soufer, nou Sekter *Offshore*. I pe soufer baze lo kapris Linyon Elopeen avek son bann vasal, e lafason ki zot deside tret nou koman en pti pei. E nou pa koz lo.

Nou tou nou bezwen koz lo la. Nou tou nou bezwen koz pou tou sa Seselwa ki pe travay dan Sekter *Offshore* Sesel ozordi. Nou pa a koz pou sa bann gran lakonpanyen ki pe fer isi laba, se si sela sepa kwa nou pa pe koz pou zot. Me annou koz pou

nou Seselwa ki swa in kre en biznes, swa in etidye dan sa *field* in metriz konesans. E pe kontribye anver lekonomi Sesel.

Sa lendistri pa kapab kontinyelman ganny fwete, kalote, zis lo kapris, swa *La France* ki deside proklanm son lekor dan en fason inilateral.

Ouswa son Linyon Eropeen li menm oubyen son *FATF* sorti Lanmerik, son *ESAAMLG*, *whilst all the time* nou pe fer *bonne enfant* nou. Nou pe fer tou sa ki sa zans i dir nou, yet nou ganny fwete menm.

Nou bezwen kouraz pou koze, nou pa kapab kontinyen zis *knuckle under*. Tou sa ki zot dir nou fer, nou fer. *Yet* nou ganny fwete e nou manz anndan, nou reste trankil.

Zot konnen la anndan i annan dimoun ki dan biznes *offshore*. Mon konnen i pa fye koze li osi, pangar en ledwa a ganny montre lo son lentere. Me mwan mon napa bann tel problenm, mon lib pou mwan eksprimen, pou mwan koze.

Mr Speaker, bomaten letan Onorab Georges in fer son prezantasyon in koz lo *the specter of neocolonialism* i kapab ganny leve dan deba.

Be sa zafer *neocolonialism* in ganny leve dan en konteks spesifik par en *ex zofisye*

fisheries menm dan kad bann negosyasyon ki ti pe pase. E i pa'n koz lo zafer fors nou pou *acquire* se in koz lo *resource plundering*. E konnen letan ou get dan sa rapor la, ou war *sustainability* i en mo ki mon pa konnen konbyen fwa i ganny repete. Be zot realize dan bann negosyasyon lapes, Linyon Eropeen i enn bann ki'n ote pou adopte bann pratik ki pa soutenab pou nou rezyon.

So, mon zis poz sa la. I azir en pti pe parey en pouvwar *neocolonial*, ki se ou i son *backyard*. Parey Prezidan *Giscard D'Estaing* ti dir Lafrik *c'est le Sud de La France*, e zot vini zot fer sa ki zot anvi. Menm si i pa soutenab pou ou ki la.

So, wi sa size neokolonyalizm i en size me petet pa dan sa konteks ki i ti pe adrese. Nou annan a en lakor devan nou ki li in vin separe avek bann konsiderasyon finansyel.

Bann lanvlop, bann kontribisyon i pa ladan. I en lakor ki separe avek bann konsiderasyon finansyel. So, i pa devan nou, i pa en keksoz ki nou pe al vot lo la ouswa vot kont ozordi.

En lot keksoz ki mon war enteresan, zot *rush* nou par adopte sa enn lanvlop larzan i pa ladan. So, napa naryen pou

dir lo sa. Me sa ki enteresan osi, se ler i annan bann negosyasyon larzan parey bann negosyasyon lapas, zot fer li *convoluted* e konplike.

Zot a vini zot a dir ou sepa propriyeter bato i a pey ou €80 par tonn pou premye 2 an sepa premye 3 an. Apre sa lannen ki reste i a pey ou £85. Linyon Eropéen li i ava fer en kontribisyon £5.3 milyon par an. Ladan sepa konbyen pou al ver devlopman lapas lot tan i ava... ou war ki manner i enteresan - i partaz ou larzan, en?

I partaz ou larzan pou ou resours ki i pe *plunder* dan ou delo. E i anvoy ou en lakor separeman ki dir ou ki manner pou *behave*, ki ou pou fer, ki ou pa pou fer. Kan manner ou pou azir dan serten sityasyon *according to son values*. Ou konpran, akoz li i annan pli bon *values* li? I sivilize li. I bezwen siviliz larestan lemond, ou, ou bezwen gradyelman bese, pwenti e postern ou *according to son values* pou li.

E se sa esansyelman sa bann zwe la ki devan nou. Be Mr Speaker, *I will put it to you*, environ 10 pousan pwason ki ganny konsonmen Lerop i ganny lapas dan *Eastern Indian Ocean Region*. Dan tou sa pwason ki ganny lapas dan

Eastern Indian Ocean Region, 20 pousan ladan in *estimated* i ganny atrape dan delo Sesel.

Be si zis ou ti pey mwan pou sa ki ou'n pran. Si ou ti pey mwan en *fair market value*, si nou ti annan en relasyon *straight up trade*, ou pran mon resours ou'n pey mwan en *fair market value* pou mon resours, eski ou ti pou bezwen pe dikte avek mwan atraver lakor e sepa kwa ankor?

Mon pa konnen, mon pa Onorab Ferrari pou mwan dir mon kapab fer pli byen. Me selman mon osi rekonnèt ki nou annan en problem. Mon pa krwar nou pe ganny en *fair deal*. Mon pa krwar ki nou pe ganny en *fair deal* pou nou resours.

Sa bann *convoluted* negosyasyon ki pase la. Ou konnen dan en pei ozordi nou'n antre dan en bann lagreman *WTO* lot, lot nou ganny dir nou pa kapab *subsidized* nou fermye nou pa kapab isi, nou pa kapab fer laba.

Me ler ou gete bato Linyon Eropéen li i pey nou £80 par tonn. Apre Linyon Eropéen i donn ou en lot £5.3 milyon. Be par an, be i pa'n *subsidies* son bato li? I pa vin en *subsidy* sa? *Anyway*, be pa i ti pou pli byen si i pran nou pwason i pey nou?

Menm largiman ki Onorab Ferrari in anmenn dan lepase. I zis mwan mon pa pe dir, mon pou al negosye mon pou al fer pli byen. Akoz parey tou dimoun pe rekonnèt en gro lafors en gro pwisans, zot fer sa ki zot anvi.

Parey mwan menm mwan mon'n dir *gunboat diplomacy*, zot met en pistol kot ou latet, zot tyonbo enn ou lendistri zot trangle e zot menas ou.

Bon, prezan mon vin lo nou prezan Mr Speaker. Nou isi anndan nou, lagreman i siny 1 mwan pase. Demen i ganny en mwan zour pou zour. 403 paz, 403 paz nou, nou ganny li sa semenn, sa semenn. Nou meet avek bann *stakeholders* mardi *lunchtime* pti moman *lunch* ki nou gannye.

Ozordi nou sipoze fer en deliberasyon e en desizyon, en deliberasyon from en pozisyon konprenezon ki nou konpran. En deliberasyon entelizan lo sa ki nou pe aprouve lo non pep, lo nou, nou *constituency* lo non sa pep ki nou reprezante.

403 paz *amidst* tou sa Lalwa ki nou pe pase la, ki nou bezwen lir, konpran 403 paz i annan dimoun la deor ki krwar i annan enn nou isi la anndan ki'n asize in vremen metrize sa ki nou pe aprouve ozordi?

Well, apard Onorab Porice petet. Eski i annan okenn

dimoun la deor ki vremen krwar ki Manm sa Lasanble i pe metrize a 100 pousan sa ki nou pe pase ozordi? Gouvernman in siny sa 1 mwan pase li.

Lasanble i ganny sa, sa semenn. Be i apel respe sa ki Legzekitiv in montre pou nou. In montre pou nou responsabilite, in montre pou nou fonksyon. I apel respe sa, zot in montre nou respe la.

Zot donn ou 3 zour pou metrize en dokiman 400 ekek paz *amidst* tou sa ki pe pase dan pei, *amidst* tou sa bann Lalwa finansyel ki nou pe pase. Nou pe *saut du coq à l'ane* toulezour.

E ozordi nou sipoze pe pas sa from en baz konprenezon, e fer en desizyon entelizan. Mr Speaker, mwan mon konvenki ki nou annan en gro mank respe pou Lasanble Nasyonal avek son bann Manm. I annan en gro mank respe pou nou.

Be i paret ki sa i fason ki nou fonksyonnen konmela. I paret ki sa i lafason ki bann ki pe dirize, zot anvi anmenn pei konmela. E mwan pou mwan i sagrinan, i regretan. I regretan lo *behalf* en pep ki ozordi Lasanble i napa kouraz pou debout e fer son travay.

E nou napa, nou napa. Nou'n aksepte en dokiman 400 ekek paz nou tou nou pe fer

krwar ki depi Mardi ler nou'n ganny sa ziska ozordi nou'n fini kapab metrize nou.

Ler ki lesplikasyon in vini Mardi, nou'n *meet* pandan lerdtan, nou'n ganny tou lesplikasyon nou'n kapab fini eksplik nou *Caucus*. E tou dimoun dan nou *Caucus* in konpran.

Nou pe al lo sa baz i regretan, nou napa kouraz isi anndan *anymore*. Nou napa kouraz pou nou demann Legzekitiv, ki i fer en *independent inquiry* dan en lensidan ki'n arive baze lo i napa kantite zour, i pa kapab vin *admissible*. Selman sa enn in admet li, li i pa bezwen zour li in admet li.

Nou napa kouraz pou nou admet e fer en deba lo Proklamasyon leta dirzans ki'n ganny fer, *either legally or illegally or fraudulently* fer en konversasyon lo la. Nou napa kouraz fer sa. Selman en manman dokiman 403 paz ki nou pe fer krwar nou pe debat lo la e avek tou konprenezon.

Kestyon dirzans ki konsern nou pep an se moman, biznes ki pe soufer. Nou pep ki pe soufer, nou koman Lasanble *nil by mouth. Nowhere to be found*. Nou blok tou zefor pou koz lo sa bann size. Pourtan nou ti'n kapab apros li dan en

fason linite. Zot ti'n devret kapab apros li dan en fason bipartisan. Zot in kapab apros sa bann size e senpleman zis koz pou nou pep, parey nou'n fer ek bann Lalwa finansyel sa semenn ki nou tou nou'n *agree* i devret pe pase non?

Nou *strong arm* nou bloke, nou defann pa pou koz lo la personn. *Instead* vini nou koz lo en dokiman ki'n vin la an *sursaut* li - zis aparet. Leksplikasyon nou ganny 2 zour avan nou vin debat.

Mr Speaker, an terminan mwan mon pou dir ki mwan mon santi ki nou pa pe *fulfill* nou responsabilite. E koman en Manm ki form parti en lenstitisyon endepandan, i regretan ki nou a pe termin lannen avek sitan mank respe pe ganny montre pou nou lenstitisyon par Legzekitiv pei.

E sa personn pa pou tire dan mon lespri, dan mon leker sa. Mon santi koumsa. Mon dernyen parol Mr Speaker, i konsern en size in komanse, in ariv en fwa in ariv 2 fwa. Prezan ou a krwar in gou e nou les pase.

Konmela tanzantan mon tann Pillay, Loze, Cosgrow. Pillay, Loze, Cosgrow treotoner! Mr Speaker, mwan la mon pa anmas koko *Jardin Du Roi* mwan! Personn pa pou vin kri

mwan konmsi mon anmas koko
Jardin Du Roi!

Mon konnen mwan Loze, ou *Dauphin* mon pa ou boy. Lesklavaz in large dan sa pei, dimoun pou ganny adrese ek respe. Sansan nou tou nou a fer parey. Mon a kri *Dauphin, Dauphin* mwan osi. Mersi Mr Speaker.

MR SPEAKER

Mersi Onorab. Onorab Samynadin, ou annan laparol.

HON KELLY SAMYNADIN

Mersi Mr Speaker. Bonzour tou dimoun a lekout. E bonzour tou mon bann koleg Onorab.

(comments off-mic)

MR SPEAKER

Silvouple, i annan en Manm ki'n pran laparol. Nou ava ekout li.

HON KELLY SAMYNADIN

Mr Speaker, le 15 Novanm 2023 Linyon Eropéen ansanm avek son bann leta Manm, ti siny en nouvo lagreman partenarya ansanm avek bann Leta Manm Lafrik, Karaib e *Pacific*. I pou ganny servi koman en lankadreman legal global, avek bi pou ranforsi zot relasyon pou sa prosen 20 an.

Sa nouvo lagreman ki parey in ganny dir, pe ganny rekonnet anba non *Samoa Partnership Agreement*. E i pe siksed lagreman *Cotonou* ki li i ti ganny sinyen an 2000. E i kouver 6 size priyorite e prensip komen pou korperasyon, ki enkli la demokrasi ek drwa imen, krwasans ekonomik soutenab e devlopman.

Devlopman imen ek sosyal, lanvironnman ek sanzman klima, lape ek sekirite ensi ki imigrasyon e mobilite. I enportan pou note ki baze lo sa bann prensip, pou annan fokalizasyon lo bann bezwen spesifik sak rezyon.

Mr Speaker, pou sa lagreman kapab vin anfors Parlman Eropéen pou bezwen donn son konsantman ek ratifikasyon par tou bann parti ki enkli bann Leta Manm Linyon Eropéen ensi ki apepre 2 tyer bann leta Manm *OACPS*.

Ki egzakteman sa ki nou pe al fer ozordi. E ki son laplikasyon provizyonnel pou vin anfors apartir le 1 Zanvyè 2024. Zot pou bezwen konplet zot bann prosedir entern respektif e depoz sa lenstriman ki pe eksprim zot konsantman pou ganny atase avek sa lagreman. Sa 27 Manm Linyon Eropéen e sa 79 pei manm *OACPS* i annan en

reprézantasyon anviron 2 bilyon dimoun ansanm, e pli ski lanmwatye bann syez Nasyon z-Ini.

Avek sa nouvo lagreman bann diferan parti pou pli byen ekipe pou adres imerzan bann bezwen, ensi ki bann defi global tel ki sanzman klima, gouvènanans losean, migrasyon, lasante, lape ek sekirite. Malgre ki sa dokiman i annan 403 paz, i enportan pou note sa ki aplik avek konteks Sesel se parti kot i met lanfaz lo Lafrik ki li i komans lo paz 153.

Mr Speaker, parmi sa 6 size priyorite, mon ti a kontan met en pe lanfaz lo sa laspe devlopman imen e sosyal ki ganny trouve anba Lartik 30. Sa lartik i dir e mon site;

“Bann parti ava travay ver eradikasyon lapovrete, dan tou son bann laform par lannen 2030 an konbatan inegalite. An obtenir legalite bann zanr an krea bann kondisyon pou rann tou dimoun kapab pou zouir zot lavi ek dinyite.

Partisip dan lavi demokratik e fer kontribisyon aktiv anver krwasans ekonomik soutenab. Zot ava favoriz proteksyon sosyal avek en regar lo eradikasyon lapovrete e lager kont bann inegalite. E osi koman en mwayen pou kree en sit *auto-ranforsisman* anver

devlopman enkliziv ekitab e soutenab.

Zot ava investir dan resours imen koman en parti entegral devlopman imen e sosyal. E osi en fason pou ogmant anplwaye abilite bann zenn, avek bi pou ogmant prodiktivite ek lantreprenarya.

Sapit 1 i koz lo devlopman imen e Lartik 31 i met lanfaz lo ledikasyon. E sa seksyon i koz lo lakonplisman ledikasyon enkliziv ekitab e le kalite a tou nivo depi *Petite Enfant* ziska ledikasyon tersyer.

I osi koz lo amelyorasyon aprovizyonman lo kalite ledikasyon formel en si ki laprantisaz non formel. Anmenn korperasyon devlopman *curriculum* e amelyor lenfrastruktir ek lekipman dan bann sant ledikasyon. Sa lartik i osi koz lo komisyon ekspansyon livrezon e aplikasyon lasyans, teknolozi, *maschil...* e matematik mye koni koman *Stem* ek Lar Pou Tou, lo travay pou ranforsi lanrezistremans ek kalite ledikasyon tersyer, formasyon teknik ek vokasyonnel.

Work base ek *adult learning*, konstruksyon en lamas kritik bann travay inovatif e kalifye osi en pep ki otan edike. E pou osi reponn

efektivman anver bann dezwenn ekonomik spesifik.

Finalman anba sa laspe ledikasyon, sa lartik i met lanfaz lo travay ansanm, pou ankouraz rekonesans ek latransparans bann kalifikasyon. E amelyor *quality assurance* ek relevans.

Mr Speaker, lartik 32 i annan pou fer avek lakonplisman e kouvertir lasante iniversel ek akse ekitab a bann Servis Lasante esansyel de kalite ki enkli ranforsisman bann sistenm lasante nasyonal ek fonksyonman bann fasilite swen lasante modern.

I osi koz lo korperasyon ek bann parti pou elimin mantalite ek mobidite materyel, anfantil ek neonatal avek bi pou delivre akse iniversel bann Servis lasante reproduktiv e seksyel.

E osi korperasyon dan lafason ki bann lensidan ek fardo bann maladi non-kominikab i ganny adrese. Sa lartik i osi asiste dan ranforsisman kapasite bann preparasyon dan irzans ek reaksyon pou detekte anpese e reponn a bann lepidemi e lezot menas lasante an prenon en *One Health approach*.

Mr Speaker, anba sa menm tit *human in social development* depi lartik 33

ziska 42 i annan lanfaz lo plizyer size lokalizasyon ki mon pa pou elabor lo la. E ki pou ganny mansyonnen. Tel ki delo, sanitasyon ek lakaz, sekirite alimanter, inegalite ek proteksyon sosyal, travay desan, dimoun avek dezabilite, *sport* ek kiltir, demografik, linegalite bann zanr ek women empowerment e osi lazenes.

I enportan pou note Mr Speaker, ki malgre ki sa dokiman i en dokiman ki annan 403 paz parey in ganny dir e byensir letan ki'n ganny donnen pa ti ase. Me mwan mon'n profite pou mwan *focus* i lir byensir lo en pwen lo en size ki mon santi i adapte avek konteks Sesel e ki vo ganny koz lo la.

So, malgre ki mon pa'n ganny sans pou mwan lir sa dokiman an antye, mon'n profite pou mwan aprofondi mon lekor dan sa dokiman lo en topik ki annan pou fer avek konteks Sesel.

Pou konklir Mr Speaker, mon pou anmenn mon sipor ver ratifikasyon sa lagreman akoz i pe kre loportinite ver en partenarya modern. E pli angaze lo tou nivo ki swa nasyonal, rezyonnal e enternasyonal.

Koman bann akter global, sa lagreman anbisye pou

permet nou pou pli byen pran knot e reakte avek bann nouvo realite ek defi.

Anvi ki se *Espagne* ki annan *la présidence* Konsey Linyon Eropéen, Mon pou termin mon lentervansyon par sit *Mrs Pilar Cansela Rodriguez* Sekreter Deta pou Korperasyon Enternasyonal Rwayonm *Espagne*, ki ti konsiny sa lagreman lo lapar Linyon Eropéen.

I ti dir ki sa “nouvo Lagreman *Samoa* pou ed tou lede kote pou pli byen adres bann defi global ansanm, e pou re anfers korperasyon bi lateral dan en pli gran diverzans laspe tel ki klima, lape ek sekirite dan sa prosen deseni.

I en moman difisil pou aksyon global konzwent ek lapros multilateral. Me sa lagreman i montre ki bann regroupman pei pli larz e divers i kapab agree lo bann letap konkret pou aprofondi zot partenarya ver konstriksyon en lavenir konzwent. Avek sa Mr Speaker, mon pe konfirm mon sipor ver ratifikasyon lagreman partenarya *Samoa*. Mersi.

MR SPEAKER

Mersi. Mersi Onorab, laparol pou Onorab Cosgrow.

HON WALLACE COSGROW

Eskiz mwan Mr Speaker. Ankor enn fwa bonzour Mr Speaker. Bonzour tou Manm Lasanble. E bonzour tou dimoun ki pe ekout nou lo radyo e osi lo televizyon pe regard nou.

Mr Speaker, mon pou komans koumsa en. Ou war sa legzersis ki nou pe fer la bomaten, i en legzanp tipik ki manner respe pou nou Lasanble in perdi si oule.

E mon ava eksplike, ma kalifye sa ki mon'n dir la dan detrwa fraz. Nou annan en Mosyon pou ratifye en lagreman avek Linyon Eropéen, ki ganny prezante avek nou 2 zour avan ki i vin lo *Order Paper*.

En lagreman 400 eke paz ki nou sipoze lir, konpran avan ki nou ratifye. Dayer, i en lagreman politik e ekonomik pou nou pei ki annan lenplikasyon politik e ekonomik pou nou pei.

Ki nou sipoze konpran e fer sir ki ler nou pe ratifye, nou pe pas sa lagreman nou pe fer li avek tou konesans. Pa dan en sapit, pa dan en topik. Me lagreman an zeneral e ki nou konnen kwa ki nou pe donn Sesel ek Lepep Seselwa.

I en lagreman ki *span over* en kantite lannen. Par kont nou annan nou en Mosyon ki ganny met devan Lasanble pou *deal* avek en sityasyon reel ozordi

dan pei, kot bokou nou bann zabitan in ganny afekte me li i pa ganny aksepte pou li vin lo *Order Paper* e pou nou diskite lo la.

So, pou mwan Mr Speaker, avek tou respe, pou mwan mon ler en dimoun i dir sa Lasanble i en Lasanble *rubber stamp* pou mwan en tipik legzanp. Akoz nou vin ek en zafer 140 paz - 2 zour pou gete, apre nou vini. Mon konnen i pou pase. Zot annan en mazorite lot kote, toultan nou'n toultan dir zot annan mazorite zot pou fer pase.

So, i pou pase i senpleman en *rubber stamp of* sa lagreman. Nou'n ganny dir Mr Speaker, parey mon dir pou konsantre lo Mosyon. Me parfwa nou anvi konsantre lo Mosyon me ler i annan lezot keksoz ki tir nou latansyon lo Mosyon, nou bezwen kapab fer pas devan e fer piblik Seselwa konpran.

An di-z-an sa Mr Speaker, mon anvi ki pep Seselwa e tou dimoun ki pe ekoute i konpran tre byen. Sa ki la ki devan nou la, i pa Linyon Eropéen pe fer nou okenn faver or ep donn nou okenn keksoz anba okenn tematik ki nou santi i enportan pou nou lot, lot, lot.

Nou bezwen konpran tre byen ki poudir sa lakor, sa lagreman ki devan nou i en

ekstansyon lentere politik ek ekonomik Linyon Eropéen dan lemond e dan sa ka ki la parmi bann pei Lafrik, Karaib e *Pacific*.

Napa naryen pi naryen ladan. I en lekstansyon zot lentere politik e ekonomik dan sa rezyon ACP. Lafrik, Karaib e *Pacific* kot nou, nou form parti ladan. E ler mon pe lir bann piblikasyon lo *website* Linyon Eropéen, in dir ki zot bann negosyater in pas de lannen, de lannen, de mwan pou kapab fer bann negosyasyon.

So, zot, zot vin avek en *upper hands* si oule. Zot vin avek bann negosyater. Akoz ler zot al negosye avek Lanmerik, negosye ek Lasin, negosye ek bann lezot gro blok zot bezwen bann dimoun kalib, kalifye pou kapab antreprann sa bann negosyasyon. Zot vin ek negosyater zot.

Me eski nou koman ACP, les ACP. Eski nou koman Seselwa nou annan negosyater? Ki al negosye lo lentere dan sa bann negosyasyon. Par egzanp letan nou pe koz sanzman klima, eski nou annan negosyater parey i annan negosyater ki'n ganny *train* pou al negosye dan konferans sanzman klima. Ki partisip *at least* dan lo nivo bann Pti Leta Zil lo negosyasyon sanzman klimatik.

Eski nou annan negosyater ki al negosye par egzant lo kote *Maritime Security, peace and Security*. Eski nou dan en ler nou pe negosye sa bann lagreman, eski nou dan en pozisyon favorab pou nou fer sa negosyasyon avek? Malgre nou ganny dir ki poudir, e la mon pe mazin bann letan lepase kot nou ti ganny dir tou kou nou bezwen al rod *best* pou Sesel. Nou bezwen al fouye, letan nou ti dir pou dir negosyasyon pa fasil, nou ti ganny dir ki nou pa pe ganny best pou Sesel.

Me la ozordi nou tann *tune* i sanze. Nou tann *tune* ki dir Linyon Eropéen i en gro lorganizasyon, i en gro groupman e nou pti Sesel ki nou pti Sesel nou sey rod nou mye me dan lepase pa sa ki ti ganny dir. Pa sa ki ti ganny dir, e i ti ganny dir ki fodre pou pous Linyon Eropéen. E mon espere ki letan zot in negosye sa, zot in pous Linyon Eropéen.

Ler mon get sa en pe sa lagreman li menm, ki i baze lo la parey mon'n dir, i en lagreman politik e ekonomik ki Linyon Eropéen i fer avek bann pei *ACP*. Linyon Eropéen i koz lo zot anvi *foster growth*, savedir krwasans. Zot anvi koz lo rezilyans e osi *natural disaster*. Zot koz lo *peace and security*,

zot koz lo migrasyon ki manner nou *manage migration*.

Democracy, rule of law, human rights e lezot keksoz. Me prezan nou bezwen pran sa Mr Speaker anmenn li dan konteks Sesel. Ler nou koz lo, Linyon Eropéen i annan en *framework* ki deal avek sa bann zafer e *funding*. Linyon Eropéen Mr Speaker, an 2021 i ti ganny estimen ki i enn bann pli gran kontribiter, pli gran kontribiter dan resofman later.

Zis en pti pe plis ki 17 poursan. *Carbon dioxide* ki ganny large dan latmosfer atraver, atraver bann lendistri i sorti dan bann Linyon Eropéen.

Ler nou get son kontribisyon Mr Speaker, anver finansman pou *deal* avek bann *issues* ki annan pou fer avek sanzman klimatik, kan manner zot *deal* ek bann zafer rezilyans. Kan manner nou *deal* avek adaptasyon e mitigrasyon, Linyon Eropéen i vers selman £28.5 bilyon dan bann finansman.

E Sesel li i osi benefisyer atraver sa ki nou apel *GCCA*. I en *framework* ki Linyon Eropéen i met ansanm, pou kapab donn finansman bann pei pou *deal* avek sa menm lemisyon ki li i fer, sanmenm polisyon ki li i fer. E li i rod en

pti larzan i met a kote, i dir ou reste trankil les mwan kontinyen endistriyalize. E mon a donn ou en pti pe zafer pou ou fer en plan pou La Digue met detrwa *rock hammering*. Fer detrwa *study* e la, la mon kontribisyon anver Sesel pou *deal* avek sanzman klimatik.

Napa problemm avek sa Mr Speaker, pa problemm. Mon annan dimoun ki'n form parti ladan. I annan dimoun ki'n enterakte avek sa bann groupman e sa bann fon e menm war proze ki'n ganny fer, napa problemm avek sa.

Me eski, eski sa ki Linyon Eropéen pe fer eski i ase? Eski i ase pou Sesel? Eski i ase pou *ACP countries*? Eski sa ki zot pe fer dan zot bann pei endistriyalize, eski i ase? Domaz reparasyon ki zot pe fer ki zot pe peye dan bann pti pei e bann pei mwen devlope.

Se sa keston ki mon bezwen demande. E eski ler nou al negosye, eski dans a lagreman ki la devan nou. Eski i annan nou'n ganny *the fair deal* or ase pou rekonpans or pou *mitigate* sa bann lefe sanzman klimatik ki Linyon Eropéen li menm ek son bann pei endistriyalize ki pe kontinyen vin ris i fer.

Sorti lo sanzman klima Mr Speaker, i anmenn mwan lo

Sustainable Fisheries Partnership Agreement. Sa i en lagreman ki'n ganny bokou koze lo la. Menm isi dan sa Lasanble, nou ti annan en Onorab, ki ozordi Minis ki'n koz bokou lo la in koze e in menm dir avek Linyon Eropéen tap nou lo kote for serten letan.

In menm dir ki pou dir zot kapab negosye pli byen. E menm mon rapel en letan Mr Speaker Vis Prezidan Afif, Onorab Afif sa letan ti fer en kalkilasyon lo larzan ki Lerop pe gannye avek nou ton. Fer kalkilasyon nou sipoze anmas plis, nou sipoze ganny tan kantite larzan. Me eski keston ankor i antre, so eski dan sa *general agreement* mon konnen *Fisheries Agreement* i separe.

Me selman sa i form parti sa lagreman zeneral ki *EU* i annan avek bann pei *ACP*. Eski nou pe pran kont tousala? Eski nou'n dir tousala?

Eski sa lagreman i fer provizyon pou nou ganny plis letan nou re negosye lakor. Akoz lakor ki nou'n negosye, ki al pou 6 an ozordi nou pe ganny nou €5.3 milyon par lannen. E ladan i dir ou tou ki ou pou fer avek 2.8 i sipoze al ver *fisheries support sector*.

Savedir sa artizanal devlopman ou bann lenfrastruktir lapès. Apre i

annan en lot pti larzan ankor ki al ver bann zafer lanvironnman, kot sa i vin par tonaz. So, eski nou pe ganny atraver sa, sa lagreman ki nou pe diskite ozordi. Eski nou pe ganny sa ki nou sipoze gannyen? Or eski sa ki al negosye ki ti dir i pou fer pli byen, eski i neserman fer pli byen?

Petet i annan en pti *increment* lo tonaz, me sa in toultan *historically* sak fwa nou re negosye i annan en pti *increment*. Me eski in fer sitan pli byen ki i ti sipoze pe fer parey i ti'n dir?

Tousala, nou bezwen met devan Mr Speaker. Akoz i annan komitman ki ti ganny fer. I annan dimoun ki'n ozordi dan Gouvernman, e lepep in *trust* zot baze lo bann komitman ki zot in fer.

Me eski zo tin delivre lo zot komitman Mr Speaker? En lot laspe sa lagreman, se *Maritime Security, peace and security* ki nou i dekoul dan *maritime security*. I annan bokou travay ki'n ganny fer menm pandan letan lepase. Menm avek Gouvernman avan, an sa ki konsern *peace and security* dan nou rezyon Losean Endyen.

Sirtou an sa ki konsern sa bann *threat* piratri ki'n annan. E Linyon Eropéen in en partner. Me la tou resaman, nou'n war

nou'n siny en lagreman Lasanble in ratifye en lagreman avek Linyon Eropéen pou met en prizon Marie-Louise. En prizon kot zot pou al tir tou dimoun partou dan tou bout Losean Endyen, ki pe fer pa bon; ki pe fer tout sort kalite zafer pou vin met dan nou *back yard*.

Kan Linyon Eropéen i annan li en teritwar Outremer. Pa tro lwen avek nou i annan bann zil. Pa tro lwen avek nou, me zot deside vin la e Gouvernman i aksepte e pran, zot ti ratifye sa lagreman Mr Speaker.

So, eski ler nou pe get sa lagreman li menm an zeneral, eski i meyer pou Sesel? Mwan mon pou dir ou Mr Speaker, mon pa ankor kapab fini lir sa lagreman. I en lagreman 400 ekek paz, e mwan mon pa konfortab pou mwan lev mon lanmen pou en lagreman. Mon pa dir nou devret annan en *partnership*, en lagreman koman en blok *ACP* ek Linyon Eropéen.

Me eski mon pa ankor kapab dakor avek mon lekor ki poudir sa ki'n ekrir dan sa *text* akoz mon pa ankor kapab fini lir sa *text*, akoz nou'n ganny li 2 zour pase. Ki sa *is the right deal* pou Sesel e pou *ACP*.

So, avek sa bann rezervasyon Mr Speaker, mwan mon pou parey mon'n dir nou pa pou dir nou pa bezwen en lagreman. Nou pa bezwen form parti en *Framework Agreement*, me mon pa konfortab, mon pa konfidan ki poudir mon'n kapab konpran tou sa ki annan pou fer avek sa lagreman.

E mon swe, mon lapriyer Mr Speaker se ki dan lefitir ler nou annan bann keksoz sitan enportan pou Sesel, Lasanble Nasyonal i bezwen ganny tou respe. Nou pa kapab en dokiman i ganny mete depi le 22 Novanm devan *Cabinet*, i pas le 6. E nou detrwa zour apre nou ganny demande pou nou ratifye. Zot in ganny letan pou zot lir zot, nou, nou bezwen al dan detrwa zour.

Dan 2 zour ase lir en dokiman 400 paz, e aksepte pou nou ratifye. So, Mr Speaker, avek sa mon pou aret la. Me selman parey mon dir mon ti a voudre ki nou enpoz lo Gouvernman ki zot donn sa Lasanble en pe plis respe. Ki swa ler zot *submit* bann Mosyon, bann dokiman pou ratifikasyon ki swa ler i annan en Proklamasyon.

En Proklamasyon *State of Emergency*, nou les nou debat lo la e ki swa i annan en Mosyon prezante par *Leader* Lopozisyon

pou *deal* avek en sityasyon irzan dan pei pou nou kapab *deal* avek sa bann keksoz.

So, avek sa Mr Speaker, mon *rest* la, mon fini avek mon deliberasyon. E mon ava ekout larepons Mr Speaker. Mersi.

MR SPEAKER

Mersi Onorab. Onorab Woodcock, ou annan laparol.

HON WAVEL WOODCOCK

Mersi Mr Speaker. Mr Speaker, mon bezwen riye aköz i kler ki – *anyway*, mwan mon *Vice-Chair of the International Affairs Committee*. E nou'n pase lo sa Lagreman, lo sa dokiman ki nou pe ratifye ozordi. E i enportan note Mr Speaker, poudir Lopozisyon i kler poudir zot pa konnen ki zot pe dir.

Mr Speaker, pa tou sa kat... ki dan sa dokiman - sa 400 paz. Pa tou ki dan sa 400 paz ki aplik pour nou. *EU* i annan Lagreman avek – dan sa Lagreman, *EU* i pe dil avek plizyer rezyon. I pe dil avek rezyon Lafrik, *Caribbean*, *Pacific State*.

I annan bann lartik, i annan bann seksyon dan sa Lagreman ki dil direkteman avek bann pei dan *Pacific*. I annan ki dil avek bann pei dan *Caribbean*. I annan ki aplik direkteman pour bann pei

Lafrik. I annan ki pou aplik pour nou konman bann pei *SIDS* Mr Speaker. Savedir i kler poudir zot pe dir bann keksoz ki zot pa konnen ki zot pe dir Mr Speaker.

An lot mo Mr Speaker, en kestyon ki mon ti a kontan demande atraver ou Mr Speaker se ki; si sa bann kestyon ki Onorab Cosgrow pe demande ozordi - si ler i ti Minis Mr Speaker, i ti demande sa bann kestyon?

MR SPEAKER

Ok.

HON WAVEL WOODCOCK

Par lefe...

MR SPEAKER

Ok, Onorab. Onorab, annou...

HON WAVEL WOODCOCK

Mon pe al fer kler Mr Speaker. Akoz *the Cotonou Agreement*...

MR SPEAKER

Non, non, non. Silvouple.

HON WAVEL WOODCOCK

Mr Speaker, les mwan eksplike.

MR SPEAKER

Silvouple, annou pa al dan rikord Onorab Cosgrow. Ou kapab adres sa ki'n dir ozordi.

HON WAVEL WOODCOCK

Mr Speaker, pou mwan eksplike aköz.

MR SPEAKER

Ou kapab adres sa ki'n dir ozordi.

HON WAVEL WOODCOCK

Wi, mon pou adres sa mwan.

MR SPEAKER

Me selman nou pa pe al revel lepase. Mersi.

HON WAVEL WOODCOCK

The Cotonou Agreement ti ganny sinyen ler *United Seychelles/Parti Lepep/SPPF, whatever* non - mon pa konnen si zot pou sanz ankor, ti o pouvwar. *The Cotonou Agreement* ti ganny sinyen par son Gouvernman. I ti la li.

Sa bann kestyon ki i ti demande - ki i pe demande la, eski i ti demande sa letan? Tou sa bann *issues* ki annan ozordi, eski i ti rode? *Yet* i ti siny *the Cotonou Agreement*.

E Mr Speaker, sa Lagreman ki la ozordi ki nou pe dil avek, ou kapab dir i senpleman en kontinyasyon – *the Samoa Agreement* i en kontinyasyon *of the Cotonou Agreement* pour nou kontinyen benefisyè avek sa ki nou ti

benefisye anba *the previous Agreement*.

Of course, i annan serten sanzman dan konteks. Bann diferan rezyon. Me plizoumwlen lenplimantasyon sa – *the current Agreement*, napa gran diferans avek *the previous one*.

Mr Speaker, mon bezwen dir i malere ki *US* pe fer politik avek maler ki'n arive Providence - sirtou sa leksplozyon, menm si *United Seychelles/SPPF* i annan lyen direk avek propriyeter *CCCL*.

Mon pa pou al ladan Mr Speaker, selman zis mon a demann zot si zot mazin *ALGRAGRESOU?* Se tou. Mon poz sa la. Mr Speaker...

MR SPEAKER

Ale, retourn lo ou Trete.

HON WAVEL WOODCOCK

The Cotonou Agreement, parey plizyer entervenman avan mwan in dir, *the Samoa Partnership Agreement* i pou ranplas *The Cotonou Partnership Agreement*. Ki pou permet kontinyasyon korperasyon ant *EU* avek bann pei Lafrik, bann pei *Caribbean*, bann pei *Pacific States* ki nou apel *OACPS* pour prosen 20 an.

Sa *Cotonou Agreement* parey Onorab *LGB* in elabor lo la, i pou ariv son lafen Desanm sa lannen. E lot Lagreman pou

vin anfors *Samoa* lannen prosen, e devan nou ozordi pou nou ratifye Mr Speaker.

E mon bezwen dir, i annan plizyer largiman lo kwa ki Sesel in benefisye avek sa Lagreman - e *the previous Cotonou Agreement*. E byento *the Samoa Agreement*.

Wi, nou'n gannyen mon kapab dir dan lefase, Sesel konman en pei nou'n gannyen serten sipor avek *EU*. Me dan en sans osi mon kapab dir Mr Speaker poudir nou'n osi perdi.

Mon pa pou neserman zis met tou blanm lo *EU*. Me mon bezwen osi met blanm lo Gouvernman presedan. Akoz bann Lagreman ant Sesel avek *EU*, most sa bann Lagreman in ganny sinyen avan ki sa Gouvernman i vin anfors Mr Speaker.

Savedir bann konplent ki *United Seychelles* pe fer ozordi, i bann konplent ki mon santi poudir bann keksoz ki zot ti merit pe adrese dan lefase ki pa'n ganny adrese. E parfwa Mr Speaker nou'n loter bokou bann dezavantaz ki nou pei pe gannyen ozordi. Mon a eksplik byen Mr Speaker.

Onorab Loze e Onorab Cosgrow in tous lo sa *Fisheries Agreement*. Sirtou kot i konsern eksplwatasyon lapas ton dan nou lanmer. Me ler ou get

vizyon plan Gouvernman lepase, zot pa'n neseserman met lanfaz parey ti ganny mete lo eksplwatasyon sa ki zot in *coined* nou Lekonomi Ble ozordi.

Akoz dan bann letan ki nou pei ti pe fer byen, larzan ti pe antre – nou konman en pei, petet ozordi nou pa ti pou bezwen antre dan en Lagreman avek *EU* lo kote *Fisheries Agreement*, si nou konman en pei dan lepase nou ti'n *invest* dan nou prop *purse seiners*. *What if* konman en pei nou...?

Ok, zot in envestir dan *tankers*. Zot dir in profitab, selman ozordi nou bezwen vann bokou sa bann *tankers* aköz zot in ariv zot laz. Me selman Mr Speaker, *what if* Sesel as en nasyon dan plas fye lo zis *tourism* – lapès nou pe ganny en pe - petet nou ti kapab pe ganny bokou plis ozordi Mr Speaker, si nou ti'n envestir plis dan nou Lekonomi Ble parey in ganny *coined* ozordi Mr Speaker.

E nou ti'n fer *product differentiation*. Nou ti'n eksplwat plis bann resours maritim ki nou annan pou nou ganny plis sa valer azoute avek resours Mr Speaker, ki pe ganny eksplwate dan nou lanmer.

Ozordi, menm nou pe perdi avek *bycatch*. Ozordi nou

ti kapab pe benefisye plis avek bann *bycatch* ki ozordi bann *purse seiners*, bann bato Franse, *L'Espagne* pe lapès lo lanmer ki pe ganny anvoy aletranze.

Nou ti kapab pe benefisye plis avek sa bann keksoz si nou, nou ti annan sa vizyon pou nou *exploit* resours dan nou lanmer. Olye ki bann pei aletranze pe vin eksplwat resours dan nou pei.

E sa i konplent e kontansyon plizyer pei dan larezyon, dan Lafrik, dan *Pacific*. Se ki *EU* ozordi pou en kontansyon se; *how much are we benefiting* ler ou konpar li avek resours ki pe ganny eksplwate dan nou pei? *What's being exploited and what are we getting in return?*

Sa i toultan *the main contention* lo Parlman Lafrik, bann pei Lafrik i konplent. Zot dir bann pei Lerop – *not only Europe*. Bann pei lezot pei dan *Eastern Europe*, bann pei Lazi pe eksplwat bann resours lo kontinan. *Yet how much are we getting back?*

Me ler ou asize ou fer en analiz ou war poudir bann pei Lafrik enkli Sesel, dan lepase nou pa'n *invest* ase dan *research and development*. Nou'n napa sa resours. Nou'n napa sa kapasite. Nou'n napa

sa bann resours imen pour nou kapab eksplwat nou bann resours.

E ki'n arive ozordi, nou'n war sa bann pei ki annan sa mwayen, sa resours, sa *expertise* ki'n fer zot *research and development*. Zot annan sa kapasite pou vin *exploit* nou resours, nou larises. Non selman Sesel, me partou lo Kontinan Lafrik Mr Speaker.

Direksyon ki nou bezwen ale si nou pa anvi war nou bezwen siny bann Lagreman pou ed nou Sesel, *we need to resource – we need to invest in* devlop kapasite nou pei, pour nou kapab *exploit our own resources* pour nou aret ganny eksplwate Mr Speaker.

Until we do that, nou pou toultan war nou par deryer Mr Speaker, e depan lo bann pei Eropeen. E lekel oter sa Mr Speaker? Zot pa'n investir dan sa bann *field* Mr Speaker.

Dan ki zot in investir Mr Speaker? Zot in investir dan zot pos Mr Speaker! Mr Speaker, bi sa Lagreman ki la ozordi – mon'n dakor. Mon 100poursan dakor ki Onorab Loze i dir *yes* lo *geopolitics*. Nou bann pti pei. Nou form parti *SIDS*. Bann *Small Island Development State* parmi plizyer pti pei.

E sa bann pisan zot telman *powerful* Mr Speaker, ki

ennler nou bezwen *consider* en pe Mr Speaker. Akoz si nou pa fer li nou tou nou konnen, taler nou pou war nou lo en *grey list*. Taler nou pou war nou lo en *blacklist*.

e nou depan lo zot pour *grants*. Nou depan lo zot pour *loans*. Pour plizyer bann lenfrastruktir, bann proze ki nou napa kapasite pou nou kapab fer dan nou pei.

E nou bezwen depan en pe lo zot akoz parey mon dir Mr Speaker, nou *still* en pei ki ankor pe devlope. Nou pa ankor ariv lo nivo sa bann pei parey Lerop ki zot annan sa resours, sa finansman, sa pouvwar Mr Speaker.

Me an di-z-an tousala Mr Speaker, i annan bann sipor ki mon bezwen fer resorti ki atraver sa Lagreman nou pou gannyen ki nou bezwen konman en pti pei. Nou bezwen lasistans. Nou bezwen sipor *EU*. Sirtou dan 3 domenn enportan. Onorab Cosgrow in tous lo sa 3 domenn enportan.

Primordyal Mr Speaker se lo kote *peace and security*. Mr Speaker, nou konman en pti pei Sesel zanmen nou pou kapab sirvey nou *EEZ* nou tousel. Lo kote *Marine Security* nou definitivman bezwen *EU*.

EU in ed nou en kantite fason atraver entersepte bann

bato ki pe transport drog dan nou lanmer. In ed nou dan lepase lo kote *human trafficking*. Bann bato ki'n ganny sezi. I annan bato ki ti annan Seselwa lo la. Zot in ede.

Akoz si napa *EU* dan nou lanmer, probableman bann letan ki nou ti pe fer fas avek piratri, bokou plis bato ti pou'n ganny *highjacked* dan nou lanmer.

So, i annan bann sipor ki nou bezwen Mr Speaker, pou sirvey nou lanmer. Non selman nou lanmer, osi nou lakot osi Mr Speaker. Akoz nou pa ti a kontan en zour ki pirat in antre ouswa in ariv lo later Sesel Mr Speaker.

So nou gannyen serten sipor, lasistans avek *EU* ki nou bezwen konman en pti pei. Nou napa swa. Nou bezwen zot sipor. E sa Lagreman i fer provizyon pour sa bann sipor ki *EU* pou donn nou Mr Speaker.

Mon bezwen osi note Mr Speaker, poudir atraver sa Lagreman Lapes ki nou annan, i annan bokou dan sa bann dernyen lannen ki nou'n gannyen avek *EU*, ki nou pa ti pe gannyen avan avek ler Gouvernman *United Seychelles* ti la Mr Speaker. Anba Gouvernman *United Seychelles*, ti annan plizyer Lagreman ki'n ganny siny-en, ki nou pa'n

benefisye preski ditou avek Mr Speaker. Mon a donn ou en legzanp; ozordi dan zis 3 an, annou get lakantite Proze Lapes ki *EU* in *fund* Sesel pou fer partou dan bann distrik otour Sesel Mr Speaker. Enkli Baie Ste Anne, avek Grand Anse, Glacis, North East Point. Mon krwar byento, Anse Aux Pin osi.

So, i annan keksoz ki zot pe donn ou ki avan nou pa ti pe gannyen anba Gouvernman *United Seychelles*. Or Mr Speaker, i annan bann Lagreman ki nou'n sinyen ki menm zot pa ti pe *tap into* e nou pa ti pe ganny finansman.

Zot ti pe tro konsantre - malerezman mon bezwen dir Mr Speaker. Zot pe tro konsantre lo ki mannyer zot kapab gannyen. Olye lo ki mannyer Lepep Seselwa i kapab gannyen benefisye avek sa bann Lagreman Mr Speaker.

(APPLAUSE)

HON WAVEL WOODCOCK

Ozordi – Mr Speaker, get dan 3 an. Fer analiz. Mon a demann Lepep Seselwa ozordi fer analiz Sesel antye. Regarde, al fer resers anba nou Lagreman avek *EU*, lekel Gouvernman - Anba ki letan, anba ki ladministrasyon ki nou pei in benefisye plis avek Lagreman avek *EU*?

Se anba nou Gouvernman dan 3an. Sa ta proze ki pe materyalize lo pei i montre poudir *we are making good use of the Agreement*. Pli byen ki *United Seychelles* ti fer Mr Speaker.

Mr Speaker, mon bezwen dir pou dir, menm si i annan serten konsern, me sa ki nou pou gannyen mon kapab dir, i plis ki sa ki nou pou perdi. Akoz nou bezwen sipor Mr Speaker. Sirtou pour proteksyon nou pei Sesel avek bann pei Linyon Eropéen. Avek sa 2 mo Mr Speaker, mon dir ou mersi.

MR SPEAKER

Mersi Onorab. Eski i annan okenn lot Manm ki pou pran laparol lo sa Trete – bon, lo Mosyon? Onorab Pillay, mon a donn ou laparol?

HON SEBASTIEN PILLAY

Mersi Mr Speaker. Bonn apre midi tou dimoun. E bonn apre midi tou koleg Onorab. Mr Speaker, mon ti krwar mon'n retourn dan 6em Lasanble. E mon ti krwar mon pe tann en *speech* Onorab Woodcock atraver ou, parey dan 6em Lasanble. Akoz tou sa ki in dir, i bann keksoz ki'n repete dan 6em Lasanble.

E i bliye poudir ozordi i dan Gouvernman, e i

responsabilite son Gouvernman pou fer. Si *US* ti mal fer ek bann Lagreman *Cotonou*, i li i pou aranze. Be i pa pe aranze ler i anmenn en Lagreman lo dernyen minit e dir ek Lasanble Nasyonal aprouve sa ki nou'n ganny sans fer travay ki nesese pou ganny fer lo la.

I pa pe aranze ler nou *bypass* tou *Standing Order* pou donn *Leader Zafer* Gouvernman loportinite pou *move* en Mosyon, pou pas sa Lagreman devan Lasanble. Sa ki Lasanble in ganny *droit de regard*. Dan tou pei; Moris sa bann Lagreman i ganny *scrutinized*. Tou pei – dan larezyon sa bann Lagreman i ganny *scrutinize*, a lekspresyon Sesel.

Sesel nou zis vini nou pran li e nou met li. E mwan mon soke Mr Speaker, mon tann koz lo *United Seychelles* i annan lyen avek sa ki annan CCCL. Nou, nou konnen *LDS* i annan lyen ek sa ki *manage* CCCL. Be sa ki nou kapab dir Mr Speaker, sa ki senp, annou fer en *public enquiry*. Tou zafer i a ganny met lo kler!

(APPLAUSE)

HON SEBASTIEN PILLAY

Nou napa naryen pou kasyet. En boug i vin koze. Be *put your money where your mouth is*,

aret zis koze mon frer! Ou zis koze, koze, koze be aksyon ou napa.

Mon donn ou sans pou *vote* lo en Mosyon pou fer *Commission of enquiry*, ou vin koz mwan CCCL. Aret koz mwan CCCL!

MR SPEAKER

Ok. Adres Mosyon. Les Onorab Woodcock trankil. Koze.

HON SEBASTIEN PILLAY

Non, be i enportan pour Lepep Seselwa konpran poudir...

MR SPEAKER

Tourn lo Mosyon Onorab.

(Interruption)

HON SEBASTIEN PILLAY

I enportan pour Lepep Seselwa konpran Mr Speaker ki...

MR SPEAKER

Tourn lo Mosyon.

HON SEBASTIEN PILLAY

United Seychelles – United Seychelles kontrerman avek lepase, pa pou zis asize les okenn dimoun sali li. Nou'n dir met tou keksoz o kler. Met tou keksoz dan gran piblik e nou a konnen ki pe pase.

Se tou ki nou pe dir. E siport mwan lo la - mon a gete

si ou annan konviksyon e si ou annan kouraz, ou a siport mwan lo la. Be mon konnen ou en *coward*, ou pa pou fer li.

(Interruption)

(APPLAUSE)

MR SPEAKER

Onorab!

HON SEBASTIEN PILLAY

Mr Speaker...

MR SPEAKER

Onorab, ou remark pa apropiye! Onorab Pillay, mon pou demann ou *retract*. I pa apropiye pou dir Manm dan sa Lasanble, servi sa bann term kont Manm dan sa Lasanble. Silvouple *retract* e apre ou a kapab prosede lo ou Mosyon.

HON SEBASTIEN PILLAY

Mersi Mr Speaker. Mon pou *retract* Mr Speaker.

MR SPEAKER

Mersi.

HON SEBASTIEN PILLAY

Mon ti devret dir kekfw a i reprezant en *act of cowardice*. Me pa apel li en *coward*. Mon dakor ek ou.

MR SPEAKER

Ok. Ale.

(Interruption)

HON SEBASTIEN PILLAY

Me selman Mr Speaker - Ou pa trakase, Au Cap ou pa pou ganny ankor ou.

(laughter)

HON SEBASTIEN PILLAY

Mr Speaker, mwan ki mon annan pou dir ou se ki ler li in dir pou dir nou – poudir nou, nou pe ranpli nou pos. Ler i dir nou pou dir nou, nou pe ranpli nou pos, ou ti'n devret aret li e dir li koumsa poudir napa okenn Manm lo sa kote latab ki vin ranpli zot pos dan Gouvernman.

Akoz ou, ou konn nou saler. Ou konn egzaktaman ki nou gannyen. Me ou pa'n aret li. Ou'n les li koze. Mon dakor mon napa problem ek sa. In koze, in dir sa ki i annan pou li dir.

Now, si nou santi poudir sa bann dimoun in ranpli zot pos Mr Speaker, pandan letan ki nou ti pe get sa bann Lagreman, *ok*. Be zot al get *Formula 1* ek sa bann dimoun, be pran aksyon. Zot al lo zil ek sa bann dimoun, pran aksyon.

Konmsi aret vin dan Lasanble e fer krwar Seselwa

poudir *US* ki o pouvwar e *US* ki pe *manage* pei. Pa nou ki pe *manage* pei. E atraver Onorab Georges Mr Speaker, atraver ou – Onorab Georges in dir nou li. In met son Mosyon, i pou pase *whether* nou, nou kontan oubyen non.

(Interruption)

HON SEBASTIEN PILLAY

Whether i bon, *whether* i pa bon i pou pase. Zot ki deside ki pou fer. So, se sa nou problem. Mr Speaker, nou bezwen aksepté en keksoz fondamantal. Sa bann Lagreman i reprezant lentere politik e ekonomik Linyon Eropéen.

Depi *Lomé* ziska *Cotonou*, ziska *Samoa*. Pas par *Yaoundé* si oule, in parey. E tousala in sanze baze lo tandans global, e ki mannyer *EU* i enfliyans gouvrenans politik sa bann pei. I annan en lenfliyans direk Mr Speaker.

Annou pran li koumsa Mr Speaker, par egzantp en. *Let's say* mwan mon dir ek *EU* koumsa poudir; be *ok*, be rann mwan tou sa ki Angle in pran dan mon pei depi ler mon'n en Koloni Angle ziska 1976. Rann mwan tou.

I pou *account* plis ki sa ki Angle in donn mwan depi apre mon lendepandans. I pou

account plis. Dir Linyon Eropéen rann mwan tou sa ki zot in pran isi kot nou an relasyon avek nou pwason letan nou pa ti ankor vin en pei endepandan. I pou *account* plis Mr Speaker. E tou pei Lafrik pou dir ou parey.

Ozordi sa ki pe sanze Mr Speaker, se ki dan sa Lagreman – malgre mon pe war sa bann baz natirel ki dan sa Lagreman, Onorab Woodcock in konfirman poudir nou pou kontinyen benefisyé ankor parey. Nou pa pou benefisyé an plis. Nou pa pou benefisyé an mwens. Ki fer ki Lagreman ki *US* ti siny-en ti korek. Be ki zot pe dir nou?

Me selman Seselwa ti ganny vann en promes ki Gouvernman *LDS* pou revwar tou sa bann Lagreman. Gouvernman *LDS* pou re negosye sa bann Lagreman. E Gouvernman *LDS* pou remet sa bann Lagreman lo latap pou fer ki Linyon Eropéen i donn nou plis respe.

Me sa ki nou pe war pa pe arive Mr Speaker. Annou pran legzanp sa bann diferan tematik ki nou pe koz lo la. Mon kontan mon'n tann Onorab Samynadin atraver ou, koz lo sa bann tematik. Me Onorab Samynadin i devret realize ki lamazorite sa bann tematik pa aplikab pour nou, pour le senp

rezon ki *EU* i konsider nou konman en *high-income country*.

(Interruption)

HON SEBASTIEN PILLAY

En *high-income country*! E rezon mon dir sa Mr Speaker! E rezon mon dir sa se aköz *EU* pou entervenir dan sironstans kot en pei i reprezant en difikilte pou li *achieve* bann keksoz ki'n mete dan son *development plan*.

Wi, Sesel pa ankor benefisyé avek *loan* anba *EIB European Investment Bank*, an sa ki konsern *utilities*. Aköz en pei stab i permet touris Linyon Eropéen vin Sesel. E bann biznes Linyon Eropéen ki annan lotel Sesel i kapab fonksyonnen, pou pey *tax* pour Linyon Eropéen Lerop! Nou war sa nou. Nou war sa.

E si avan, Lepep Seselwa in *vote* nou an deor Gouvernman e i dir nou pa'n fer byen. Be aköz Lepep Seselwa ler in *vote* zot e dir zot fer diferan, zot vini zot fer parey nou ti fer?

(laughter)

HON SEBASTIEN PILLAY

Sa ki enteresan. Mr Speaker, mwan mon'n asize mon'n ekout tou dimoun ki'n koze. Mon pa'n fer en sou tapaz. Onorab Larue

pe *disturb* mwan depi taler. Onorab Larue i konn tre byen poudir li menm in benefisye personnelman avek later ki *US* in pran li. So, arete vin *disturb* dimoun dan Lasanble.

(Interruption)

MR SPEAKER

Onorab! *Order!* Onorab Larue, aret pas komanter *off-mic*. Silvouple!

HON FLORY LARUE

(Off-Mic)

Mr Speaker, i napa laprev...

MR SPEAKER

Onorab!

(Interruption)

MR SPEAKER

Onorab, *order please!* Onorab Pillay, silvouple annou *focus* lo size ki la, e nou a kapab avanse. Mersi.

HON SEBASTIEN PILLAY

Mersi Mr Speaker. Mwan i pa mon lentansyon pou fer latak personnel lo personn mwan. Mwan mon pe koze. Si en dimoun i anv i koze i a lev son lanmen. Akoz mon pa pou pran lesan dan moralite avek personn ki li menm i napa en degre moralite mwan. *Ok!?*

MR SPEAKER

Onorab, ziska konmela ou pe lev tou kalite largiman. Mon konnen poudir i annan Manm ki'n dir keksoz. Me ou pe lev tou kalite largiman avek en Manm oubyen avek en lot. *Ok*, zot in dir keksoz. Mon aksepte ki serten keksoz i pe kapab reponn. Me selman, annou sey avanse avek sa Mosyon. Mersi.

HON SEBASTIEN PILLAY

Wi, be *at the same time*, egzers ou...

MR SPEAKER

Mersi.

HON SEBASTIEN PILLAY

Pran respon – *i mean*, egzers kontrol...

MR SPEAKER

Mersi.

HON SEBASTIEN PILLAY

E fer zot aret fer sa bann komanter.

MR SPEAKER

Ok. Silvouple.

HON SEBASTIEN PILLAY

Ok? I enportan. Mr Speaker, mwan mon pe fer kler en keksoz avek Lepep Seselwa. Sa *United Seychelles* ki dan Lasanble, i pa

en *United Seychelles* ki okenn dimoun pou mars lo li e pyetin lo li ankor.

(APPLAUSE)

HON SEBASTIEN PILLAY

I pa pou arive ankor sa. Personn pa pou pil ankor lo nou *United Seychelles* kantmenm zot anvi. E ler mon pe koz lo sa Mr Speaker, i enportan ki anba sa bann diskisyon lo sa Lagreman, nou enn fwa pour tou dil avek sa *myth*. Sa konsep ki nou ti devret kapab annan nou en flotil lapes lo standar Linyon Eropéen.

Mr Speaker, napa en largiman pli mal fonde ki en dimoun i kapab fer. Si i ti'n pran letan pou li konsilte bann eksper ki ozordi pe *manage* lapes anba son Gouvernman ki mwan mon'n fer, i ti ava konpran e i ti ava ganny eksplike ki mannyer i annan lenposibilite dan fer en tel latas pour en pei nou grander.

E sanmenm lamazorite pei nou grander napa en flotil lapes. Napa en pei nou grander ki annan en flotil lapes.

Dezyenmman Mr Speaker, ler nou koz lo lenvestisman ki Gouvernman in fer avek led Linyon Eropéen. Be nou bezwen admet ki bann *tankers* in profitab aköz se zot Prezidan ki

ozordi in sant leloz 200 ekek milyon profi ki *SEYPEC* in fer. So, fodre nou arete atak sa bann keksoz.

Me si nou le bouz devan e nou le avans keksoz devan, nou bezwen regarde anba sa bann tematik, kwa ki Linyon Eropéen i devret kapab donn nou an plis ki sa ki i pe donn nou. Sa i devret pwen kardinal ki Lasanble i devret pe fokaliz lo la, ki nou pa'n ganny sans eksplere.

Par egzanzp; *peace and security*. Mon dakor ki Linyon Eropéen i donn nou sipor. Mon pa kont. Mon siporte sipor Linyon Eropéen. Nou bezwen sipor Linyon Eropéen. Nou pa kapab fer lapolis otour nou lanmer. Mon dakor ek sa.

Be mon konsernen ler Linyon Eropéen i vire i dir ek mwan poudir i le mon fer *judicial finish, legal finish* lo prizonnyen ki i tyonbo dan lanmer. Mon konsernen aköz mon santi poudir i pou met en presyon e en resours lo mwan ki mon pa krwar Linyon Eropéen prenan kont son birokrasi, pou kapab asiste mwan avek dan moman ki mon bezwen lasistans.

Se pour sa rezon ki mon konsernen avek sa desizyon. E lenpak stabilite nou pei ki si enn sa bann dimoun ki *high*

profile ki annan mwayen, i kapab kree en stabilite dan nou pei. So, mon bezwen konsernen avek sa Mr Speaker.

E mon santi poudir si Linyon Eropéen ti oule ed nou, nou ti an kapab konmans avek serten konponan *legal finish*. Me pa tou. Pa tou. Pa enpoz tou lo nou. E i enpoz tou lo nou zis avan nou ganny *blacklisted*. I fer nou konpran byen li. Ou pa dakor ek mwan, mon *blacklist* ou.

Dezyenman dan domenn ledikasyon Mr Speaker. I vre ki Sesel in ariv lo nivo en *high-income country*. I vre ki nou pa benefisyé parey nou ti benefisyé avan avek bann labours pour nou bann etidyan al etidye aletranze.

E sa i en pe partou. Menm anba par egzantp *AusAID* kot bokou etidyan Seselwa in al etidye Ostrali. Menm anba bann *UK Chevening Scholarships*. Tousala in egziste bann problem.

Me mon pa santi ki Linyon Eropéen pe realize ki nou dan en moman devlopman dan nou pei, ki nou bezwen bann devlopman adisyonnèl dan nou kapasite resours imen pou kapab kontiny-en fer avanse nou pei.

E la par egzantp Mr Speaker, bann *areas* parey

zesyon waste - waste to energy, ki Linyon Eropéen i annan bann baz serye lo la. Par egzantp, *La Belgique, La Suède*, kot nou kapab ganny sipor.

Me toultan ler nou fer lekspresyon sipor, i bezwen vin lo en kolektiv konman en group, *rather than* lo en Lagreman Bilateral ant Linyon Eropéen e Sesel. Se sa en landrwa ki mon santi nou devret kapab pe benefisyé.

Me lafason ki keksoz i ganny fer, i ganny fer lo baz bann groupman. Par egzantp, i a ganny fer lo nivo groupman *sub-Saharan*. Olye ganny fer lo en baz pei spesifik akòz nou konteks pa parey tou lezot pei dan *sub-Saharan Africa*. I posib ki nou pou kapab bouz avek sa bokou pli vit ki lezot pei.

En lot eleman enportan Mr Speaker, se sa ki konsern sanzman klima. Ler nou regard provizyon sa Lagreman, i pa sanz preski naryen an sa ki konsern sanzman klima. I pa remet lanfaz ki Linyon Eropéen i devret mete lo son prop rol pou kree sanzman klima.

Revolisyon endistriyel an Lerop Mr Speaker, i kapab *account* pour lamazorite problem klimatik ki'n ganny kree depi son lenstans. Me selman ki nou vwar?

Nou *still* vwar en *reliance* pou fer ki bann pei parey nou ki le anmenn demokratizasyon lenerzi renouvlab. Sa i reste ankore ser pou nou kapab fer li. E alors nou sel opsyon se al ver bann lezot partener. Ki swa Lasin. Ki swa bann pei Mwayenn Oriyan. Sa ti ava en landrwa kot nou devret pe regard lo ki mannyer nou ganny sipor adisyonnèl.

Prezan annou vin dan sa *FAME EU Sectorial Program* pour Lapes. Mr Speaker, i enportan pour Seselwa konmans konpran ki *the more inputs* ki nou mete dan lapas – plis bazar, plis bato, i fer ki ou lapas plis pwason. E ou *deplete* ou stok pwason bokou pli vit.

E sa zafer ankouraze ki nou'n fer sitan kantite bazar. Mr Speaker mon dakor, wi. Be i annan bazar ozordi ki bann moniman. Par egzantp dan distrik Glacis mon pa ankore war en pwason ganny vann lo sa bazar. Sa napa naryen pou fer ek politik. I annan pou fer avek lafason ki nou servi resours.

E mon apresye – mon apresye ki i annan serten zefor ki'n ganny fer pou protez serten lespes *demersal species*, par egzantp bourzwa. Akoz larealite Mr Speaker se ki byento i pou annan en letan kot bourzwa

pou zis dan portre pour en Seselwa.

So, i pou annan en lenpak lo nou, ki nou bezwen realize ki mannyer nou anmenn en zefor pli kontinyel lo ki mannyer nou protez sa laspe nou bann resours. Me pour nou protez sa, fodre nou kapab ganny plis ek lezot resours ki nou annan.

E se la kot mon santi poudir sa *over subsidization* ki *EU* i annan dan lapas, i pe touy lezot posibilite pour Sesel regard okenn lezot partener. E si menm nou seye, nou likou i ganny koupe. Sanksyon *blacklist - you name it, OECD* i vin en kou.

Se pour sa rezon ki nou pe dir ki malgre sa lagreman, nou napa problem kont en Lagreman *EU* ki pou anmenn benefis pour pei. I pa sa nou *issue*. Me nou pa santi ki nou'n ganny ase letan pour nou tret sa Lagreman. 2 zour i pa ase.

Annefe Mr Speaker, i enportan met lo rikord ki si mon pa ti demann sa Lagreman dan *ABC*, nou pa ti pou gannyen sa Lagreman.

(Interruption)

HON SEBASTIEN PILLAY

Sa Lagreman pa ti'n ganny partaze avek nou, ziska ler ki nou konnen.

(Interruption)

MR SPEAKER

Order please! Ok.

HON SEBASTIEN PILLAY

Mersi Mr Speaker. Mon pwennvi i se ki si Gouvernman ti konnen sa Lagreman pe vini depi le 6 Desanm, akoz ki sa pa ti ganny anvoye kot Lasanble Nasyonal pour nou konmans prepar nou travay lo la, menm si nou ti pe konsider Bidze.

Annou regard dokiman ki nou'n gannyen Mr Speaker e ki sa dokiman i dir. Sa dokiman i en *memorandum* ki'n al kot *Cabinet* le 22 Novanm 2023. E le 22 Novanm 2023 in ganny *submitted for Cabinet meeting of the 6th of December*.

Le 22 Novanm, Departman *Foreign Affairs* i konnen poudir sa Lagreman pe al kot *Cabinet*. Be akoz le 22 Novanm nou pa ti ganny sa Lagreman? *Cabinet* ti ava aprouve apre nou ti a fer nou desizyon lo la. Be nou ti avan ganny li e prepar nou lo la. Eski *Cabinet* – eski *Cabinet* pa ti pou aprouv sa Lagreman *EU*?

Mr Speaker, yer Onorab Georges ti dir ek nou koumsa

poudir li ki pe deside ki pou fer, zot ki deside – ou napa problem, ou deside mannyer ou pou fer ou. Ou kouto nou lavyann. Ou deside mannyer ou pou fer. Me selman nou pou kontiny-en dir ou, akoz i nou responsabilite *to keep the Government in check*.

Mr Speaker, sa i anmenn mwan lo mon pwen final an sa ki konsern sa bann Lagreman avek *EU*. E la mon koz lo sa size *transfer pricing*. Enn bann eleman enportan pour nou konman Seselwa, se pour nou regarde si nou bann Lendistri pe pey nou sa ki zot pe pey nou.

Ok. Nou'n argimante poudir an sa ki konsern lapes, Lagreman i donn nou bann ogmantasyon. Be nou pa santi nou pe ganny plis lo la. Sa i ava en demars ki Minis Ferrari li i bezwen fer, akoz se li ki'n donn en *commitment* Lepep Seselwa ki i pou fer. E 2025 nou pou fer li *accountable* pour sa *commitment* ki i ti fer.

Me lo en lot kote i annan en lot *commitment* ki nou'n gannyen avek *EU*. E sa se sipor pou nou dil avek *transfer pricing*. Lamazorite bann gran lotel dan Sesel ozordi Mr Speaker, i pey bann *management fees* an deor Sesel.

E i mon konviksyon e konviksyon bokou dimoun – e

menm bann eksper dan Finans ki'n dir nou dan sa Lasanble, ki en kantite larzan ki sipoze antre dan nou pei pa pe antre atraver sa. E Gouvernman pe fer mezir, pe rod tou fason pou dil avek sa pou met an plas mezir pou *counter transfer pricing*.

Transfer Pricing pa fek konmanse ozordi. I pe arive pandan plizyer lannen. Me, lefe ki *Cotonou Agreement* ti'n fini e ki nou pe al apros pour *Samoa*, ti ava byen ki safwasi nou ganny en *commitment firm* lo lapar Linyon Eropéen, ki li i pou fer, an sa ki konsern bann teritwar Eropéen ki pe ed bann konpanyen kasyet zot bann byen ki zot drwa bann pei kot zot devret pe *pey tax*.

Par egzanz; bann landrwa parey *Luxembourg, Liechtenstein*. Tou sa bann landrwa ki annan bann *Offshore Centres* ki Linyon Eropéen i konnen li. Me ki li i dir ou kad regilatwar pa en problem akoz li Linyon Eropéen i annan pouvwar e i annan lespas dan son abilite pou *enforce* bann mezir pour li kapab gete ki pe pase.

Mon dakor. Me sa bann konpanyen ki anrezistre *Cyprus* ki annan lotel partou dan lemonn, eski ou pe ed sa bann pei pou *recoup* sa bann

larzan ki *owe* tou sa bann lotel, ki *owe* tou sa bann pei?

Alors Mr Speaker, se sa bann baz ki nou ti le vin fer sa deba dan Lasanble. E malgre ki nou'n sey konplent, nou'n sey met nou konsern devan – nou, nou pa kapab - i paret, konvenk *leadership* Lasanble. Ki a en moman donner, Gouvernman pa kapab anvoy nenport – zis anvoy tou keksoz, e nou, nou aksepte.

Nou pa kapab konvenk *leadership*. Nou bezwen zis aksepte ki *leadership* i oule. *And that's a problem* pour nou Lasanble. Mon bezwen dir Mr Speaker, *it's the elephant in the room*. Sa enn Mosyon pa vin 2 zour. Ni menm 2 zour i napa. Me li, i kapab sot sa 10 zour ki ganny demande pour li kapab aparet lo *Order Paper*. I kapab vin lo en deba.

Mon Mosyon ki annan pou fer ek en Komisyon lanket parey Onorab Woodcock ti a kontan war, atraver ou Mr Speaker, pou nou koz lo bann *owners CCCL* - bann ki benefisyé, mon Mosyon pa kapab pase. E sa alors mon bezwen reste trankil e pa koz lo la? Mon bezwen koz lo la akoz i en prosedir ki nou pe swiv.

Mr Speaker, i reste pour mwan dir avek Linyon Eropéen; nou, nou an faver tou Lagreman

Korperasyon. Be korperasyon i bezwen lo en baz benefis mityel kot tou lede parti i benefisye dan en fason ekitab. Me pa ki en lot parti i servi bann lezot mezir pou *strongarm* en lot pou fer serten keksoz ki sa enn i anvi.

E nou konsidere poudir *this has been going on for too long*. E se pour sa rezon ki nou ti'n devret annan plis letan pou regard sa Lagreman. Mersi Mr Speaker.

MR SPEAKER

Mersi Onorab. Bon, nou'n depas nou letan en pe. Nou ava pran poz la e nou a rebran Lasanble 2er pour nou kontinyen. E nou a pran repons lo deba par *mover* Mosyon. Mersi.

(BREAK)

MR SPEAKER

Bonn apre midi tou dimoun Manm, zofisye e nou piblik, nou a kontinyen. Mon a donn laparol Onorab Georges pour son repons lo deba, lo son Mosyon.

HON BERNARD GEORGES

Mersi Mr Speaker. Bonn apre midi Mr Speaker, bonn apre midi tou bann koleg Onorab e

tou dimoun ki pe swiv nou dan lakour.

Mr Speaker, parey koutim i anvi, mon remersye tou bann dimoun ki'n koz lo sa Mosyon. In annan bann, bann deba enteresan. Mon partaz bokou lopinyon ki'n ganny resorti lo tou lede kote latab.

Parey mon ti'n dir o komansman sa bann Trete i toultan anmenn en bon pe benefis. Me i vin osi avek son, son bann problem e sa bann problem in byen ganny fer resorti ozordi.

Me lefe i reste ki nou koman en Lasanble, parey tou bann Lasanble avan nou, nou ratifikasyon i dan dernyen bout sa masin sosis, ki bann *agreement* i bezwen pas ladan.

Parey tou dimoun i konnen, en *International Instrument*, premyerman i bezwen ganny negosye, apre i bezwen ganny sinyen, apre i bezwen pas devan *Cabinet*, e ler tousala in fini, se la ki i vin devan nou pour nou ratifye.

E ratifikasyon se enn bann mezir ki Lasanble i annan pour vin en *check* ek en balans lo pouvwar Legzekitiv. Pa nou ki'n envante, i dan nou Konstitisyon e se sa Konstitisyon ki'n ganny aplike depi 1993.

Mwan mon'n isi dan sa Lasanble, byento pour sote 20 an. E mon'n asiz isi lo tou lede kote latab ler en kantite *International Instruments*, ti'n vin devan nou pour ratifye.

E mon pa'n vwar enn! Enn! Ki nou'n amande. Akoz, pa kapab amande. I tro tar pour nou amande. Amannman ou fer *right at the start* ler ou ankor pe negosye. E nou – zot konnen sa. E nou osi nou konnen sa.

E mon pa konnen akoz nou'n pas letan pour dir sa pa byen, sa pa byen *whatever*. Byen pa byen, kontan pa kontan, sel keksoz ki nou, nou kapab fer isi se dir nou pa pe ratifye. *One thing*.

Nou pa kapab amande, nou pa kapab kas kontour, nou pa kapab reanvoye, nou pa kapab dir ek Gouvernman re al negosye, nou pa kapab fer okenn keksoz. Sel keksoz nou kapab dir se, nou pa kontan me selman ki ou a fer. I annan benefis nou pour ratifye, oubyen nou pa kontan napa benefis, nou pa pe ratifye. Setou ki Lasanble i bezwen fer.

Donk Mr Speaker, tou sa bann koze otour sa i pa byen, sa i pa – *waste of time*. Nou pa kapab fer nanryen lala, sa ki nou Lasanble nou'n ganny mandate pour fer.

E mon ti a kontan dan sa konteks, Mr Speaker. remersye tou partikilyerman *International Affairs Committee* nou Lasanble. Pour en travay remarkab ki zot in fer dan en tre kourt letan. E mon ava fer Lepep Seselwa rapel, ki se pa zis Manm LDS ki asize lo sa *International Affairs Committee*, i annan osi Manm US.

E mon remersiman pa vin zis lo nou kote, me pour zot osi. Akoz zot osi zot in travay, zot in prodwi en rapor ki'n ed nou, ki'n ed tou Manm isi, pour kapab *grasp* sa Trete dan en kourt dele letan e fer en deba lo la.

Alor Onorab William, *Chair IAC* ek tou bann Manm *IAC well done!* Mersi bokou pour sa travay, ki zot in fer.

(APPLAUSE)

HON BERNARD GEORGES

E apard Onorab William mon ti a kontan *single out* de dimoun bomaten Mr - de dimoun ki'n koze lo sa Mosyon bomaten.

E sa se Onorab Phillip Arissol ek Onorab Kelly Samynadin. Zot in travay lo zot lentervansyon, zot in etidye sa ki annan dan sa dan sa Trete e zot in vini e zot in fer en lentervansyon balanse e

entelizan. *Well done*, sa de Manm!

(APPLAUSE)

HON BERNARD GEORGES

Mr Speaker. Enn bann largiman ki mon'n tande se, *Oh!* 403 paz mannyer nou kapab – ki mannyer nou kapab fer zistis avek 403 paz. Parey in ganny dir, 403 paz i en *fake*. Se zis bann dimoun ki pa'n lir ki'n vwar 403 paz.

Annefe! Annefe! Akoz mwan mon'n lir sa. E nenport ki dimoun ki ti anvi lir sa, i ti'n fer parey mwan, zot ti pou'n pran apepre 1erdtan, 1erdtan edmi pour zot lir sa Trete e konpran egzakteman sa ki annan ladan.

Me parey mon'n dir zansla i pares. Zot pa travay e zis zot vin kritike. Mon a dir zot konbyen paz i annan Mr Speaker. Premye 14 paz i zis en lalis bann pei Linyon Eropeen ek bann pei Afriken ek *ACP* ki'n sinyen. 14 paz tire.

Trete li menm li i fini paz 151, 151 i zis dir ki en lalis bann langaz ki sa, lalang ki sa Trete i ladan. Donk i annan 150 paz *minus* 14 i reste 136 paz. Larestan se bann protokol parey in ganny dir, en protokol pour Lafrik, en protokol pour *Caraibe*, en protokol pour *Pacific*.

Okenn dimoun ki ti'n lir sa ti ava vwar egzakteman kote *focus* i devret vini. E *focus* menm lo sa 136 paz, zot ti a kapab fer en analiz entelizan an regardan zis en lartik.

E sa se lartik 1(3) kot i dekrir sa 6 pilye ki Manm in koz lo la bomaten. Akoz efektifman, sa Trete i annan 6 pilye ki i baze lo la. E i enportan Mr Speaker pour nou dir sa akoz sa 6 pilye, se 6 pilye ki ede dan devlopman nou lemonn.

Ou vwar nou kapab kritik Linyon Eropeen, mannyer nou anvi. E mwan, mwan mon enn bann pli gran kritik ler i ariv lo kote lapas avek lilizasyon *FAD*.

E zot tou zot konnen isi dan sa Lasanble e avek mon bann responsabilite, lo *Island Conservation Society*, avek lo *SIF*.

Mon fer li mon devwar, mon fer li mon devwar pour lager menm kont Minis Lapes isi, e i konn sa tre byen lo size lilizasyon *FAD*, par bann bato lapas.

Akoz de keksoz. Akoz premyerman ler zot drive, e zot tonm lo resif, zot fer polisyon, zot kas resif, napa kantite domaz ki zot fer.

Me pli enportan kekfwa se ki ler ou annan *FAD*, son non i dir ou *Fish Aggregating Device*, bann pwason ki pa ankor ariv

laz pour zot ganny atrape dan file i vin o bor sa *FAD*, e nou pe pran pwason ki anba son groser *optimum*.

E sa se bann keksoz ki mon pa kontan - be ki mon pour fer mon pour dir avek Gouvernman – *sorry*, akoz mon pa kontan *FAD*, sa Trete pa kapab ganny aksepte'. Non Mr Speaker! Akoz sa Trete si nou regard *clause* – Lartik 1 *sub* lartik 3, i donn 6 lobzektif sa *agreement*. "*Promote and protect and fulfil human rights democratic principle the rule of law and good governance*", sa se premye.

Tou bann dimoun ki siny sa *agreements*, i bezwen *adhere to those principles* e sa se absoliman enportan. Linyon Eropeen pa pe zis pran nou stok pwason Mr Speaker. Me Linyon Eropeen ler i pe donn nou led i pe sey fer Lafrik, *Caraibe* avek *Pacific* monte e vin demokratik parey Lerop i ete.

Sa set enn bann *quid pro quo* ki nou bezwen. Nou pa kontan akoz nou pa kontan dimoun vin dir nou ki pour fer, akoz nou, nou met kot nou *neocolonialist* eksetera. *Fake news!* Sa ki sa *European Union* pe fer kontan pa kontan se ki i pe lev standar, i pe sey elev nivo devlopman. Sirtou lo kote drwa imen, sa bann pei.

Dezyenmman i pour retourn nou Drwa Imen dan en – *'build peaceful resilient states, foster human and human and social development, mobilize investment, combat climate change. Combat climate change.'* What is there, ki nou pa kontan avek *'combat climate change'* dan en Trete. Ki pe dir nou, nou ava donn zot sipor, me an retour nou anvi ki nou tou nou travay ansanm pour konbat sanzman klima?

Mon'n dir mon pour retourn lo *human rights* Mr Speaker. Mon a dir zot en keksoz, ou vwar, avan sa *Samoa Agreement*, parey in ganny dir ti annan *Cotonou*, avan *Cotonou* ti annan Lomé.

Nou Gouvernman *LDS*, fek vin o pouvwar an 2020. Lekel ki ti ratifye *Cotonou*? Lekel Lasanble – lekel Lasanble ki ti ratifye *Cotonou*? Lekel ki ti mazoriter dan Lasanble? Lekel ki ti ratifye *Lomé*? Lekel ki ti mazoriter dan Lasanble sa lepok?

Ou vwar Mr Speaker, annan de fwa nou bezwen, regarde kote nou sorti. Sa Lasanble pa fek komanse depi 2020 li, i al depi avan. Si zot, zot pa'n kapab amann sa de *agreements* akfer ki zot anvi ki nou, nou pa kontan in amann sa enn?

E les mwan demann zot en kestyon. Ki kantite *agreement* ki'n vin devan zot ki zot in fer retournen? Ki kantite, ratifikasyon ki zot in dir non, dan sa 43 an ki zot o pouvwar. Ale pa tir 43 an – 43 an dan sa 30 an ki depi sa Lasanble pe egziste. Kantite ki zot in fer tournen?

Mr Speaker-Mr Speaker, mon ava dir zot, *human rights is at the core*. Konnen ki ti arive? E ou konnen akoz sa bann *treaty* koumsa i enportan?

De ou trwa mwan pase, mon ti *Malta* koman Sef Delegasyon, *Parliamentarians for Global Action*, lo en size *LGBTIQ Plus*, e enn bann keksoz enportan; enn bann size enportan ki ti pe sorti dan sa konferans sete ki *Uganda*, ki en pei *ACP - Uganda* ti'n fek pas en Lalwa poudir ki bann aksyon omoseksyel, e bann omoseksyel zot menm, zot kapab ganny arete e met dan prizon akoz zot omoseksyel. E si zot fer en akt omoseksyel, zot kapab menm ganny lavi prizon, oubyen *even the death penalty* dan serten ka.

Avek sa *agreement*, zot in sinyen sa zot. Konnen ki pour arive ek sa *agreement* Mr Speaker? Mon ava dir zot, akoz mwan mon ti la ler sa enn deside.

Komisyoner Linyon Eropéen in dir, *Uganda* in siny *Samoa*, anba *Samoa* zot bezwen protez drwa imen *Uganda*, e nou Linyon Eropéen, nou ava met presyon lo zot kapab ranvers sa Lalwa ki zot in fer.

That's the beauty of bann keksoz koumsa Mr Speaker. Kot bann *Uganda* pa kapab lager, zot menm *at least* Linyon Eropéen pour vin lager pour zot.

Nou pa kapab regard keksoz, zis nou gannyen nou bezwen annan de fwa regarde ki mannyer nou kapab ganny benefis avek sa bann – avek sa bann dimoun.

E mon ava dir zot Mr Speaker, akoz zot bezwen konnen. An parlan *Uganda*, mwan, mwan mon ti al *Uganda* ler mon ti en zenn Parlmanter.

Dan bann lannen 2002, 2003, 2004. Mon ti en zenn parlmanter, mon'n al *Uganda* avek – anfen mon pa rapel si sete la me mon'n Al *Uganda* lo size *International Criminal Court*. Lasanble ki'n anvoy mwan.

Akoz? Akoz nou pa ti'n siny, Sesel pa ti'n ratifye *International Criminal Court* i pa ti'n ratifye *Statute of Rome*, pour etablir *International Criminal Court*. E ou konnen ki'n arive?

Linyon Eropeen pandan zot Gouvernman. Linyon Eropeen ti'n mete dan tou zot *Loan Agreement* avek Linyon Eropeen en *clause* ki dir, "si ou pa ratifye *Statute of Rome* ou pa pe ganny larzan avek nou".

E ler mon ti *Uganda*, o moman ki mon ti pe al dir, Sesel i bezwen ratifye, en *text* i tonbe lo mon telefonn, Sesel ti'n fini ratifye. E, eski i en move keksoz sa? Ozordi eski nou konplent? Eski nou pa *proud* ki nou'n siny *Statute of Rome* pour *International Criminal Court*?

Alor mon bann zanmi avan ki nou, avan ki nou al dan tou sord demagozi. Annou mazinez benefis, annou mazinez ki bann Gouvernman presedan i fer avan ki nou vin montre ledwa avek sa enn poudir in annan en mankman.

E lo sa pwen Mr Speaker, les mwan vin lo sa size, letan. *Ah!* Pa'n ganny letan. *Wi of course* nou pa'n ganny letan, *of course* nou pa'n ganny - *of course* nou pa'n ganny letan. Mon – mon fek ganny dir la anefe ki *Uganda* pa ankor siny sa *agreement*. Me in siny *Cotonou*, in siny *Lomé* avan alor i ankor *still bind*.

Anyway, passons - time. Pa'n ganny ase letan, pa'n ganny ase letan pour lir. Premye keksoz ki mon ti dir

bomaten ler mon'n ouver deba lo sa Mosyon, sete pour prezant leskiz ki nou pa'n ganny letan, ki nou ti a swete pour nou kapab fer en letid pli aprofondir lo sa Trete.

Me Mr Speaker, nou bezwen regard keksoz dan konteks. Dokiman in ganny sinyen le 15 Novanm, *Samoa* le 22 i ganny anvoy devan *Cabinet*. *Cabinet* nou, nou pa kapab ratifye en *agreement* tan ki *Cabinet* pa'n aksepte.

Si *Cabinet* pa'n aksepte sa *agreement, that's the end of it*, i pa anvoy kot nou pour ratifye. Nou, nou pa kapab al rod en *agreement* laba anler kot li, dir e ou'n siny *agreement* anmenn kot nou pour ratifye. Non pa koumsa ki marse.

E le 6, le 6 Desanm ki ti en Merkredi, parey tou bann Gouvernman *including* sa ki pour zot, Merkredi i annan *Cabinet*. E ler *Cabinet* Merkredi in aksepte pour anvoy sa isi pour ratifye, zot anvoy *Cabinet* i pas tou lazournen zot anvoy sa kot Lasanble, apre *Cabinet* 4er apre midi le 6.

Mon pa konnen si zot rapel, me le 6 aswar Mr Speaker, ti annan en bann deboukir dan nor. Bel Ombre Beau Vallon, Glacis. E le 7 granmaten, kekfwazot pa'n tande ti annan en leksplozyon

CCCL, ki'n *shut down* pei konpletman.

Alor, alor ki ti pour arive? Ou avek Madanm Clerk le 7 bomaten zot ti pour dir, in ariv en kalamite, pei i an dey, sekour pe ganny anmennen. Me solman nou premye priyorite se fer *US*, fer Manm *US* Lasanble ganny en kopi sa ratifikasyon akoz zot, zot bezwen pas zot letan pour lir.

Si zot, zot ti anvi – ou vwar se sa ki'n arive Mr - ou konpran – ou konpran! Ou vwar ki mannyer nou fristre avek lafason ki zot fer. Zot bliye, zot bliye ki sa *weekend*, kekfwa zot, zot ti pour asiz kot zot dan *air conditioned* pe lir en Trete.

Nou, Nou ti lo teren pe anmenn sekour pour dimoun.

(APPLAUSE)

HON BERNARD GEORGES

E la! E la ziska nou pe koze la ozordi Onorab Monthy pa la, akoz li ek Prezidan zot lo teren, pe anmenn sekour pour dimoun.

Mr Speaker, nou bezwen pran priyorite, pa dir dan en *weekend*, kan dan en *weekend*. (*Anyway*, mwan mon pa'n war okenn zot dan distrik mwan. Mwan mon'n war mon lekor dan distrik.)

Dan en *weekend* kot nou ti pe travay, zot, zot sel konplent se nou pa'n ganny sa Trete pour nou kapab fer en bon letid. *Seriously* Mr Speaker! Kote nou pe ale avek sa bann zafer?

Alor, alor annou regard en pe benefis ki nou pe gannyen. Tou sa bann – tou sa bann gro koze Mr Speaker, tou sa bann gro koze ki'n ganny koze bomaten. Ki *US* in fer avek larzan *EU*, pandan sa bann lannen? Zot in koz, zot in koz labous plen, kont Onorab Ferrari ki li in kritik sa *agreement* ler i ti la.

E avek zis e rezon. Konnen akoz in kritike Mr Speaker? Akoz ek tou sa bann larzan ki dan domenn lapas ki nou'n gannyen avek *European Union*, 43 an *US* in kapab fer zis 2 bazar dan pei antye.

Onorab Ferrari, Minis Ferrari, Jean-Francois Ferrari depi ler in vini. Get Por Lapas ek bazar ki'n fer avek larzan *EU*. In menm, in menm kapab kot zot, zot pa ti fer, in menm kapab anvoy - (mon konnen zot pa kontan ki mon pe koze. Kontan pa kontan mon pour koze)

In menm kapab, in menm kapab anvoy *Saya De Malha* trwazyenm fwa, pour al anmas *FAD*, ki bann bato *EU* i pe zete partou avek larzan Linyon

Eropeen. Nou bezwen Mr Speaker, dir keksoz mannyer i ete. E donk mwan Mr Speaker, e lo sa kote latib nou konnen, nou konnen akoz ki nou pe al, ki nou pe al siport sa Mosyon.

Lo zot kote latib i annan en dimoun, ki'n koz en bon parol. E sa se Onorab Aglae. Granmaten Onorab Aglae in pran laparol, e Onorab Aglae in dir e i en keksoz ki mon *full dakor* avek li. *We need to build relationships.* Absoliman vre Onorab Aglae, *well done* mon siport ou san pour san.

(APPLAUSE)

HON BERNARD GEORGES

We need to build regional; we need to build bilateral, we need to build multi-lateral relationship, sete egzaktaman sa ki sa Mosyon pe fer.

Vwar Mr Speaker, mon riye annan de fwa ler mon tann, bann Manm US dir napa respe pour nou Lasanble. E mwan mon anvi dir en keksoz la e mon anvi zot konpran mwan tre kler.

Mon pa pe koz lo personn sa se en, sa se en parol. Si ou annan en pti fanm deor Mr Speaker, pa koz lo moralite. Mon pa pe dir ki i annan okenn dimoun ki annan, mon pe zis dir. Ler ou annan en pti fanm

deor en legzanp, pa koz lo moralite.

Ou vwar Mr Speaker, mon ti konnen, mon ti konnen sa bann parol, mon ti konnen i pour reponn. (Pa traka, pa traka espere ou). Ou konnen akoz mon'n dir sa Mr Speaker, akoz ler nou ganny dir nou napa respe pour Lasanble, akoz nou anvoy Gouvernman i anvoy en Trete de zour avan, pour Lasanble pa kapab ganny letan lir 403 paz.

Mwan mon anvi demann zot. Koudeta ki ti sispann Konstitisyon e ki ti frenm Lasanble, ti annan respe pour Lasanble sa?

(APPLAUSE)

HON BERNARD GEORGES

Ler Mr Rene, ler Mr Rene pandan 2 ou 3 an ziska 1979 i ti zis *rule by decree*. I ti annan respe pour Lasanble sa Mr Speaker? Ler Mr Rene ti fer *People's Assembly* kot ti fodre ou en Manm SPUP, SPPF pour ou kapab vin Lasanble, i ti annan respe pour Lasanble, pour Lepep Seselwa li?

Mwan mon ti anvi, mwan mon ti anvi vin en politisyen sa lepok. Me mon ti bezwen vin, SPUP pour mwan kapab vin en politisyen. E ou konnen ki'n arive Mr Speaker? Ou osi, ou ti

al dan prizon lezot keksoz, lezot dimoun ti ganny tou sord keksoz. Me zot ti annan okenn respe pour Lasanble zot?

Ler Mr Rene ti fer *Peoples Assembly fall in*, 1er edmi apre midi akoz ki Lakour Siprenm ti'n rann en zizman 11er edmi, 2 erdtan pli tar in fer zot *fall in*, pour pas en Lalwa pour kennsel sa lord, sa lord Lakour. I ti annan respe pour Lasanble li?

E ler tou sa bann Manm *Peoples Assembly* ti desann, ti vot wi. Zot ti annan respe pour zot prop lekor ek zot prop Lasanble zot? E ler zot parti, e ler zot parti ti anmenn en lamannman Konstitisyon pour redwir lakantite Manm proporsyonnel pour Lasanble. eski zot ti annan okenn respe pour Lasanble zot?

(APPLAUSE)

HON BERNARD GEORGES

Mr Speaker, ou vwar annan de fwa. Napa nanryen ki pli bon marse ki parol, e napa nanryen ki pli pares ki parol. Ou vwar Mr Speaker, taler, taler mon'n ganny dir, taler mon'n ganny dir ki mon pa ti'n devret apel en Onorab par son non. I byen! I annan rezon, i annan rezon. Toutafe.

Me ou konnen kwa? Sanmenm sa Onorab e mon a

donn son non akoz i la devan mwan Johan Rifned Loze. Yer swar dan en *post*, la devan mwan, yer swar dan en *post*. Ou konnen ki mannyer i apel mwan? "Pa bezwen fatig zot avek sa vye sorsye, ek son lasezi Maison du Peuple. "

Sa boug ki pa anvi ki mon apel li Loze ki son non, li i apel mwan en sorsye apre li i kriy lasasen ler mon apel li par son non. Oli devan – oli devan oli deryer?

Me solman ou konnen kwa Mr Speaker, mwan mon napa okenn problem ki apel mwan sorsye. I kapab apel mwan sorsye, i kapab apel mwan sa ki i anvi akoz mwan mon konnen ki mon ete si li i pa konnen sa se son problem.

E Onorab Loze, Onorab Loze i dir, Onorab Loze i dir ki li i pa pour vin anmas koko *Jardin du Roi*. Be mwan mon anvi dir avek Onorab Loze. Akoz mwan mon'n vey li dan sa Lasanble pour sa detrwa lannen mwan. Mon pa'n zanmen vwar en lamannman ki'n anmennen, ni en Mosyon mon pa'n vwar. Kestyon menm ki i demann Minis, i vey dan lapas zanmen i anmennen.

Mr Speaker, si mwan mon anploy Onorab Loze pour anmas koko *Jardin du Roi*, nou

pour faid! Midi pour arive goni
koko pour ankor vid!

(laughter)
(**APPLAUSE**)

HON BERNARD GEORGES

Alor, alor eskiz mwan Mr Speaker. Ou vwar nou bezwen vin enn pti pe pli profesyonnel dan lafason ki nou fer. Sanmenm sa mon dir, ler i annan en keksoz la, rod en lot topik pour al koz lo la. Pa rod en topik kot pour ganny ou repons.

Alor Mr Speaker, mon retourn prezan lo sa Trete. Nou'n pas nou en bon pe letan ozordi pe koz an deor topik, pe kritik Gouvernman, pe kritik bann lafason ki nou travay, pe kritik ki lefe ki Mosyon pa'n pase. Pe anmenn *sort – matters of privilege* lo tou sord kalite, - tou sord kalite keksoz.

Lefe i reste, ki nou annan devan nou en Trete ozordi, ki personn pa'n kapab montre en defayans ladan. E mwan mon pe dir, kontan pa kontan sa Trete pour ganny met an aplikasyon, pour en senp rezon Mr Speaker.

Akoz ki si i pa vin an aplikasyon parey mon ti dir taler, apartir le 01 Zanvyé nou pour nepli kapab koman en pei, depann lo bann benefis ki nou gannyen avek Linyon Eropeen.

Nou, nou ptipti zot, zot gro. Sa ti touzour leka, e sa pour touzour leka. Nou pa pour kapab al lager avek en lelefan akoz nou, nou en fourmi. E si nou al lager ek sa lelefan, nou pour ganny kraze.

Alor Mr Speaker, annou fer sa ki zot, zot in fer dan lepase. Annou fer sa ki tou bann Gouvernman iresponsab i fer e sa se fas a en keksoz parey sa. Aksepte pran otan ki nou kapab, negosye otan ki nou'n kapab, epi aksepte e ganny nou benefis la kot nou kapab. Mon remersye ou Mr Speaker.

(**APPLAUSE**)

MR SPEAKER

Mersi Onorab. Bon nou ava prezan vot lo Mosyon lo Trete ki devan ou. Manm ki an faver lev lanmen silvouple? Mersi. Manm ki kont. Lo Trete anba Lartik 64(4) nou Konstitisyon, pour Lasanble ratifye *Partnership Agreement between the European Union and its Member states*.

22 Manm in vot pour, 0 kont e 8 in *abstain*. Trete in aprouve par Lasanble. Mersi.

Bon parey mon ti anonse sa semenn, mon'n propoz mon'n plito avans propozisyon ki bann *Leaders* Lasanble i ganny loportinite pour adres

sityasyon ki'n arive Petit Paris, ki'n afekte Providence e kominote akote.

Donk mon ti a kontan pran sa loportinite la e mon lespwar dan sa ki nou pe fer, se ki nou kapab ganny loportinite pour adres en mesaz, solidarite avek Lepep Seselwa.

Me osi ki nou kapab fer serten lobzervasyon, valid e konstruktif lo sa lensidan e retir okenn lesan ki nou kapab retire. I pa en latas, tro kompleks me petet i demann en pe konpasyon, konprenezon lo sa sityasyon ki devan Lepep Seselwa.

Alor mon ti a kontan, la nou pran sa *statement*. Bann dirizan dan Lasanble e mon le donn laparol Onorab Sebastien Pillay *Leader* Lopozisyon pour adres sa premye.

HON SEBASTIEN PILLAY

Mersi Mr Speaker. E mon konsyan ki sa *statement* ki mon bezwen fer, mon pour fer li dan en fason pli poze posibil pour ki mon kapab pas mon mesaz san ki mon anmenn okenn lanmertim, oubyen okenn lezot *polemic* dan sa ki mon dir.

Mr Speaker, ozordi i ava fer egzaktman en semenn depi ki Seselwa ti leve e reste soke par bann zimaz nou pei, ki nou vwar le 7 Desanm 2023.

Sa kantite dega e destriksyon in san presedans, dan nou pei. Lo en kote movetan ki'n anmenn bann pert trazik pour serten fanmir, e mon leker i ankor lour ler mon mazin lafason ki nou'n perdi sa ki pros ek nou e i toultan fermal. Me perdi li dan sa fason i pli fermal ankor.

Wi Mr Speaker, 7 zour in osi pase depi sa leksplozyon kot *quarry (Civil Construction Company) CCCL*. 7 zour kot aprezan kot bokou dimoun, nou bann frer ek ser pe santi vre lenpak e realiz sa ki zot in perdi kot prezan ki bokou pe santi, sa ki nou kapab dir lenpak se kalamite.

Sikatri le 7 Desanm pour reste avek nou pour bokou letan. *United Seychelles* i ankor enn fwa senpatiz avek zot tou. Pour bokou bann fanmir nou konnen ki prezan ki sa sityasyon pe tap zot. Prezan ki larealite pe antre, e nou konnen ki bokou zot pe santi bokou langwas e bokou presyon.

Me *United Seychelles* i osi santi ki nou bezwen reflekte lo nou abilite pour reponn a bann tel sityasyon. Sa refleksyon mon dir, e mon kategoriz li tre byen, i devret enn ki onnet, e fran. E nou tou ki annan responsabilite pour diriz nou pei, ki devret montre grander

lespri e en vre sans *leadership*, fas a bann tel sityasyon, nou bezwen reflexir lo bann rol Lotorite lazans ki'n ganny manda pour zer risk ek dezas.

Lafason ki zot in fer, lafason ki zot *entame* bann prosis pour anmenn sekour e lafason ki zot regard dan bann sityasyon ki'n souleve.

United Seychelles i osi fermeman krwar ki bann keksoz ki ganny dir avek bann zabitan i devret byen ganny kalkile. Fodre ki nou montre *leadership* e priyoritiz lafason ki nou adres bann sityasyon ki nou bann zabitan pe fer fas avek.

Annou donn zot direksyon, e donn lespwar ki pour annan en solisyon pour zot problem. A sa pwen Mr Speaker, mon bezwen dir kategorikman ki mon pa'n vwar li akseptab ki lakonpanyen CCCL, in pran pres 3 zour pour eksprim regre e solider avek bann zabitan Cascade, Les Mamelles, Roche Caiman, Pointe La Rue e bann biznesmenn Providence. Lakantite dega e bann pert koze par sa leksplozyon ti egzize ki en pli bon lapros i ganny pran.

Mon bezwen osi note, e la mon swete ki tou dimoun i konpran aköz mon pe dir sa ki mon pe dir. Ki mon pa'n vwar li

akseptab pour dirizan Larepiblik, nou Prezidan vin koz lo non-bann konpanyen lasirans, avan menm ki bann prosedir bann *claim* ti pe ganny *entamer*.

I pa en latak anver Prezidan, me i en latak avek sa ki nou dir apre sa bann kalite dezas. Nou'n vwar li apre sa regretab, lafason ki bann konpanyen lasirans in vin devan e lo pe vin lo medya pour pronons zot lekor, en bann *statement* ki'n anmenn plis konfizyon. Nou ti'n kapab fer pli byen.

I osi pa akseptab pour dir ek bann ki'n deza perdi tou, dan en deloryonm total ebloui par lafreyer lakoler e sok e nou dir zot, zot bezwen al pran *loan* pour al repar zot lakaz.

Ki *loan* serten dimoun pour pran kan zot in perdi tou keksoz? I osi mon vwar prematir e pa kler ler nou dir ek bann ki'n ganny afekte, komans repar zot lakaz e apre Gouvernman i ava vin ed zot. I annan dimoun mon bann fer ek ser, ni menm en lakaz zot nepli annan pour repare.

United Seychelles i santi ki lasistans e led pour bann ki'n ganny afekte i bezwen ganny byen mezire e kalkile. Sak propozisyon i bezwen

akonpannyen par en plan lo ki manner pour enplimant li.

E la ki nou pe koze nou realize ki i annan nou bann frer ek ser ki'n komans al kot lasirans, ki'n komans al rod lasistans. E ler ki mon pe koze la mon osi konnen ki annan bann delegasyon ki pe vizit Cascade.

Bokou zefor pe ganny mete pour sey rod solisyon, me mon bezwen dir Mr Speaker, mon bezwen dir. Ki mon pa dakor ler Prezidan Larepublik in senm plis lafreyer ek konfizyon par dir ki sa leksplozyon in kapab ganny koze par sabotaz, terorizm oubyen neglizans, kan lanket pa ti ni ankor komanse.

Sa in destabiliz prosesis bann *claim* e i osi destabiliz okenn prosesis pour rod laverite lo sa sityasyon. *United Seychelles* i vwar sa koman en latak politik, avek bi anmenn plis divizyon kan pa ti nesaser. E kree konfizyon e enstabilite dan nou pei.

I pa responsab Mr Speaker. Sa bann keksoz koumsa pa ede – i ede anmenn plis langwas e pa bon pour repitasyon nou pei aletranze.

Zis mazine, eski nou kontan nou pei ganny asosye avek terorizm? Swivan sa bann *statement*, lakizasyon in menm ganny fer par bann siporter

LDS, lo rezo sosyal ki se *US* ki responsab.

In annan en *blame game* ki'n komanse, kan sa ler *United Seychelles* in fer sorti en senp *press release*. Ki'n demann tou Seselwa pour solider san ki okenn blanm i ganny aporsyonnen avek okenn Lotorite, oubyen avek okenn antite.

Mr Speaker, mon demann latolerans, latolerans pour nou kapab travay ansanm e pour nou pour kapab regard ki manner nou pour rod bann solisyon pour sa sityasyon ki nou pe fer fas avek. I pa letan pour fer latak bon marse, latak politik lo bann oponan.

Wi sa ki nou'n fer se koz lo realite sa ki'n pase. Tou dimoun in tande e vwar sa bann keksoz, mon pe envant nanryen. I nou swe dan *United Seychelles* pour vwar ki bann ki responsab pour sa lensidan, i osi peye pour sa destriksyon lo bann lakour biznes, e osi pour bann domaz fizik e mantal ki nou bann ser ek fer in soufer.

Mr Speaker, *United Seychelles* i vwar sa koman en lenzistis, kot ou pe dormi se ou dan trankilite ou lakour, ou pa'n fer personn nanryen, en sel kou ou lemonn i boulverse, e landmen ou napa en lakaz ou

zanfan in ganny blese, oubyen ou biznes i an rin.

Sok lakoler, dezespwar. Ou'n perdi preski tou sa ki ou – e ou bezwen re-batir ou menm sa i pa akseptab. Wi, e la mon dir kategorikman wi, nou siport 200poursan tou zefor, tou Seselwa ki Lotorite, ki Gouvernman pour zwenn ansanm pour ede ki swa Minister, ki swa lazans.

Nou tou nou kapab zwenn ansanm e sa i tre byen. Me apre led, apre met *plywood* lo vit, apre ganny en matla, apre ganny en landrwa dormi, nou bann frer ek ser ki'n ganny afekte pour bezwen kapab re-batir zot lavi, se sa ki preokipasyon prensipal *United Seychelles*.

Tro bokou dimoun in ganny afekte Mr Speaker, pour Lasanble reste silans lo sa ki'n arive le 7 Desanm. E *United Seychelles* i fer komitman ferm avek Lepep Seselwa, ki nou, nou pa pour reste silans lo sa size. Nou pa krwar, e la mon dir nou pa krwar, ki zis en lanket kriminel pour fer zistis sa kantite dout e lensertitid ki tou Seselwa pe eksprimen.

Tro bokou keksoz in ganny dir pour nou reste trankil, bann *statement* fer par Prezidan Larepublik lo terorizm, sabotaz in zis kontribye pour

anmenn divizyon e nou bezwen fer sir ki nou *come to the bottom of* tou sa bann *statement*.

Linefikasite e konfizyon kree par en deklarasyon en *State of Emergency*, ki menm bomaten nou'n vwar pa ti kler. Kot dan en moman *State of Emergency* lo tou teritwar Sesel, Mahe, Praslin e La Digue e en lot moman pa enkli sa de zil in senm dout, panik parmi nou popilasyon.

E la lefe ki servis tenny dife in dir zot in ganny en *call* pour en dife, kot nou pa konnen lekel ki'n *call*. Lekel ki bann dimoun enkli sef lakonpanyen CCCL ki'n ganny sans kit sa landrwa avek leksplozyon - avan leksplozyon i montre nou ki serten keksoz pa pe azoute.

Ki mannyer li in kapab sorti? Lefe ki Lapolis ki annan responsabilite pour administre Leksplozif Act e ki li Lapolis e CCCL pe korpere lo envestigasyon kriminel, i anmenn ankor plis dout e lensertitid.

Ki'n arive vremen alor? Lekel ki responsab? Pa bliye Prezidan in osi menm dir ki annan leksplozif ki'n ekspire. Alor ki ti responsabilite Lapolis e Prezidan li menm, si zot ti annan sa lenformasyon ki serten leksplozif ti'n ekspire.

Lapolis pa kapab *investigate* son lekor. Bann zabitan Petit Paris, i dir zot in vwar e santi ki ti annan en dife avek loder, apre zot in tann tapaz parey tapaz fizi apre en gro leksplozyon.

Tousala nou bezwen komans pran levidans koman bann fe i ankor fre dan lespri tou dimoun. Tro bokou dout, tro bokou lensertitid kot nou bezwen rod laverite. Nou annan tro bokou kestyon, ki pa pe ganny reponn e si CCCL pe korpere ek Lapolis, dir nou relman keler sa dife ti komanse? E keler zot ti aret SFRSA e lekel ki'n fer li?

Eski sa ti ava kapab anmenn en evakyasyon sa rezyon? Nou pa pour konnen. Eski sa ti'n ava anpes sa leksplozyon? Nou pa pour konnen. Alegasyon ki pe sirkile lo lafason ki bann *assets*, bann loto in ganny bouze, Mr Speaker, i *raise* tro bokou kestyon e *United Seychelles* pa krwar en lanket kriminel pour reponn a sa bezwen pour nou ganny laverite.

Akoz ki bann Avoka CCCL in dir ek zot pa dir nanryen, pa reponn? *Radio silence* total ler dimoun in ganny afekte sa kantite. Bokou keksoz pa fer sans, tro bokou alegasyon, e nou tou nou konfize.

Nou demann latransparans, nou demann la klarite. Nou demann en zefor serye pour determinen ki'n arive. E nou demande ki rekour i ganny anmennen pour bann viktim an priyorite.

La ki mon pe koze Mr Speaker, mon koz ek serten zabitan, serten zot pe koz zot fer *case* Ankour, serten zot pe koz lo fer protestasyon, serten zot pe koz lo al kot Lotorite Distrik e reklanm led.

Tousala Mr Speaker i bann keksoz ki dimoun pe dir. Sa ki mon kapab ankouraz zot se ki nou, nou pe sey rod en solisyon pour sa problenm. E si nou kapab vin ansanm, mon krwar nou kapab donn en direksyon kote nou le ale.

Sa kantite dout e lensertitid i anmenn plis divizyon e tou bann ki depan lo nou, bann *leaders*, bann dirizan dan sa pei, pour montre en sans direksyon. Se pour sa rezon ki *US* pe mentenir son pozisyon, i devret annan en Komisyon Lanket, endepandan.

E la, swivan diskisyon ki mon'n gannyen ek plizyer zabitan, avek bi pour anmenn plis latransparans lo sa size pour montre ki mon pa pe fer okenn foutbol politik avek sa size.

Mon pe menm demande ki sa Komisyon Lanket Endepandan i fer son travay an piblik, kot tou dimoun i ava vwar ki pe pase. Bann temwen a ganny apele, zot a ganny kestyonnen, bann Lotorite a ganny apel-e, zot a ganny kestyonnen.

Bann propriyeter CCCL a ganny apele, zot a ganny kestyonnen, Lapolis ava ganny apel-e li osi i ava ganny kestyonnen. En *public enquiry* ava ed nou tou, sirmont sa lensidan trazik, i ava permet nou tou rod solisyon dan en fason kordinen, i a permet bann viktim retir zot fristrasyon.

Mr Speaker, CCCL ek Lapolis tou lede i annan en rol dan servi e siperviz leksplozif. Nou mentenir ki Lapolis pa kapab *investigate* son lekor. Komisyoner Lapolis i li menm li *Chief Inspector* ki administre Lalwa Leksplazif. Mon repete Lapolis pa kapab *investigate* son lekor.

E la, mon soumet devan ou Mr Speaker e devan Lasanble e devan Lepep Seselwa. Prezidan Faure ti *set up TRNUC* e nou ti kapab *broadcast* li *live* parey en Komisyon Lanket. Tou dimoun ti tande sa ki ganny dir.

Aprè levennman le 3 Oktob kot Lapolis ti fer

agresyon lo politisyen, lo pozisyon sa letan ti enkli ou menm Mr Speaker, Prezidan Larepiblik e Minis Dezinyen parmi lezot, en *Commission of Enquiry* ti ganny fer avek leksplikasyon ki Lapolis pa kapab *investigate* son lekor.

Dan sa ka leksplozyon CCCL napa okenn diferans. Alors la i moman pour nou met politik de kote, *United Seychelles*, wi nou pe met presyon lo Gouvernman. Sa i nou rol. Dan plas konplent US annou zwenn ansanm koman en Lasanble, annou met en *joint Motion* ozordi e demann Prezidan pour kree en Komisyon lanket endepandan imedyatman.

E fer sa Komisyon Lanket piblik. Mr Speaker mon Mosyon i ankor la. Mon a move *LDS* ava segonde. Les mwan admet sa Mosyon e nou ansanm rod larepons e solisyon pour tou bann dimoun ki'n ganny afekte. Met tou keksoz o kler devan Lepep Seselwa.

Mr Speaker, bann zabitan ki'n pli afekte avek sa leksplozyon kot CCCL in montre en rezilyans enkrwayab. Mon'n personnelman temwannay zot lafors karakter e determinasyon pour pa les sa ki'n arive anpes zot releve.

Sa linite e sans kominoter, in en lespirasyon pour nou tou. *United Seychelles* i fer lapel ki nou Lasanble i montre menm sans karakter e determinasyon. La i sa moman, nou moman pour montre ki koman bann dirizan nou kapab *rise above* e rod sa ki meyer pour nou bann dimoun.

Annou fer tou nou posibil, pour ki nou bann frer e ser ki pe dormi kot fanmir dan bann *guest house*, dan bann *Maison Foutbol*, dan lekol i retourn se zot o pli vit posibil. Annou fer tou nou posibil pour ki ler zot, zot al dormi, zot ava dormi san krentif, san lafreyer.

Mr Speaker, ozordi Providence i lo en *standstill*, biznes ki monter nou lekonomi in sibir en masiv *blow*. E zot in eksprim plizyer konsern lo ki manner sityasyon in ganny *handle* avan, pandan e apre sa leksplozyon.

Bokou zot in sibir bann pert konsiderab, e nou drwa zot bann larepons kler, e presi lo ki manner nou annan lentansyon met zot lo zot lipye.

Mon'n koz avek plizyer sa bann biznesmenn. E *United Seychelles* i tre emosyonnel pour vwar ki manner zot pa'n les sa lensidan met zot ater. Bokou in pran dan zot menm pour rekonstrir e komans

travay e kontribye dan devlopman nou pei.

United Seychelles i demande ki annan konversasyon ant SRC ek sa bann biznes. Me ziska la menm nou Lasanble pa konnen ki bann diskisyon ki'n annan, si in annan e ki Minister Finans pe propoze. *Whether* pour annan en Fon Dezas, *whether* pour annan bann *tax breaks* nou pa konnen.

United Seychelles i reste ferm dan son konviksyon alors, pour rod plis latransparans, dan sa ki'n pase. Nou pe demann plis lenformasyon.

United Seychelles i anvi konn laverite, mon bann frer ek ser, wi laverite pour ki bann ki responsab i osi kontribye dan rekonstriksyon e dan re batir lavi nou bann frer e ser ki'n ganny afekte.

Fodre pa bliye, i osi annan en domaz psikolojik ki'n ganny arive lo nou bann zabitan. *PTSD (Post Traumatic Syndromes)* i deza pe ganny resanti parmi bann zanfan, parmi bann dimoun ki mon'n koz avek.

Mr Speaker, sa ki'n ariv le 7 Desanm 2023, pa'n swazir kouler politik, ni larelizyon, ki ou ris, ki ou pov tou dimoun in ganny afekte. Sa gro lapli ki'n tonbe dan rezyon nor osi, i pa'n

swazir, sa leksplozyon pa'n swazir. Se akoz sa ki mon fer en lapel pour linite, linite pour nou kapab sirmont bann defi, ki sa de kalamite in met devan nou.

I demann nou pour nou solider e nou bezwen reponn sa lapel, nou zenerasyon fitir pour ziz nou lo sa ki nou fer ozordi. Koman en Lasanble, sa pep in vot nou pour vin la pour koz lo zot par. Koz lo lapar Lepep en tas nob e enportan. Mon bann frer ek ser lo lot kote latab, zot kapab swazir pour pa dakor avek mwan.

Me mon swete ki omwen zot kapab ekout mon mesaz. Me *United Seychelles* Mr Speaker, son konviksyon i reste lo en keksoz. E mon dir ki si ozordi nou zwenn ansanm e met devan Prezidan, ki swivan sa lensidan leksplozyon ki arive kot *quarry Civil Construction Company Limited* le 7 Desanm 2023, dan distrik Cascade.

E pronon kont lanpler sa lensidan lo nou pei e ki sa leksplozyon in afekte bokou nou bann dimoun dan en fason fizik bann blesir, moral e materyel e finansyel. Sa lensidan ti potansyelman kapab enn ki ti pour bokou pli serye.

I enportan pour etabli bann fe otour sa lensidan dan en fason transparan, e ki reasir

nou popilasyon, enkli etabli rol e responsabilite bann ki responsab pour administre Lalwa konsernan leksplozif.

Ki sa Lasanble i demande ki Prezidan Larepublik i apwent en Komisyon Lanket anba *Commission of Enquiry Act 1962*, pour etabli bann fe relevan avan pandan e apre sa lensidan. E fer sa Komisyon piblik.

Mr Speaker, *United Seychelles* i konvenki ki sa pour fer en diferans fondamantal. Nou pa pe demann sa pour nou, me nou pe demann sa pour pep Seselwa an antye.

Ozordi Mr Speaker, ozordi sel lenspirasyon ki nou bezwen i devan nou. Annou zis regard bann ki'n ganny afekte le 7 Desanm, ki mannyer apre tou zot langwas, malgre dezespwar, malgre difikilte, malgre tou lobstak zot pare pour kontinyen, zot pare pour rekonstrir, zot pare pour rebran lavi.

Annou servi sa, annou sezi loportinite ansanm koman en sel lafors, koman en Lasanble Nasyonal, ini dan son diversite e pare pour servi en demokrasi modern. Apre tou sa ki nou kapab fer ozordi se dir ki *fearless in dignity* nou pa pour les nou pep tonbe.

Mr Speaker, sa ki mon'n koz lo la ozordi i demontre karakter e nou lanvi pour vwar nou ini e solider pour vwar en solisyon pour sa bann dimoun. Dan sa bann zour ki pe vini *United Seychelles* pour osi propoz serten mezir avek Gouvernman ki nou krwar i kapab ganny enplimante pour ede dan rekonstriksyon e rebatir lavi pour nou bann dimoun ki'n ganny afekte. Mersi Mr Speaker.

(APPLAUSE)

MR SPEAKER

Mersi Onorab Pillay. Mon a prezan donn laparol Onorab Georges.

HON BERNARD GEORGES

Mersi Mr Speaker. Mr Speaker, parey bokou Seselwa. Mon ti al dormi aswar le 6 Desanm dan mon lasanm La Louise avek gro lapli deor e nouvel ki dan nor Mahe ti'n komans annan problemm inondasyon ek deboulir later.

Keksoz ti en pe abnormal, me mon ti dir ki, lapli a pase e delo a desann. E parey bokou Seselwa dan granmaten en gro leksplozyon ti lev mwan dan mon sonmey. I pa ti en leksplozyon normal. Alor mon ti avans anba mon lavarang, pour

get bor lanmer, mon pa'n vwar nanryen ekstraordiner.

Mon ti pe retourn dan mon plis ler mon tann en siren epi en lot ankor, pe mont kote dan sid. Se la ki mon'n realize ki ti annan en keksoz abnormal ki pe arive.

Antretan mon get lo mon telefonn, e mon vwar en mesaz sorti kot Onorab Desheila Bastienne dan nou group, ki dir ki vit son lakaz in *blow* dan en gro leksplozyon ek plafon lakaz son manman ki en zabitan Le Rocher dan mon distrik ti'n desann.

Mon mazine ki parey nou rapel kot nou ti ete ler levennman enportan ti arive, tel parey ler zonn ti debark lo lalin, ouswa ler Lepap *Jean-Paul II*, oubyen Larenn ti mor, ouswa ler ti ariv koudeta isi Sesel, oubyen okenn lezot levennman markan ki tou Seselwa i rapel. Ozordi kot i ti ete, ki i ti pe fer, ler i ti tann nouvel leksplozyon granmaten le 7 Desanm.

Sa ki mon pa ti konnen a sa moman, se ki dan nor Mahe ti annan lakaz ki ti'n ganny balye avek deboulman later, ki en madanm ek en zenn garson ti'n perdi zot lavi, ki en lot madanm ti'n pri anba en pon, pe debat kont lanmor e son

msye ti'n ganny balye ziska bor lanmer.

Ki Petit Paris, bokou zabitan ti'n ganny leve an *sursaut* ler vit zot lakaz ti grenn lo zot, ki lakaz ti'n ganny detrir otour zot, ki zot lavi ti'n fini anba lao, e ki Providence *Industrial Estate* ti'n vin en vwar zone parey, *Gaza* ouswa *Hiroshima* landmen bonm atomik.

Pour nou ki pour mont lo nou lili tanto, ki nou lenz i ankor pe sispann dan nou larmwar, ki nou *shower* i ankor annan delo, nou lalimyer i alimen ler nou pez bouton; ki nou lafnet i annan vit, mon oule ki nou pran en moman pour reflexir lo ki mannyer nou, nou sanse.

Ki mannyer nou privilezye e ki mannyer ki nou devret dir, Mersi Bondye pour son bonte. Me mon osi oule demann nou, pran enn pti moman pour abzorb soufrans bann ki zot lakaz i ater, ki zot biznes in frenmen, ki ankor pe dormi dan lotel, dan fwaye ouswa dan sant kominoter, bann ki'n perdi tou ki bezwen rekomans a zero.

E mon anvi demann nou tou, pour ed sa bann anmenn zot douler en bout sa semen ki devan zot. Pour ralye koman en sel Nasyon, anba en sel lesyel e met zepol ansanm pour fer ki

tou sa ki'n ganny afekte, pour kapab retrouv normalite dan zot lavi, o pli vit posibil.

Ler mon ti pran laparol isi Lendi dan sa Lasanble a ou lenvityasyon Mr Speaker, mon ti dir ki kalamite i teste en pep, e i fer li sorti pli for ki avan. Pour nou ki krwayan, malgre ki nou pa konpran lespri Bondye e ki annan de fwa nou menm akiz li e demann li akoz mwan ki dan sa soufrans. Nou aksepte ki pa tou kestyon ki annan en larepons, e pa tou keksoz ki fer sans.

Me nou osi konnen ki nanryen pa ariv par aksidan. Ki parey dikton i dir, "*everything happens for a reason*". I zanmen fasil pour dir avek paran, en dimoun ki'n perdi son lavi dan en aksidan, ki annan en rezon pour sa. Ki ti pour kapab en bon rezon pour en inosan perdi son lavi? Sa se mister nou lafwa.

Me nou kapab dir ki dan katastrof i annan leson pour aprann. Nou aprann par egzannp ki nou pa devret konstri lakaz kot later i anpandan, ki nou pa devret bous en sours delo avek en miray ros. Ki gro ros ki kapab deboule, i devret ganny kase avan konstriksyon. Sa se bann leson ki en katastrof i donn nou.

Lo lot kote parey bokou dimoun in dir, erezman ki leksplozyon in ariv granmaten e non pa lizour. Parey tou Seselwa Mr Speaker, mon fremir ler mon mazine kot nou pei ti pour ete ozordi, si sa leksplozyon Providence ti'n ariv dan ler travay avek dimoun deor, transpor lo semen, travayer anba *bus stop* ek dan biznes Providence.

Ki ti pour arive avek zot, avek tou sa debri, ek sa morso vit pe anvol-e, plafon pe tonbe e konteni dan bann lofis ek magazen pe anvole.

E si en avyon ti pe pase pour al apoze ki ti pour arive avek li? Ki mannyer nou lendistri touris ti pour sirviv. Nou remersi Bondye alor ki dan nou soufrans, in eparny nou pli gro kalamite.

Sa i pa en moman pour fer politik Mr Speaker, e i pa mon lentansyon pour fer li. Me mon pa kapab pa dir ki i paret ki sa ladministrasyon LDS, in ganny anvoye zis pour li *deal* avek problem.

Depi ki nou'n ariv o pouvwar nou'n bezwen fer fas avek konsekans COVID- 9, *Air Seychelles* ki ti'n ganny met Ankour par son krediter pour likid sa lakonpanyen. Lager *Ukraine*, ki'n fer logmantasyon dan pri, lager *Gaza* ki'n fer air

Seychelles ki ti bezwen, ki ti pe komans anmenn touris Izrael e ti pe byen devlope, e arete.

Menas delo monte kot bokou nou lakot, *flooding* Anse Boileau e dan lavil e la sa dernyen kalamite semenn pase. E sa ladministrasyon in demontre dan sakenn sa bann lensidan, ki i la alaoter son latas, ek lekspektasyon ki nou pep in met dan nou.

Nou'n vwar depi Zedi pase ki mannyer Gouvernman azir. *All hands-on deck* parey dikton i dir. Prezidan ek son bann Minis lo teren, pe organiz sekour e delivre led kot fodre.

Mon mansyonn Gouvernman an premye, aköz mon bezwen fer li. Direksyon i ganny donner e soulazman in vini. Me i pa ni mon bi, ni mon swe, ni mon lanvi pour ponp Gouvernman, konmsi sete zis li ki sel akter fas a sa deza ki nou pei in sibir.

Mon mansyonn li an premye, aköz se Gouvernman ki annan premye responsabilite pour organiz led, e redres mon pei. Sa in fer e i pe kontinyen fer.

Mon anvi zis remersye Prezidan, tou son bann Minis, tou bann *MNA*, tou *DA*, tou *constituency clerk*, tou brigad irzans tou travayer Gouvernman, pour sa travay

ekstraordiner ki sakenn zot in fer *weekend* dernyen pour anmenn led irzan la kot ti fodre.

La Mr Speaker, koman nou pe koze, Prezidan avek Onorab Monthy zot ankor lo teren pe anmenn lasistans. Dan en tel sirkonstans Gouvernman i annan trwa keksoz pour li fer; premye i bezwen aport premye swen avek bann ki ti'n ganny afekte.

Dezyenm i bezwen trouv solisyon pour ed dimoun repar zot landrwa, reouver biznes e retourn dan en sityasyon normal o pli vit posib.

Trwazyenm i bezwen fer lanket dan sa ki'n arive pour eksplik avek Lepep pour fer sa ki responsab pran son responsabilite e pour tir leson, pour lefitir.

An sa ki konsern aport premye swen permet mwan Mr Speaker, pour rekonnet zefor e solidarite ki nou Nasyon in fer fas a sa dezas ki'n arive.

Depi premye moman dan sa de rezyon ki ti'n ganny afekte Seselwa ti la pour ede, e aport sekour. Dan lapli, dan labou, dan vit kraze, dan vit kase, nou pep in ralye pour anmenn sipor.

Ki swa lazans Gouvernman, *DA* parey mon'n dir *MNA*, brigad irzans, me osi bann *NGOs* bann lasosyasyon *caritative*, bann biznes prive e

bokou, bokou e bokou, e bokou sitwayen ordiner led ek lasistans pa ti manke.

Defi ti bokou e ti partou dan sa detrwa distrik ki'n ganny afekte. Me lasistans sa pa ti manke. Lo lapar nou *Caucus* isi, mon le anmenn nou remersiman sorti dan pli profon nou leker, a tou dimoun ki'n pare e ki'n vin devan.

Dan sa bann lensidan Mr Speaker i tousan pou vwar ki mannyer dimoun, ki ou pa ti ni pe ekspekte, dimoun ki ti napa okenn *link* avek sa dezas, dimoun ki si zot pa ti'n vin devan, nou pa ti pour zanmen repros zot. Sa bann dimoun ti volonterman aport zot led. Sa se pa letan pour triy dimoun, pour felisite.

Me mon bezwen mansyonn, enn pti biznes, enn pti kontrakter ki *out of the blue*, in anvoy en *pick up* ek 5 travayer pour anmenn en pe *plywood* dan bann distrik afekte. Non-selman zot pa'n zis desarz zot *plywood* epi ale, me zot in ensiste pour met sa avek lafnèt bann dimoun ki pa ti kapab fer li zot menm, zot menm.

E ler zot in fini, zot in ensiste pour retournen son landmen pour aranz lavarang en madanm ki pa ti ni nesaser,

me ki zot, zot ti krwar ki ti ava bon pour fer.

Pour zot tou, tou sa bann dimoun ki'n vin devan, dan moman difisil pour aport solidarite, pour demontre ki si sa en zabitan Sesel, nou *Caucus* i dir zot en gro mersi.

La prezan nou pe antre dan faz trouv solisyon, kour e mwayen term pour ed sa ki'n ganny afekte pour remet zot, zot lozman ek zot biznes debout. Latas i gran, problemn i la.

Depi sa dimoun ki'n perdi en *sliding door*, an pasan par sa enn ki'n perdi en lakaz antye, ki son biznes in bezwen frenmen, bann travayer *CCCL* zot menm ki'n perdi zot lanplwa.

Lateras e ros grennen ki bezwen ganny debleye ziska gro *building* ki'n preski ganny demoli ek lazans loto ki'n perdi 40,50,60,100 loto e plis ankor. Sakenn sa bann dimoun i bezwen lasistans pour redrese.

Tanto, Prezidan pour anons bann mezir ki Gouvernman pour pran dan sa direksyon. Legzekitiv i diriz pei, annou pasyante e antann sa ki zot pour vin dir tanto. Ptitapti nou pei pour redrese Mr Speaker, lapli pour arete e soley pour klat lo nou zoli pei ankor.

Pye dibwa pour repouse kot *CCCL*, batiman ek lakaz a ganny rekonstrir repare.

Biznes a reouver, Sesel a retrouv son souriy. Me ki nou pour aprann avek sa de lensidan? Larepons a sa kestyon i anmenn mwan lo mon trwazyenm pwen.

Lenvestigasyon an sa ki konsern *CCCL*. Depi 3er bomaten Zedi pase, sel parol lo lalev tou dimoun, se ki mannyer ki sa leksplozyon in arive? Akoz ki tou sa bann leksplozif ti la? Ki Gouvernman ki ti'n donn permisyon pour *store* sa bann leksplozif la? Ki mannyer sa bann leksplozif in *detonate*?

Oli gardyen *CCCL*? Oli zot travayer? Ki mannyer zot pa'n ganny dimal zot? Nou tou e mon osi nou anvi konn larepons sa bann kestyon. I nou drwa koman Seselwa pour konn laverite, e i devwar Gouvernman poudir nou laverite.

Me avan tou annou regarde ki Lalwa ki devan nou i dir nou dan sa ka. *Explosive Act* Mr Speaker, i sa Lalwa ki reglemant materyo ki servi dan lanmin. Sa Lalwa i dir ki se *ComPol* Komisyoner Lapolis ki *Chief Inspector*, parey mon koleg in dir.

Se li ki donn permi pour annan leksplozif a bann dimoun ki servi sa komodite. Se li ki deside ki kantite eksplozif ki kapab ganny stoke dan en

store, ki anba Lalwa i apel en magazin. Ki ganny konstrir spesyalman pour sa rezon. Sak magazin i bezwen annan en *manager*, tousala i dan Lalwa.

Ler en aksidan koze par eksplozif i arive, sa dimoun ansarz sa landrwa i bezwen enform *ComPol*. La *ComPol* i bezwen fer enn ant de keksoz. Se li ki deside anba Lalwa. Swa i fer en lanket e prepar en rapor. Swa i *order* ki en lanket ki kapab swa en *inquest*, kot i annan en lanmor ouswa en *Commission of Enquiry*.

Sa - se sa ki Lalwa i dir. Komisyoner Lapolis i konn Lalwa e i konnen ki i bezwen fer, se pour sa rezon ki lo nou kote, i pa fer okenn sans de ou trwa zour apre en lensidan osi grav e kompleks, pour demann en *Commission of Enquiry*.

In any event en *Commission of Enquiry* pour bezwen depann lo lanket ki ganny fer. I rezonnab pour asimen ki apre ki Lapolis in fini fer lanket, Komisyoner a deside ki semen pour pran.

La kot nou ete mon krwar i tro boner e mon pe demann avek nou popilasyon pasyante e les investigasyon fini, e apre i a - nou ava kapab koman en pei an antye deside dan ki direksyon nou devret ale.

Me kantmenm sa i annan kestyon ki preokip nou tou. Mon poz la en moman Mr Speaker, pour mwan reponn *Leader* Lopozisyon. E in fer en tre bon propozisyon la apre midi, in demann en *joint Motion*, pour annan en *Commission of Enquiry*.

I regretab ki sa kestyon i vin la apre midi. Akoz mwan mon rapel ler pirat ti atak nou, ti annan en *joint Motion* ki ti fer dan Lasanble Nasyonal. Onorab Ramkalawan ti *Leader* Lopozisyon e Onorab Potter ti asiz dan mon sez koman *Leader* zafer Gouvernman e zot de, zot ti rankontre ansanm, zot ti drafte en *joint Motion* e i ti vin dan Lasanble.

I regretab ki mon koleg avek en bon propozisyon, in taye in anvoy sa Mosyon li menm e la prezan i vin ofer nou en *joint Motion*. Mon pa - mon pa pe blanm li mon pe zis dir ki i regretab.

Akoz nou ti'n kapab kekfwa fer sa ki i anvi e oubyen sa ki i pe demande e fer e koz avek en sel lavwa.

Me mwan, mon *still* dir ki la kot nou ete i tro boner pour nou kapab al dan en *Commission of Enquiry*. Annou les lenvestigasyon fini, e sa i ava determinen ki direksyon nou pour pran. Parey mon ti pe dir

kantmenm sa i annan kestyon ki preokip nou ozordi.

Eski sa ti en leksplozyon ouswa en aksidan? Eski ti en aksyon pre- medite, ouswa en neglizans? Eski en magazin, i kapab en *container*? Akoz mwan mon tann dir ki tou sa bann leksplozif ti dan en *container*. Oubyen eski i ti devret en striktir an beton.

E si, i ti devret en striktir an beton e ki sa bann eksplozif ti pe ganny store ladan en *container* depi en bann kantite lannen. Lekel ki ti donn permisyon? Lekel sa Komisyoner Lapolis? Lekel sa Gouvernman ki ti donn permisyon pour met sa bann leksplozif la?

Tousala se bann keksoz ki bezwen, ki bezwen sorti dan sa enn lenvestigasyon. I annan ki poudir, parey in ganny dir par *Leader* Lopozisyon, ki komisyoner Lapolis. Akoz ki li menm li i ansarz leksplozif i pa pour kapab fer en lanket balanse e endepandan dan sa leksplozyon.

Mwan mon repons se, annou annan konfyans dan nou bann dirizan. La kot nou ete Mr Speaker, i pa ler pour diviz nou. Annou espere e vwar ki sa ki lanket i devwale, apre nou tou nou ava dan en pli bon pozisyon pour nou dir si nou

satisfè ou non e si nou pa satisfè ki si sa ki nou devret pe fer.

Pou lemoman annou konsantre lo remet pei annord, e rekonstrir sa ki'n andomaze. Nou pour annan bokou letan dan sa bann zour ek semenn ki pe vini, pour nou retourn lo sa size lakoz lensidan ki'n arive CCCL e ki si sa ki nou devret fer.

E an mezir ki nou regard devan, i annan bokou desizyon ki nou bezwen fer. Lekel ki responsab sa lensidan CCCL? Eski sa lakonpanyen i annan lasirans? Si wi, eski son lasirans i kouver leksplozyon? Eski bann lakaz ek biznes ki'n ganny afekte, zot ti annan lasirans zot? Eski zot lasirans i kouver leksplozyon?

Sa bann ki napa lasirans eski Gouvernman pour ed zot atraver Bidze *emergency* oubyen atraver sa Fon Dezas? Eski labank pour vin devan parey bokou dimoun pe demande e revwar *loan* ki biznes pe peye dan sa moman ki zot pa kapab fer zot komers?

Bokou kestyon Mr Speaker. Epi ki leson ki nou pei i a kapab retire dan sa kalamite. Leson ki nou'n aprann ziska prezan i plizyer.

Premyerman, pa met en *quarry* o bor landrwa

rezidansyel ouswa biznes kot bokou dimoun i sirkile.

Dezyenm; aret vann vit ki pa *tempered glass* pour lafnet ek *sliding doors*.

Trwazyenm; Pa stor eksplozif o bor en landrwa kot dimoun i reste oubyen i travay.

Katriyenm; Restrikte *zone* endistriyel pour lendistri e non-pa pour lozman ek magazen.

Senkyenm; Revwar e ranforsi Protokol pour stor ek transpor dinanmit.

Sizyenm; *DRMD* i bezwen met protokol an plas pour anpes dezans, ki swa lateras ros e pye dibwa. Me osi pour asire ki bann lezot sibstans danzere. La mon pe mazin, klorin, *ammonia*, pestisid, boutey gas, tenk petrol, i ganny *store* dan bann landrwa apropiye.

Setyenm; Eski sa montanny deryer *CCCL* i stab? Eski napa ros ki pour deboule swivan sa leksplozyon?

Vwala Mr Speaker enn pli sinopsis, bann keksoz ki nou bezwen demann nou lekor ozordi e ki nou swete vwar pe vini dan nou pei.

Vwala detrwa keksoz ki montre nou kot nou retrouv nou ozordi. Bokou kestyon, bokou larepons, bokou sanzman ki bezwen fer. Annou Mr Speaker, tir legzanp dan sa ki nou'n vwar ozordi.

Tousala se bann leson ki nou maler nou aprann pour ki sa fot yer, pa ganny repete demen avek devlopman rapid Sesel i kler ki bann ladministrasyon pandan plizyer lannen pa'n konsantre ase lo laspe sekirite. E i annan en pe lese fer.

Me la i pa lemoman pour montre ledwa okenn dimoun. La i en moman kot nou Lasanble i bezwen koz avek en sel lavwa, nou pei, e nou popilasyon i merit e i bezwen nou solidarite.

I devwar tou Seselwa e tou rezidan Sesel pour met nou diferans de kote fas a en tel dezans e lo en tel lanpler, e defi rekonstriksyon ki devan nou pei.

A sa moman kot nou pe al dan lafet Nwel ek Lannen lo sa kote latab nou renouvle nou langazman anver nou pei e anver nou pep. Parey nou ti demontre *weekend* dernyen, lo teren lo sa 5-6 distrik afekte, nou pour la dan zot kote lo sa bann zour semenn, ek mwan ki devan zot.

Meyer fason Mr Speaker pour mwan eksplik sa, dan lanket ki pe al ganny fer lo rekonstriksyon landrwa afekte e lo trouv repons pour bann kestyon ki mon'n koze pli boner, se atraver sanson Klib

Football Liverpool. "You'll never walk alone". Mersi Mr Speaker.

(APPLAUSE)

MR SPEAKER

Mersi Onorab Georges e mersi le de *Leaders* pour zot ladres. Mon kontan ki zot in nobou eksprim santiman ki Lasanble i santi. E ki zot in koz pour nou pep ki nou reprezante.

Mon'n apresye bann mesaz ki zot in mete, mesaz lo lanpler e gravite sa sityasyon ki nou'n pas ladan avek tou bann lenplikasyon trazik ki'n annan, lanmor, soufrans, domaz, materyel, spirityel e emosyonnel.

Mon osi apresye mesaz ki zot in anmennen ki nou kontinyen anmenn sipor pour sa ki'n ganny afekte, pour nou kapab ede refer lavi nou sitwayen e osi refer nou pei e nou Nasyon.

Mon siport lapel pour laverite, dan sityasyon ki'n arive e sa i byensir en size ki tous lespri tou Seselwa. E nou swete ki avan dele tro long nou'n a ganny tou larepons, tou bann kestyon ki zot in leve, konsernan sa sityasyon e ki nou kontinyen vwar latransparans dan sa ki'n arive.

E ki bann kestyon ki zot in leve, lo lapar Lasanble i ganny adrese, e kot i posib ganny repons e ganny solisyon e osi ki nou kapab aprann avek bann leson ki zot in met devan.

E avek sa mon demann Lasanble antye pour siport lapel e mesaz ki bann Dirizan Lasanble in anmennen. Mersi bokou.

Bann Manm en moman, petet parey mon'n dir zot bomaten lo kote *LDS* ti demann posibilite pour zot adres en mesaz pour zot *constituents*, e mon annan plezir pour mwan ofer sa pour tou Manm Lasanble.

Mon zis dir i annan 34 nou. E i pour en pe letan so mon demann sakenn pour fer en mesaz bref, e ki nou konsantre lo en mesaz ki esansyel pour nou, dan sa sirkonstans ki nou ladan e osi anvi peryod lafen lannen anvi ki devan nou.

Mon annan la, mon'n vwar lo mwan *computer* en lalis lord ladres ki nou ti swiv, pour Repons lo Bidze. E mon pe propoze ki mon a swiv sa lalis e apel bann Manm enn par enn pour fer sa mesaz. Donk mon pour komans avek Onorab Georges Romain.

HON GEORGES ROMAIN

Mersi Mr Speaker. Bonn apre midi Mr Speaker, bonn apre midi tou koleg Onorab e tou dimoun a lekout. Mr Speaker, premyerman mon ti a kontan lo lapar zabitan Anse Etoile, e mon non personnel pour partaz mon senpati avek tou dimoun ki'n ganny afekte ek sa movetan ek sa leksplozyon ki ti arive kot CCCL.

San bliy sa trwa dimoun ki'n osi ki'n perdi zot lavi an rezilta sa movetan dan nor Mahe. Mon le profite pour mwan remersye tou dimoun ki ede pour kapab amelyor lavi nou bann frer ek ser Seselwa dan sa moman tre difisil. San bliy nou Prezidan ki'n osi kontinyen donn sa sipor moral tou nou zabitan.

Mr Speaker mon le swet tou zabitan Anse Etoile e lezot zabitan la dan Sesel e partou dan lemonn en Zwaye Noel e en Bon Lannen 2024! Mon priye ki 2024 i ava anmenn plis boner ek prosperite pour tou Seselwa.

Mr Speaker, mon ti a kontan osi remersye ou Mr Speaker ansanm avek Madanm Clerk ek son Deputy ek tou travayer sekretarya Lasanble pour zot travay pandan sa lannen.

Mon le osi remersye tou mon koleg LDS pour zot sipor e gidans. San bliy mon DA ek

mon clerk, ek tou zabitan Anse Etoile pour zot sipor an 2023. Dernyen remersiman Mr Speaker, i al pour mon fanmir ki'n kontinyen donn mwan sa sipor dan mon travay.

Mr Speaker, mon priye ki Bondye i a touzour beni nou zoli pei ek son zabitan. Mersi Mr Speaker.

MR SPEAKER

Mersi Onorab. Onorab Doyace Porice.

HON DOYACE PORICE

Bonn apre midi. Mersi Mr Speaker. Bonn apre midi tou bann koleg MNAs e tou dimoun a lekout. Mon osi lo mon non personnel e mon fanmir e osi zabitan Baie Saint Anne nou senpatiz ek bann dimoun ki'n pas dan sa trazed e osi bann ki'n mor, nou senpatiz avek lafanmir pros.

Mr Speaker, mon pe anmenn mon swe, bonn fet Nwel 2023 e en bonn fet Lannen 2024, pour ou Mr Speaker, tou Manm e *staff* Lasanble, Prezidan Ramkalawan, Vis-Prezidan, ek *Cabinet of Ministers*.

Tou Seselwa dan Sesel e osi bann ki aletranze. E en bon fet spesyal i al osi pour tou mon bann *sponsors* e tou zabitan Grand Anse Praslin. Mersi pour

tou zot sipor pandan lannen 2023.

Pour ki nou a kontinyen sa bon travay ansanm e anmenn plis prosperite pour nou distrik pandan lannen 2024. Mersi.

MR SPEAKER

Mersi Onorab. Onorab Audrey Vidot.

HON AUDREY VIDOT

Mersi Mr Speaker. Mr Speaker, premyerman mon le senpatiz avek tou bann viktim bann fanmir, e pep Seselwa ki'n ganny afekte pour bann lensidan ki'n arive le 7 desanm 2023.

Zabitan Roche Caiman mon le dir zot mersi pour zot sipor ki zot in donn mwan e lakey dan zot lakour pandan sa lannen 2023.

Mon ralye avek fanmir pandan sa moman letan Nwel, mon swete ki nou pas ansanm dan lanmour, dan linite e solidarite pour konfort kanmarad apre sa sekous ki nou'n pas ladan apre levennman le 7.

E mwan zwenn *Caucus United Seychelles* avek tou zabitan, mon swet zot ek zot fanmir pour pas en bon Nwel, en bon lannen, dan lape, dan linite, e ki nou swete ki lannen

2024, i ava enn ki anmenn plis boner e prosperite pour nou tou. Mersi.

MR SPEAKER

Mersi Onorab. Onorab Michel Roucou.

HON MICHEL ROUCOU

Bonn apre midi Mr Speaker. Bonn apre midi a tous espesyalman zabitan Mont Fleuri, bann zoli dimoun.

Mr Speaker, mwan - mersi pour donn mwan laparol. Mon osi parey tou lezot Manm ki'n koz avan mwan, mon oule osi donn mon senpatiz avek tou bann ki'n perdi en pros sa lannen. Tou bann ki dan bann dezas osi tou, ki'n perdi zot lakour, dan nenport ki fason dan dezas ki'n pase dan bann distrik.

Mon le senpatiz osi ek mon bann koleg *MNA*, ki zot distrik in ganny frape avek sa dezas. Mon mazin Onorab Monthy osi ki lo teren la, pe get son bann zabitan. E Mr Speaker, mon osi pe mazin bann travayer piblik ki'n travay avek nou dan distrik espesyalman Mont Fleuri.

Mon le dir zot mersi pour zot sipor ki zot in donn nou, administrater distrik ek tou son bann travayer, mon *clerk*, madanm Madeleine. E osi Mr

Speaker, mon le remersi Prezidan ek son lekip e tou zabitan Mont Fleuri mon le remersi zot mon vwar Ms Samia Lebon ki en zabitan la.

Mon le swet zot en bon lannen, mon swete ki 2024, i ava en lannen prospere, kot i ava anmenn bokou *blessing* pour zot, ki ek prosperite.

E osi Mr Speaker, mon le osi dir mersi Senyer Bondye papa, ki'n kapab beni nou avek sa zoli pei, ki'n kapab eparny nou ek plis danze ki ti kapab anmennen. Mersi.

MR SPEAKER

Mersi Onorab. Onorab Andy Labonte.

HON ANDY LABONTE

Mersi Mr Speaker. Mon pour komans dir par mersi Bondye papa, se Bondye ki'n kree lesyel later, Bondye i konn tou i vwar tou. So mon pour tourn ver li ankor enn fwa lafen lannen pour mwan dir li mersi.

Mersi pour son benediksyon, pour beni nou pei, beni nou kominote malgre sa bann difikilte ki nou pe pas ladan. E nou bezwen toultan reste for kit nou krwayans, dan li.

Alor mon pour pran sa lokazyon pour mwan senpatiz osi avek bann endividi ki'n

perdi en pros sa lannen. E tou bann ki'n ganny afekte par sa leksplozyon e bann dezaspandan sa bann dernyen detrwa zour ki'n pase.

E i reste zis pour mwan swet tou, zabitan Seselwa, espesyalman zabitan La Rivière Anglaise, en bon fet Nwel, fet byen malgre i - nou dan sa bann moman difisil. Me nou bezwen kontinyen kit nou *hope high* e fotespere ki lannen 2024, i ava anmenn nou bokou prosperite boner. Mersi.

MR SPEAKER

Mersi Onorab. Onorab Rocky Uranie.

HON ROCKY URANIE

Mersi Mr Speaker. An premye mon le swet tou mon bann koleg *MNA*, en Zwaye Noel e en Bon Erez Ane tou bann travayer Lasanble. E le mon non-personnel e zabitan Digwa, nou senpatiz avek distrik Cascade e bann lezot distrik ki'n pas atraver bann kalamite semenn pase.

E mon demann bann zabitan Digwa pour servi Nwel koman en zour pour zot partaz lanmour, avek enn a lot. Mazin bann ki'n perdi enn zot pros pandan sa lannen. E mon swete ki lannen 2024, i ava anmenn

bokou boner e prosperite pour nou.

Mon osi remersye mon *clerk* sortan, Christine Rose ki'n in al swiv en nouvo parkour, mon swet li bonn sans e osi *welcome* mon nouvo *clerk* Heidi Gabriel. Mersi Mr Speaker.

MR SPEAKER

Mersi Onorab. Onorab Sathya Naidu.

HON SATHYA NAIDU

Bonn apre midi Mr Speaker. Bonn apre midi tou koleg Onorab ek tou dimoun ki a lekout espesyalman zabitan Saint Louis.

Premyerman les mwan remersye tou bann biznes, ouswa endividi ki'n lyez ek mwan pour nou kapab ed bann lezot distrik ki ti'n trouv zot dan sa moman difisil date le 7 Desanm 2023.

Ti annan en bon pe dimoun ki'n vin devan ki zanmen mon ti pe ekspekte ki sa moman zot ti pou'n vini. I kler ki i annan nou bann ser e frer la deor, ki annan Sesel vreman a ker e pour sa zenerozite mon dir zot mersi o fon mon leker.

Mr Speaker deza nou'n ariv Desanm, ou a krwar yer ti Zanvyé, letan i pas sitan vit e dan sa peryod letan, nou annan

en kantite travay ki nou, nou fer koman Lasanble, ki mwan mon'n fer lo nivo distrik ansanm avek mon *DA* ek nou bann *support staff*.

I annan bokou ki nou'n akonplir, i annan bokou pour nou fer ankor. Lannen 2024, i pour en lannen tre, tre serye e mon ekspekte ki mon ganny korperasyon lo kote nou *civil service*, pour kapab donn tou zot kouraz.

I annan en bon pe zot, dan nou *civil service* ki pe donn to zot kouraz e mon rekonnèt zot e mon aplodi zot pour sa bon travay ki zot pe fer. E sa i osi enkli bann *staff* dan Lasanble Nasyonal ki pe osi donn tou zot kouraz, pour fer sir ki nou Lasanble i fonksyonnen, i operasyonnel e zot kapab delivre en bon servis.

Mr Speaker, i annan en bon pe fanmir ki dan en sityasyon difisil, pour bann ki'n ganny enpakte atraver sa dezas e sa leksplozyon e i annan osi plizyer fanmir ki'n perdi en manm pros.

E alors ler zot pe zwenn finisyon 2023, i pa pour parey, i pa pour fasil e mon konn sa tre byen. E mon osi personnelman dan en serten sironstans mon osi mon'n perdi en dimoun tre pre avek mwan.

E mon'n nobou kapab dan en serten sans, mon'n nobou trouv sa kouraz neserer pour kapab sirmont sa defi e i pa fasil ditou.

Alors mon konpran mannyer i ete pour plizyer nou bann ser ek frer la deor, pa santi zot tousel e byensir toultan rod sa sipor neserer pour kapab sirmont nenport ki ki defi, ki parfwa lavi i kapab fer nou pas ladan.

E mon swe se ki nou tou nou ganny sa determinasyon, sa kouraz pour fer fas avek nenport ki adversite ki parfwa nou, nou bezwen fer fas avek dan lavi.

E mon swe se ki an 2024, pour bann ki annan bann aspirasyon, bann lobzektif ki zot anvizaze zwenn, ouswa bann lobstak ki zot lavi avek lagras Bondye, avek son gidans zot pour kapab sirmont li.

E mon le swet tou zabitan Saint Louis e pep Seselwa, en Zwaye Noel e en Bonnane 2024! Mersi.

MR SPEAKER

Mersi Onorab. Onorab Waven William.

HON WAVEN WILLIAM

Mersi Mr Speaker. Premyerman mon ti a kontan remerci ou avek sekretarya pour sipor zot

in donn mwan, an menm tan tou bann Manm isi dan Lasanble.

Mon le remerci pep Seselwa, travayer Seselwa, pour zot kontribisyon senser dan devlopman Nasyonal pei. Mon le remerci tou zabitan distrik Grand Anse Mahe, pour zot sipor e kontribisyon.

E mon oule profit sa lokazyon Mr Speaker, pour swet ou avek tou Manm Sekretarya, Manm Lasanble Nasyonal, Prezidan avek son lekip Minis e tou bann Manm Lasanble Nasyonal en bonn fet Nwel e Lannen.

E an menm tan mon demande ki nou pa perdi sa sans vre lafet Nwel, dan son totalite. E an menm tan mon remerciye Bondye osi pour son faver e lagras lo nou pei. Mersi.

MR SPEAKER

Mersi Onorab. Onorab Churchill Gill.

HON CHURCHILL GILL

Mersi Mr Speaker. Bonn apre midi tou Manm e tou dimoun ki pe ekout nou. Mon senpati ek tou dimoun Baie Sainte Anne ki'n elekte mwan, i al pour bann dimoun ki'n ganny afekte isi lo Mahe.

E mesaz, mon annan en mesaz pour bann Lotorite avek

lazans, ki pour bezwen travay avek sa bann dimoun ki'n ganny afekte. Pour egzers fleksibilite, fodre nou *slack* en pe nou *rigidity* - baze lo nou bann sistenm ki - bann prosedir ki normalman nou servi.

Dan sa letan la si nou kapab egzers en pe fleksibilite pour kapab adres sa bann size ki zot koman lazans e Lotorite konsernen zot pour bezwen *deal* avek. Pour ed sa bann dimoun rebran zot lavi retourn normal.

E pour dimoun Baie Saint Anne mon le swet zot en bon Nwel ek en bon lannen. Menm si i annan ki pandan sa lannen in perdi zot pros, mon konnen i pa pour parey.

Me selman an menm tan mon swe se nou egzers en pe, nou egzers disiplin e nou kontinyen pran prekosyon lo nou mouvman, donner ki annan movetan ki ankor pe kontinyen, pour evite ki okenn aksidan i arive. Mersi Mr Speaker.

MR SPEAKER

Mersi Onorab. Onorab Kelly Samynadin.

HON KELLY SAMYNADIN

Mersi Mr Speaker. Mon osi mon ti ava kontan partaz mon senpati avek mon bann koleg

Onorab dan distrik dan nor, swivan dezas ki'n arive pandan *weekend*.

Mon osi mazin Onorab Philip Monthy, i annan en gro latas devan li e mon priye ki i ava annan sa kouraz pour li kapab fer tou sa bann travay ki annan pour li fer.

Mon mazin bann zabitan Petit Paris, ki'n prensipalman ganny afekte swivan sa leksplozyon. Prensipalman mon mazin lafanmir Lafortune ek Nioze ki mon pre avek.

Mon osi mazin Mr Adelaide sa zofisye ki ti - ki ti sibir serten *injuries* dan swivan sa leksplozyon, mon priye ki i a reganny son lasante o pli vit.

Mon profite pour mwan dir mersi, mon DA mon distrik – madanm, manmzel Sabrina Assary, bann *staff* administrasyon distrik, mon *clerk* bann manm Au Cap *Events Club*.

Mersi pour zot langazman pandan sa lannen. Mersi pour zot sipor ki nou'n kapab travay ansanm pandan sa lannen. Mon osi mazin bann lazans dan Minister ki nou'n travay avek. Mon priye ki lannen prosenn i ava en lannen kot sa korperasyon i ava agrandi.

Mersi osi pour bann *staff* Lasanble Nasyonal ki'n ed nou pandan nou travay pour sa

lannen. E mon osi profite pour mwan remersye zabitan Au Cap.

Mersi pour zot sipor, mersi pour zot langazman pandan sa lannen mon priye ki lannen 2024 i ava enn kot nou ava vin pli pre, pour boner nou distrik, nou zoli distrik. E mon swet zot en Bonnane en Zwaye Noel! Vwala. Mersi Mr Speaker.

MR SPEAKER

Mersi Onorab. Onorab Wilbert Herminie.

HON WILBERT HERMINIE

Mersi Mr Speaker. Mr Speaker, mon le komanse par, pas mon senpati avek bann fanmir Seselwa ki'n perdi ou ganny afekte, dan bann lensidan ki'n pase atraver nou pei.

Mon le pas en senpati spesyal pour lafanmir Lafortune, ki zot, zot in perdi 3 manm fanmir pandan sa lensidan.

E mon osi anvi lo mon non-personnel e mon fanmir swet tou Manm, *staff* e piblik an zeneral en Zwaye Noel e Bonnane 2024! Menm si nou a fer li lo en pli pti lanpler, kot nou a kit nou bann frer ek ser ki'n ganny afekte avek sa dezas, dan nou lapriyer e dan nou leker. Mersi Mr Speaker.

MR SPEAKER

Mersi Onorab. Onorab Richard Labrosse.

HON RICHARD LABROSSE

Mersi Mr Speaker. Mr Speaker. Desanm in ariv ankor. Desanm i sa mwan dan lannen, parey nou dir dernyen mwan dan lannen, kot la bokou refleksyon i ganny fer e osi komemor ek festivite.

Me parey nou konnen nou okouran, ki'n pase dan nou pti pei sa detrwa zour la parey in ganny dir. E Nwel me byensir pa pour parey pour bann lezot ki'n ganny afekte.

So mon ti a kontan sezi sa loportinite la ankor enn fwa, pour mwan swet kouraz, determinasyon e osi avek lagras Bondye ki sa bann dimoun ki'n ganny afekte i ava kapab vwar enn pti lazwa dan zot leker, kantmenm i pa pour parey sa lanpler ki zot ti abitye.

Pour kontinyen Mr Speaker mon ti a kontan osi remersye tou dimoun ki'n ed mwan, ki'n avek mwan pandan sa lannen ki'n pase la lannen 2023 dan mon travay.

E la osi mon mazin Ladministrasyon Distrik Plaisance, ki mon sipor deryer mwan, pour bokou keksoz ki pour akonplir pour bokou zabitan. E osi byensir en

madanm nimero enn ki akote mwan tou kou. Sa se byensir mon *clerk* miss Nadia, ki ansanm nou'n kapab asiste sak endividi ki'n vin devan nou ki'n bezwen nou sipor, oubyen ki'n vin tap nou laport parey nou dir.

E la Mr Speaker, mon ti a osi profite pour remersye tou zabitan Plaisance pour zot sipor, sa byensir zot sipor depi 2020 ziska la. E mon santi ki pli ale mon - zot sipor i vin enn pti pe pli gran. E sa i vin atraver bann *call*, bann *text*, oubyen tanzantan zot pe gete ki manner ou ete.

Ouswa menm parfwa bann *advice* pour ou kontinyen bouz devan e byensir avek menm parol ki nou distrik i kontinyen progresse.

Alors mon ti a kontan profite pour remersye tou lazans ki'n travay ek mwan pour 2024 – 2023. E mon swete ki lannen ki vini nou ava kontinyen travay ansanm, pour nou kontinyen vwar bann serten solisyon.

E osi bann problem ki nou pa'n kapab rezourd pour nou zabitan sa lannen, ki byen boner lannen prosen zot a kapab vwar en laklerte dan tousala. Mersi Mr Speaker.

MR SPEAKER

Mersi Onorab. Onorab Philip Arissol.

HON PHILIP ARISSOL

Mersi Mr Speaker. Mr Speaker, lo non tou zabitan Anse Boileau e lo mon non mon ti a kontan pas mon kondoleans a tou fanmir ki'n perdi en pros dan sa dezaz ki'n arive dan nor, pandan sa dernyen semenn.

E Mr Speaker, mon senpati i al pour bann zabitan Cascade ki'n pas atraver sa lesplozyon dan zot distrik, bann biznes lo Providence kot zot in sibir bokou pert.

Mon konnen latas i bokou, kouraz pour zot tou, zot dan nou lapriyer. Mr Speaker, mon ti a kontan remersye mon *clerk* Marie-Lise, mon *DA* e tou travayer Ladministrasyon Distrik.

Tou dimoun ki'n ede pour fer lavi en zabitan Anse Boileau pli meyer pandan lannen 2023. E ou menm Mr Speaker, ou lofis, tou travayer Lasanble, Prezidan ek son bann Minis, mon bann koleg *MNAs*, mon fanmir pour tou zot sipor.

Mon ti a kontan osi la pour sezi sa moman pour swet zot tou en Zwaye Noel, tou Seselwa espesyalman tou zabitan Anse Boileau en Zwaye Noel e en Bon Lannen 2024!

Fotespere ki 2024 i ava pli meyer pour nou tou. Mersi.

MR SPEAKER

Mersi Onorab. Onorab Conrad Gabriel.

HON CONRAD GABRIEL

Mersi Mr Speaker. Bon apre midi tou Manm. Mon pour bref *straight to the point*, pangar mon ava gat atmosfer.

Mon santi ki mon *deserve* en remersiman pour Sekretarya, bann dimoun ki nou'n zwenn toulezour isi kot Lasanble. Tou bann dimoun, travayer isi kot Lasanble, mon remersi zot, pour zot sipor. Tou mon bann Manm kot Lasanble espesyalman lo sa kote latab ki la, lo kote *US*.

E mon distrik, bann dimoun ki travay dan distrik Pointe Larue, *OM*, sekretarya depi an zeneral depi son *cleaner*, depi son ki netway kot – *anywhere cleaners*, so mon *clerk*.

Apre an prensip mon remersi mon fanmir ki'n ed mwan en kantite. Ki Bondye i beni zot tou, e Bondye i beni nou pti pei Sesel. Sa zoli Sesel ki apel nou pei, nou patri, sa sel Sesel ki'n bers nou depi nesans.

Ki'n donn nou sakenn en sans fer progre, progrese dan lavi, malgre i pa'n fasil. Sirtou

sa bann dernyen zour ki la. Pa'n fasil ditou lo pep Seselwa, bokou zot pour pas en Nwel dan en fernwanr, par kont mon le swet zot tou en Zwaye Noel, e en Bonnane 2024!

Malgre i pa pour parey dan bann lannen avan. Me nou reste for e nou vin pli determinen ki zanmen. Mersi.

MR SPEAKER

Mersi Onorab. Onorab Terence Mondon.

HON TERENCE MONDON

Mersi Mr Speaker. Ser, frer, zabitan Takamaka, parey labitid nou ti komans lannen 2023 avek bokou lespwar pour akonplir bokou plis ki lannen presedan. Pour lamazorite zot, zot in kapab vwar serten laklerte dan zot lavi e pour plizyer zot, keksoz in bouze dan en fason pozitiv.

Malerezman sa i pa'n leka pour plizyer fanmir, sirtou bann ki'n perdi enn zot pros, lannen 2023, pe al fini, e sa i fer mwan mazin tou bann fanmir ki ankor pe travers en moman tris e difisil.

Mr Speaker, in annan de lensidan ki'n mark nou pti kominote sa lannen. Sa enn se sa aksyon dyabolik, kot lekor de nou zabitan ti ganny detere dan simityer. De dimoun ki

lakominote Takamaka ti byen apresye e respekte.

Dezyenmman, nou trwa frer ki'n perdi lo lanmer tou dernyerman. Malerezman tou zefor pour retrouv zot pa'n reisi. Mon profite pour remersye Gard Lakot, *SMSA* e tou lezot endividi ki'n enplike dan sa loperasyon, pour retrouv nou trwa zabitan.

Konpasyon ki lakominote Takamaka in ofer bann fanmir dan bann moman difisil, in sirman ede pour soulaz zot soufrans. Mr Speaker tou dimoun ki konn Takamaka, i apresye karakter son zabitan. Takamaka i vreman spesyal. E mon salye tou zabitan pour demontre respe, lanmour e bon valer dan zot lavi toulezour.

Ser, frer en nouvo lannen i senboliz lespwar pozitivite e nouvo komansman. Annou gard lespwar vivan pour en lannen 2024, pour bokou plis prosperite.

Annou reste pozitiv dan tou sa ki nou fer. Annou sezi sa loportinite sa nouvo lannen, pour renouvle nou langazman anver nou pei Sesel.

Finalman mon le remersye mon *DA*, ek son lekip, mon sekreter e lekip aktivis Takamaka e tou lezot ki pe kontribye dan nou distrik.

E mon pour remersye tou mon bann koleg *MNAs*, pour

tou zot sipor lannen 2023. Avek sa de mo mon swet tou zabitan Takamaka e tou Seselwa an zeneral Zwaye Noel e Bonnane! Mersi Mr Speaker.

MR SPEAKER

Mersi Onorab. Onorab Wavel Woodcock.

HON WAVEL WOODCOCK

Mersi Mr Speaker. A sa moman nou mazin nou bann frer ek ser pandan – ki pandan sa lannen in kit nou, ki nou'n perdi. Nou senpatiz avek lafanmir e nou osi mazin bann sityasyon difisil ki nou pei in pas ladan. Sirtou avek dezas e leksplozyon resaman, avek tou son lenpak.

Nou lapriyer i avek zot, e nou pour la pour donn zot tou nou sipor. Mon pour osi profit sa lokazyon pour swet tou zabitan Grand Anse Praslin, tou Pralinwa, *staff* e Manm Lasanble Nasyonal e tou Seselwa, en Zwaye Noel e en Bonnane 2024!

Mon pour osi remersye tou zabitan mon distrik Grand Anse Praslin, pour zot sipor e travay pour anmenn nou distrik e nou zil pli devan.

En remersiman spesyal pour mwan *clerk*, nou *DA* Chantal Laure e lezot Lotorite Distrik pour zot travay pandan lannen.

E ki Bondye i a donn zot tou lafors, lagras e prosperite pour lannen 2024. Mersi.

MR SPEAKER

Mersi Onorab. Onorab Sylvanne Lemiel.

HON SYLVANNE LEMIEL

Mersi Mr Speaker. Bonn apre midi tou dimoun. Mr Speaker lannen 2023 i pe byento kit nou. E mon kapab dir ki'n en lannen ki'n annan bokou defi, pour bokou dimoun.

In en lannen kot bokou dimoun in pas dan soufrans, in en lannen kot par kont osi, in annan bokou dimoun ki kapab dir in en bon lannen pour zot.

E letan mon pran laparol mon pe mazin bann dimoun dan rezyon nor Bel Ombre, Glacis, Beau Vallon, ki'n pas dan movetan e menm ki'n perdi en pros.

Mon senser senpati a sa bann fanmir e osi mon mazin sa bann dimoun Cascade, Brilliant, Petit Paris, bann biznes dan Providence.

Tou sa bann dimoun ki'n fer en pert avek sa leksplozyon ki'n arive kot CCCL. E zot osi mon swet zot kouraz e ki nou a kontinyen travay ansanm pour sey vwar en solisyon pour sa bann dimoun.

E Mr Speaker, dan lot *note* mon ti a kontan remersye tou zabitan mon distrik Anse Royale, ki'n travay tre pre ek mwan, dan en fason ou en lot ki'n donn mwan zot korperasyon e zot sipor.

La mon pe koz tou zabitan an zeneral. Mon pa pour *single out* personn. Akoz dan distrik mon ganny korperasyon tou dimoun, pe enport ki kote zot ete. So mon dir zot mersi pour zot korperasyon.

Mon espere ki nou kontinyen travay ansanm pandan lannen 2024 e ki nou travay dir pour progresyon nou distrik e ki nou a kontinyen anmenn sa linite, nou a kontinyen anmenn sa travay ansanm pour nou distrik.

Mon le swet zot tou en Zwaye Noel zabitan mon distrik, e osi en Bonn Erez Ane 2024! Mon espere ki lannen 2024 i ava enn ki en pe pli meyer e pli prosper pour zot tou.

Mr Speaker mon ti a kontan osi letan mon ganny laparol pour ou menm, pour tou *staff* dan ou lavi, Madanm Clerk, Madanm Deputy Clerk, tou zot *staff* dan zot lofis, tou nou bann *housekeepers*, tou bann dimoun isi kot Lasanble.

Mon ti a kontan remersye zot pour zot travay ki zot in fer ansanm avek nou isi kot

Lasanble, ki'n fasilite nou travay isi.

E an menm tan koman *Chair COGA*, mon ti a kontan remersye tou mon bann Manm ki lo Komite. Mon dir zot mersi pour sa travay ki nou'n travay ansanm pour sa lannen.

Mon krwar in en bon lannen pour *COGA*, nou'n kapab travay tre dir, nou'n fer bokou louvraz e i reste ankor bokou travay pour nou fer pour lannen prosen.

So alor Mr Speaker, an terminan mon ti a kontan dir tou dimoun dan Sesel, en Zwaye Noel e en Tre Bonn e Erez Ane! E mon swet kouraz ankor enn fwa, tou bann dimoun ki pe vwar zot pe ankor pe sey *struggle*, pe sey lite pour zot kapab sey debout, met de bout ansanm.

E an menm tan ki Bondye i ava kontinyen anvoy son lalimyer lo nou tou. Ki i ava eklersi bann dimoun, sirtou ki dan bezwen la dan sa bann problem ki nou ladan, ki zot ava kapab vwar en solisyon tre imedya. Mersi Mr Speaker.

MR SPEAKER

Mersi Onorab. Onorab Florry Larue.

HON FLORRY LARUE

Mersi Mr Speaker. Mr Speaker, mersi pour donn nou sa loportinite pour koz avek nou piblik. Mon ti a kontan pran sa loportinite pour senpatiz avek tou zabitan Cascade ki depi Zedi granmaten zot pe *deal* avek sa leksplozyon ki'n afekte zot lavi.

E mon krwar ki Sesel antye ki'n pa'n ganny afekte pe mazin zot. Mon ti a kontan senpatiz osi avek bann zabitan dan nor Mahe, ki nou vwar sa gro lapli afekte bann lenfrastruktir, lakaz. Me sirtou bann fanmir ki'n perdi enn zot pros, dan sa katastrof.

Mr Speaker, nou pe apros lafen lannen, mon pran sa loportinite pour remersye ou koman nou Speaker, Madanm Clerk ek Deputy Clerk dan zot biro pour ed nou travay, pour sa lannen 2023.

E nou espere ki nou vwar en bon lantant travay ansanm avek zot tou an 2024. Mon swet tou dimoun Sesel en Zwaye Noel e en Bonnane 2024! Mersi.

MR SPEAKER

Mersi Onorab. Onorab Naddy Zialor.

HON NADDY ZIALOR

Mersi Mr Speaker. Mr Speaker pandan ki nou pe ferm bann

dernyen paz dan liv 2023, nou pe osi pas dan en moman ase, ase difisil koman en pei, pa zis zabitan.

Alors mon premye mesaz pour nou tou pe enport ki nou sityasyon ki nou ladan, ki nou pour *overcome, we shall overcome, and we will overcome.*

E mon swete ki pandan ki nou pe apros bann moman festivite, nou ava osi pe mazin sakenn nou bann frer ki pa neserman frer e ser ki pa neserman pour pas en Nwel oubyen en lannen parey labitid.

Mazin zot dan nou lapriyer, nou mazin zot dan bann moman difisil. Me nou osi gard sa lespri pozitiv e lespwar pandan ki nou vir sa nouvo paz 2024.

E mon a sezi sa loportinite, pour mwan remersi tou dimoun, tou dimoun de lapar mon fanmir, de lapar mon non-personnel, de lapar parti ki mon prezante, pour mwan dir mersi, mersi pour sa travay ki nou'n fer pour sa lannen 2023.

Mersi pour debout akote mwan, a sak fwa ki mon ti bezwen zot sipor e mersi pour kontinyen met nou pei de lavan. E mon priye ki pandan ki nou pe antre dan Nwel, nou osi trouv sa lespas pour lape, linite, pour lapartaz.

E ki vreman letan nou antre dan 2024, nou antre dan en nouvo paz, pour nou vreman kontinyen met prosperite devan nou Mr Speaker.

Mon a profite osi pour remersi Lasanble Nasyonal, ou menm koman Speaker Lasanble, tou *staff* Lasanble, tou dimoun ki letan nou antre dan Lasanble zot fer nou, nou travay posib.

E mon pe *look forward* pour nou kontinyen travay ansanm pour lannen 2024. Mersi Mr Speaker.

MR SPEAKER

Mersi Onorab. Onorab Egbert Aglae.

HON EGBERT AGLAE

Mersi Mr Speaker. Ankor en lannen travay, pe al terminen mon ti a dabor remersi tou bann *staff* Lasanble Nasyonal ki'n la avek nou dan nou travay, pour fasilite nou pandan sa lannen 2023.

Mr Speaker, mon osi le remersye lo nivo mon distrik tou *staff* Ladministrasyon Distrik, ki enkli son *DA, office manager* e tou travayer e osi mon *clerk* Marie-Anne.

En remersiman, travay ki zot sipor pandan sa lannen e osi tou zabitan ki'n la akote mwan

pandan sa lannen, pour fer keksoz bouze.

Mr Speaker, mon osi rekonnèt ki Nwel ek lannen pe vini e ki pa nou tou ki pour pas en bon Nwel, ek en bon lannen fas a bann trazedì ki nou pei, in pas atraver.

E mon mo rekonfor e kouraz, i al pour tou bann ki'n sibir bann diferan kalite lensidan e ki vwar zot dan difikilte ozordi dan lakominote, ouswa dan zot biznes. Ki kouraz e sipor nesese i ava vin ver zot, o pli vit posibil.

Mon osi rekonnèt tou bann servis ki annan en lyen direk avek mon distrik, ki'n la dan moman dezase ki nou'n pas ladan e osi mon apòrt sipor e soutyen avek sa bann fanmir ki'n sibir linondasyon pandan sa letan ki nou'n ti pe ganny sa gro lapli.

E mon osi plede ki sipor e rekonfor i ava vin ver zot o pli vit posibil pour zot re-kontinye zot lavi. Mon osi le remerci mon *Caucus*, pandan sa lannen e tou sipòter *United Seychelles* ki'n sipòrt nou dan nou travay. Ki'n la avek nou e mon dir zot kontinye sa bon travay.

E mon osi remerciye tou pep Seselwa e pli ankòr enportan se mon fanmir ki'n la avek mwan pandan sa lannen 2023, ki nou ava pas Nwel

malgre difikilte dan en fason kalm. E an esperan ki 2024 i ava annan en lannen, i a vin en lannen kot nou ava annan en pli gran souriy lo nou figur. Mersi.

MR SPEAKER

Mersi Onorab. Onorab Gervais Henrie.

HON GERVAIS HENRIE

Mersi Mr Speaker. Bonn apre midi tou dimoun partikilyerman zabitan Mont Buxton. Mr Speaker, sa ki mon le fer se felisit sak Seselwa ki'n fer son mye pandan sa lannen pour *être* en bon vivan, ki'n konsyan son rol koman en imen, manm son fanmir, manm son kominote e zabitan sa later.

Avek tou sa ki pe arive otour nou toulezour, plis nou i bezwen viv dan en fason pli responsab. Non-selman pour nou prop lekor, me pour limanite e fer ki nou kit Sesel e sa later e meyer landrwa ki nou ti vin zwenn.

Pour bann ki pe fer fas ek kek adversite dan lavi, mon reasir ou ki sak nwit e bomaten letan mon priye, mon mazin ou e demande ki Bondye pa abandonn ou.

San nonm non person Mr Speaker, mon le remerci tou dimoun. Mon repete mon le

remersi tou dimoun, ki'n travay e kolabor avek mwan dan en fason ou en lot. Zot konnen ki sa travay ki nou pe fer ansanm i en misyon ki nou lo la, ki nou pa ankor fini.

E alor ansanm annou renouvle nou zefor pour nou kontinyen persevere. E mon oule osi dir avek bann dimoun ki malerezman dan lavi parfwa nou bezwen aksepte dezapwentman. Me sa ki nou pa merit bliye se ki lavenir i rekonpans bann ki persevere.

Finalman mon remersi tou dimoun ankor, pour led ki zot in donn mwan. E lo mon non e non mon fanmir, mon swet zot tou en bonn fet Nwel e ki 2024 mon priye i anmenn nou en meyer lannen.

E mon promet zot ki mon pour vwar zot ouswa mon pour koz ek zot avan ki lannen i fini. Mersi.

MR SPEAKER

Mersi Onorab. Onorab Wallace Cosgrow.

HON WALLACE COSGROW

Mersi Mr Speaker. Ankor enn fwa bonn apre midi Mr Speaker e tou Manm. Mon ti a kontan Mr Speaker, parey tou lezot Manm ki'n koz avan mwan, dabor eksprim mon senpati e solidarite avek tou dimoun ki'n

dan en fason ou en lot sibir konsekans bann dezas ki'n arive pandan le 6 e le 7 Desanm.

Ki swa dan bann distrik dan nor ouswa dan distrik Cascade Pointe Larue, Roche Caiman e osi Les Mamelles. Nou solider avek zot e nou swete ki sa lespri Nwel parmi nou popilasyon i ava renye, e ki nou ava annan en leker, e nou ava mazin osi bann dimoun ki petet pa pour pas Nwel parey, parey bokou nou.

Me nou a solider, nou a mazin zot e ki nou a kapab fer tou sa ki nou kapab pour ki zot osi zot letan festivite, letan Nwel i ava enn ki osi ase spesyal, e ki zot a kapab antre dan nouvo lannen dan en fason enn pti pe pli soulaze ki zot ete ozordi, dan sityasyon ki zot ete ozordi.

Dezyenmman Mr Speaker, mon ti a kontan *extend* en mo remersiman ver tou bann Manm Onorab isi dan Lasanble pour travay ki nou'n fer e soutyen ansanm ki nou'n fer pandan sa lannen.

Sirtou bann Manm lo kote mon *Caucus United Seychelles* e osi *extend* en mo remersiman a bann *staff* e travayer Sekretarya, e osi ou menm Mr Speaker pour sa travay ki nou'n fer pandan sa lannen.

E mon swet zot tou en Zwaye Noel e en Bonnane avek zot fanmir, e zot ava anmiz li dan lape e dan prosperite ki vini, dan lannen ki pe vini.

Trwazyenmman Mr Speaker, mon le osi remersi tou bann dimoun ki'n travay ek mwan pandan sa lannen ki swa a nivo Lasanble Nasyonal ouswa, a nivo mon lot fonksyon parti *United Seychelles*, tou *staff* Sekretarya, mon ti a kontan swet zot en - nou pour zwenn pli tar me mon ti a kontan swet zot osi en Zwaye Noel e Bonnane! Remersi zot pour sa travay ki zot in fer pandan sa lannen.

E parey mon'n dir o non mon prop lekor e o non mon fanmir, mon swet tou dimoun, tou Seselwa en Zwaye Noel e mon espere ki lannen 2024 ki vini i ava enn ki bokou pli mye pour nou, pour zot osi.

E ki zot ava kapab pli prospere e ki i ava en lannen pli zwaye pour zot tou. Mersi bokou Mr Speaker.

MR SPEAKER

Mersi Onorab. Onorab Regina Esparon.

HON REGINA ESPARON

Mersi Mr Speaker. Lo non mon lofis mon le remersye mon clerk Ms Samitha Pouponneau, ki

son Kontra pe ariv a lafen, a lafen lannen. DA Christel William ek tou *staff* administrasyon distrik Glacis, pour sa travay ki nou'n fer ansanm an 2023.

Mon swet osi tou zabitan Glacis, en 2024 ranpli ek prosperite e ki lazwa Nwel i ganny partaze avek zot. Pour sa Nwel ki pe vini, dan sa detrwa zour malgre tou kalamite ki zot in pas ladan sa dernyen semenn. Mersi pour zot sipor.

Egalman Mr Speaker, mon osi pran sa lokazyon pour mwan swet ou menm ou, ek tou *staff* sekretarya ek tou *staff* Lasanble en lannen 2024 ranpli ek prosperite.

Pour mon Komite Madanm. Mon remersi tou bann madanm lo Komite e egalman mon le remersi nou trwa *clerk* lo Komite. Ms Florette, Ms Samia e Ms Denise pour zot sipor dan sa lannen 2023.

Mr Speaker, letan ki mon annan laparol, mon pa'n ganny sans averti ou. Mon ti a osi kontan pas mon swe – pas swe de le par Onorab John Hoareau *MNA* Beau Vallon ki pa posib pour avek nou apre midi aköz i lo teren, dan vizit avek en delegasyon.

Lo son par mon ti a kontan swet tou zabitan Beau

Vallon en lannen 2024, ranpli ek prosperite e ki Bondye i anvoy son benediksyon lo zot. Pour tou bann fanmir ki'n ganny afekte, par delo monte, deboulir later, dan tou lede distrik.

Nou'n fer sa ki nou ti kapab fer pour soulaz zot, be mon anvi reasir zot ki Lotorite Distrik ek Gouvernman pe fer tou pour ed zot refer, pour ou sa enn ki'n perdi ou pros, nou senpatiz avek ou.

Pour nou tou isi anndan, Onorab *LGB* pour diriz nou, lo sa bon semen, *Chief Whip LDS* pour met lord kot i fodre, tou mon bann koleg *MNA*, mersi bokou. Pour Onorab *LOTO*, ek ou *Caucus* mersi bokou. Onorab Philip Monthy ki pa'n kapab la avek nou ozordi mon dir ou kouraz.

Ankor enn fwa meyer ve pour 2024, ki gran met i regard lo nou tou e ki nou kontinyen senm lanmour an 2024. Mersi bokou Mr Speaker.

MR SPEAKER

Mersi Onorab. Onorab Johan Loze.

HON JOHAN LOZE

Mersi Mr Speaker. Mr Speaker, mon'n fer mwan en mesaz tre senp iniversel ki pour tou dimoun.

Konsider ki ou byen pli presye se ou letan e ou lavi. Aksepte ki soley in lev pour ou e gard ou lizye e ou leker lo li koman ou lespwar. Osi aksepte ki liniver in anmas lasante, lasazes, larises e benediksyon zis pour ou. Sezi ou desten dan ou lanmen. Partaz ou letan presye avek sa ki bezwen ou prezans, e met ou a lekout sa ki bezwen soutyen e soulazman.

Dan sa zarden kot ou rekolte kouraz, avek lezot bonte, rapel pour fer lapartaz sa kouraz, senm dibyen pour ou rekolte. Zis en mo ouswa en konsiderasyon i kapab vin en soulazman pandan sa letan ki nou ladan. E finalman, annou termin lannen dan remersiman lapartaz, e lanmour. Mersi Mr Speaker.

MR SPEAKER

Mersi Onorab. Onorab Rosie Bistoquet.

HON ROSIE BISTOQUET

Mersi Mr Speaker. Mersi Mr Speaker pour donn nou sa sans pour dir enn pti remersiman. Lo mon non personnel Mr Speaker, mon ti a kontan solider avek tou bann zabitan dan nor ki'n pas dan sa kalamite, ki pa ti fasil.

E osi pour bann fanmir dan sa rezyon ki'n perdi enn zot

pros, mon senser kondoleans. Mon osi solider avek tou sa trwa distrik dan was, sirtou Cascade, Roche Caiman avek Pointe Larue. Ki zot osi zot in pas dan sa kalamite. Mon ti a swet zot kouraz, nanryen pa difisil, ouswa pa enposib avek Gran Met. Alor annou *trust* dan li.

Mon ti a osi swet tou, remersi ou menm ou Mr Speaker avek Madanm Clerk avek son lekip avek tou travayer Lasanble. Ki zot in toultan la dan bor nou pour sipor nou, ki a lafen dizour ozordi nou'n arive le – sa dat kot nou'n arive.

Mon ti a swet osi koman en zabitan point Larue swet tou zabitan Pointe Larue, en Zwaye Noel e en Lannen avek en Nwel tre trankil.

Mon ti a dir zot kontinyen senm sa bon lanmour avek tou bann zabitan. Mon ti a osi remersi mon Clerk Daniella Arissol, ki en fanm for, ki'n toultan debout la deryer mwan avek tou bann zabitan pointe Larue.

Mersi osi pour bann brigad dan was sirtou, mon pe dir tou bann brigad, be selman bann brigad dan was, ki depi ler sa kalamite in tape Cascade zot in toultan lo teren depi bomaten, granmaten ziske annan dan de fwa 3 er bomaten,

zot ankor deor e kontinyen sa bon travay.

E mon ti a osi remersi tou bann dimoun Pointe Larue, ki'n donn mwan, donn mwan sa sipor, mon konnen zot in toultan donn mwan sa sipor e mon ti a demann zot osi pour fer en bonn Nwel. E fotespere lannen prosenn nou a travay ansanm enn pti pe pli for ansanm kontinyen sa larout kot nou'n komanse.

Mersi mon bann fanmir ki'n sipor mwan e en remersiman spesyal enn mon fanmir spesyal ki apel Maryanne, mon dir ou mersi bokou pour sa sipor ki ou'n donn mwan. Mersi Mr Speaker.

MR SPEAKER

Mersi Onorab. Onorab Norbert Loizeau.

HON NORBERT LOIZEAU

Mersi Mr Speaker. Mr Speaker, pour komanse malgre i annan bokou repetisyon lo mon non personnel, mon fanmir e tou zabitan mon distrik Bel Air, mon anvi osi - mon anvi partaz nou senpati avek tou bann viktim dan sa trazed ki'n arive lo nou pti zil, semenn pase.

E nou anvi dir zot, ki nou mazin zot dan nou lapriyer, e osi mon anvi remersi ou pour sa bon travay ki ou'n fer ansanm

avek Clerk, Deputy Clerk. Tou - mon anvi remersye tou bann Manm Lasanble osi ki'n fer, ki nou'n travay ansanm, e mon swet zot en Zwaye Noel e en Bonnane 2024!

Mon anvi osi remersi tou zabitan mon distrik Bel Air, ki an gran mazorite zot in siport mwan dan sa travay ki mon pe fer dan Lasanble.

E mon anvi dir zot, selebre trankil an mazinan ki i annan fanmir, i annan dimoun ki pa pour kapab selebre en bon Nwel e en bon Lannen akoz nou dan nou distrik Bel Air sa dernyen 2 mwan nou an dey mon kapab dir akoz bokou fanmir in perdi enn zot pros. Alors ler nou pe selebre annou mazin osi bann fanmir.

Mr Speaker, mon anvi remersi mon fanmir pour siport mwan, pour akonpanny mwan pandan sa lannen, dan botan dan movetan. Mon anvi swet zot Zwaye Noel e Bonnane osi.

Tou bann *staff* sekretarya Lasanble, mon anvi dir en remersiman spesyal pour bann travayer *housekeeping* isi kot Lasanble. Zot in byen *take care* ek nou, mon anvi dir zot mersi e zot osi pas en bon Nwel e en bon Lannen.

Mr Speaker, dernyen mon anvi remersi tou Seselwa, tou Seselwa an gran mazorite ki'n

met konfyans dan nou Gouvernman pour fer sa travay formidab ki i a pe fer.

E ki Bondye i a beni nou pti Sesel e mon anvi swet zot osi en Zwaye Noel e en bon Lannen 2024! Mersi Mr Speaker.

MR SPEAKER

Mersi Onorab. Onorab Clifford Andre.

HON CLIFFORD ANDRE

Mersi Mr Speaker. Mr Speaker, avan mon komanse mon ti a kontan demann ou permisyon akoz Onorab Monthy in dir mwan dir enn de pti parol lo son non. So mon pour komans avek Anse aux Pins apre mon ava al lo Cascade.

Lo lapar mon non-personnel, mon fanmir ek - mon ti a kontan remersi zabitan Anse Aux Pins an premye, pour sa sipor e soutyen ki zot in donn mwan pandan letan ki mon ti absan e mon ti pe fer en tretman aletranze.

Mon'n retournen parey mon'n dir pour mwan kontinyen e alors mon ti a kontan dir zot mersi bokou pour sa soutyen.

Mon ti a kontan egalman remersi mon *clerk* ki'n pandan sa letan la e get, zet en koudey lo nou lofis. Mon ti a egalman

kontan remersi *DA* avek son tim.

Me mon pa pour fer zistis letan mon pe remersye bann dimoun Mr Speaker, pour mwan remersye, mon pour nonm bann dimoun. Akoz dan kalamite ki'n arive Cascade, letan mon ti ganny notifie, mon ti fer mon mye pour asiste parey mon kapab.

Mon ti a kontan dan sa konteks remersye Audrey Lau-Tee ki'n rod transpor, Claude Monthy ki'n *drive* transpor, Mr Ken Gabriel ki'n *provide* delo pour nou kapab anmenn Cascade. Steven avek son madanm ki'n kwi manze pour sa premye zour ki nou ti kapab delivre Cascade.

Mon ti a kontan egalman remersye Vania Chang-Time ki'n vin avek mwan lo teren son Sanmdi ki nou ti al vwar en pe bann dimoun, Andy Jeanne ki'n al sers vit ki'n ganny donner par Gerard. Nicky Charles, pour son zenerozite ki'n donner avek en pe tapi e dra.

Mr Speaker, mon ti a kontan osi, dir avek bann dimoun Cascade mon kontan letan mon'n pas kot zot, sa Sanmdi pour mwan anmenn en pe soulazman lo lapar Onorab Monthy.

Me i annan ki nou'n kapab *crack* en *joke* menm si zot ti dan

bann soufrans e nou'n partaz sa bann moman, an riyen. Mr Speaker, mon pour osi le dir en remersiman spesyal a de Komite ki mon Chair.

Premyerman *Bills Committee*, pour sa travay ekselan ki nou'n fer. Nou konnen in annan bann defi e nou konnen i pour kontinyen annan bann defi. Me selman ansanm nou pour travay, nou pour fer sir ki nou delivre lo nou travay ki nou annan pour delivre.

Osi mon ti a kontan remersye Komite Ladefans Mr Speaker, pour sa travay ekselan ki nou'n fer. Bokou vizit nou'n fer pandan sa lannen e nou'n, nou'n vwar bann defi ki annan devan nou pei e ansanm nou pe fer fason pour nou sirmont sa bann defi.

Mr Speaker, finalman mon ti a kontan remersye tou zabitan Anse aux Pins e osi swet ou ek ou fanmir. Manm Sekretarya ek zot fanmir, tou *staff* Lasanble ek zot fanmir e tou parey mon'n dir zabitan Anse aux Pins en Zwaye Noel e en Bonn e Erez Ane 2024! Mersi Mr Speaker. Sa i pour Anse aux Pins.

Mon ti a kontan prezan pran pour Cascade. Etan ki nou annan en *Regional Committee*, dan rezyon les, nou ti a kontan

solider avek Onorab Monthy, pour sa sityasyon ki'n pas ladan. E egalman lo son lapar, mon ti a kontan swet tou bann dimoun ki'n pas dan bann sityasyon, kouraz e ki Bondye i kontinyen avek zot.

E mon konnen Onorab Monthy in dir mwan i pour kontinyen priy pour zot. Me okenn moman ki zot bezwen son soutyen, pa ezite tap lo son laport, menm si zot pa ganny repons deswit akoz son telefonn i annan bokou keksoz pour li fer.

Me selman i pour fer sir ki apre en serten letan, oubyen apre en zour kantmenm i pour reponn oubyen i pour *re-call* zot pour fer si, ki zot dan sa konfor ki zot bezwen. I ti a osi egalman, menm si i annan bann defi swet bann zabitan Cascade en Zwaye Noel e en Erez Ane!

Nou pa kapab dir bon akoz bokou i annan bann defi pour zot sirmonte. Alors fotespere ki lannen 2024, i anmenn prosperite e bann defi ki zot in fer fas avek dan 2023, i ava ganny *overcome* an 2024. Mersi Mr Speaker.

MR SPEAKER

Mersi Onorab. Onorab Desheila Bastienne.

HON DESHEILA BASTIENNE

Mersi Mr Speaker. Mr Speaker mon le komanse par dir kouraz a tou bann biznessmenn, ek zabitan ki form par dan Providence, Petit Paris, Brilliant, Le Rocher ek Cascade pour – ki'n fer fas ek sa dezas le 7 Desanm e nou dir zot ki zot pour reste dan nou lapriyer e ki zot ava rekipere tre byento.

Mon le osi dir en gran mersi tou zabitan Ile Perseverance pour nenport ki fason ki zot in siport kanmarad. Swa atraver en servis, ou kot zot in kapab atrap lanmen enn zot frer ou ser vwazen, dan nenport ki sirkonstans lavi dilon sa lannen.

Mon dir osi mersi tou zabitan Perseverance, ki'n kontribye e ki ti'n osi ede dan en fason, anver bann viktim Cascade e osi ki'n kontribye pour viktim ki'n pas dan sa movetan dan rezyon nor.

Mon le dir en gro mersi e mon le swet Zwaye Noel, DA Nicole, DA Aaron ek son tim, kot Ladministrasyon Distrik 1 ek 2. Mon le dir mersi mon *clerk*, ki'n donn mwan tou sa sipor e osi. E mon le swet osi Zwaye Noel a tou mon bann aktivis dan Ile Perseverance.

Mersi i al pour ous osi Mr Speaker, Madanm Clerk, Madanm Deputy Clerk e osi tou

travayer kot Lasanble Nasyonal.

En remersiman spesyal i al pour mwan *Caucus*, pour tou zot sipor dilon sa lannen. Mon swet tou dimoun enkli mon fanmir Zwaye Noel e Bonnane! Mersi.

MR SPEAKER

Mersi Onorab. Onorab Francois Adelaide.

HON FRANCOIS ADELAIDE

Mersi Mr Speaker. Bonn apre midi tou dimoun. Mr Speaker, lo non tou zabitan Baie Lazare, lo non tou mon fanmir e lo mon non personnel mon oule osi eksprim osi mon senpati e avek tou bann dimoun, tou bann zabitan Sesel ki'n perdi enn zot pros pandan sa lannen.

E tou dernyerman parmi bann zabitan Cascade e osi bann zabitan dan nor, ki'n pas atraver sa bann kalamite. Mon demande ki Bondye i ava donn zot tou kouraz pour zot kapab fer fas avek zot sityasyon.

Mon le egalman Mr Speaker, remersi tou dimoun san leksepsyon, ki'n ed mwan sa lannen, mon pa le donn okenn non-panga mon ava manke. E mon dir zot mersi pour tou sa bann sipor ki zot in donn mwan dan bann botan, dan bann moman difisil.

Zot in montre poudir zot in la akote mwan e zot in siport mwan. E mon le profite la nou pe al dan moman festivite pour swet zot tou en Zwaye Noel, e en bon lannen 2024!

Esperon ki zot a donn mwan tou zot bann sipor, parey mon osi mon pour donn zot mon bann sipor, pour ki mon ava kapab fer sa travay ki mon zabitan in investir dan mwan pour fer.

E ki pour ki nou anmenn Baie Lazare lo sa pli o nivo, ki nou tou nou ti a swete i arive. Mersi Mr Speaker.

MR SPEAKER

Mersi Onorab. Onorab Sandy Arissol.

HON SANDY ARISSOL

Mersi Mr Speaker. Bonn apre midi tou dimoun. Mon kontan letan Onorab Michel Roucou in komanse in dir. Bann zoli dimoun dan son distrik. Mon mazine, detrwa dimoun ki'n sorti Bel Ombre ki'n al dan distrik Mont Fleuri avek sa movetan.

Alor mon kontan zot in ganny en landrwa konfortab pour zot reste dan distrik Mont Fleuri. Mr Speaker, letan mon lo mikro, mon ti a kontan montre mon sipor pour distrik Cascade, Pointe La Rue, Roche

Caiman, distrik ki'n ganny afekte.

Tou bann biznes Providence, tou bann dimoun ki ti annan en lentere dan sa trwa distrik. Letan mon lo mikro mon osi mazin Dorothy, mon osi mazin Yacinthe, e plis spesifikman mon osi mazin Hakim e tou bann lezot defen dan distrik Bel Ombre.

E mon swete ki bann fanmir zot a vwar kouraz, lafors pour zot aksepte e zot ava kapab asiste lanterman zot bann pros, ki pour fer byento.

Mon ti a kontan osi demann en leskiz mon prop fanmir, mon madanm ek mon zanfan, ki mon ti abandonn zot Merkrede swar dan sa gro movetan enkli Zedi granmaten, spesyalman Jadden Arissol, pour mwan kapab al ed lezot fanmir ki ti dan bezwen, menm letan zot, zot ti an danze parey nenport ki fanmir dan nenport ki lakour.

Mon ti a kontan dir zot mersi, pour zot kouraz e zot konfyans e zot sipor, ki zot donn mwan koman zot papa e osi sa dimoun ki responsab lakour.

Mon ti a kontan dir mersi ankor enn fwa, tou dimoun ki'n asiste nou Bel Ombre, enkli Prezidan Larepublik avek tou son bann Minis, tou bann

lazans konsernen, Lapolis, SFRSA, avek bann solda.

Zot tou pour zot sipor, enkli sa sant komann ki ankor operasyon dan sant kominoter Beau Vallon. Sa i enkli plizyer bann *DAs*, e lezot manm *staff* dan bann Ladministrasyon Distrik enkli mon *clerk*.

Mon anvi dir ek zot mersi bokou pour zot sipor. Mon anvi dir zot mersi, pour zot kontinyite, pour kit nou *update* avek bann lenformasyon. Mon anvi dir mersi tou bann sours medya, ki'n *keep* nou *update* avek bann lenformasyon, e asire ki bann dimoun i ganny bann lenformasyon ki korek e azour.

Mon anvi osi dir mersi, tou dimoun, bann endividi ki'n fer son letan, ki'n donn en pe sipor pour zot anmenn manze, anmenn tou le neserer ki bann dimoun ti pe travay lo teren ziska ozordi ler nou pe koze.

Mon anvi demann madanm David, Clarisse David avek msye Lenclume en leskiz. Parske ziska ozordi bann Lotorite i ankor pe travay pour ki kot zot reste anler Mare Aux Cochons semen i ava ouver pour ki transpor i ava ariv pli pre avek zot lakour.

I annan en travay ki pe ganny fer, me parey zot konnen kontrakter avek tou sa bann

dibri, i pran en pe letan. Alor ankor enn fwa mon dir ek madanm David, ek msye Lenclume kouraz e pli tar ozordi semen pour ouver pour zot kapab konekte avek lezot parti dan distrik Bel Ombre.

Mr Speaker, mon ti a kontan remersye ou koman Speaker, Clerk Lasanble Nasyonal avek tou bann *staff* depi Charles ki lo baro ki resevwar nou dan bomaten, ziska Joannes ki okip nou lofis kot nou antre dan biro *LGB*, Pam avek Gerda ki travay avek nou.

Tou dimoun ki'n ed nou dan en fason ou en lot, pour ki nou kapab fer sa travay byen. E mon anvi ankor enn fwa remersye Lepep Seselwa, ki kontinyen swiv nou dan Lasanble Nasyonal, ki kontinyen anvoy nou bann mesaz, ki kontinyen kontan nou pour sa travay ki nou fer.

Mon swet zot tou en Zwaye Noel, en Bon Lannen 2024! Menm si Bel Ombre i pa pour neserman parey, be solman mon swet tou dimoun kouraz de bon, tou proteksyon neser sorti kot nou gran met ki a kontinyen beni e protez sakenn de nou atraver son lagras e son pwisans ki nou priye toulezour. Mersi bokou Mr Speaker.

MR SPEAKER

Mersi Onorab. Onorab Bernard Georges.

HON BERNARD GEORGES

Mersi Mr Speaker. Mr Speaker lo lapar *Caucus LDS, Staff* mon biro *LGB* isi dan Lasanble, mon *DA* Claudette Louise, *staff* Ladministrasyon Distrik Les Mamelles, lo lapar mon *clerk* Pakina Moustache, ek tou zabitan Les Mamelles e lo mon prop par.

Mon oule swet ou Mr Speaker e ou fanmir, Clerk, Deputy Clerk, tou *staff* Sekretarya, tou *staff* Lasanble, mon koleg *Leader* Lopozisyon e tou mon bann Manm koleg Lasanble *US* e zot fanmir.

Tou zabitan Sesel espesyalman bann ki dan difikilte a sa moman, tou le meyer pour sa lafet Nwel e pour lannen 2024. Mersi Mr Speaker.

MR SPEAKER

Mersi Onorab. Onorab Sebastien Pillay.

HON SEBASTIEN PILLAY

Mersi Mr Speaker. Mr Speaker, mon le komanse par remersye tou dimoun ki'n travay a kote mwan menm e avek mon *Caucus*. Pour pandan sa lannen tou dimoun ki'n donn nou

sipor, ki'n ed nou, ki'n travay avek nou.

Mon mazin partikilyerman bann *staff* osi dan *Maison du Peuple*, e *leadership* nou parti Dr Herminie e lezot ki'n, ki'n donn nou sipor lo nivo nou parti pour nou kapab fer nou travay.

I pa en louvraz fasil e mon asire lo kote *LDS* i osi parey. I pa en louvraz fasil, koman Manm Lasanble pour ou kapab fer tou sa ki ou bezwen fer. E ou bezwen sipor parfwa e dimoun ki siport ou e Dokter nou apresye sipor ki ou'n donn nou.

Mon osi le remersye mon bann koleg lo lot kote latib, malgre ki nou annan diferans, nou'n debat, nou'n diskite, nou'n annan lesanz.

Nou reste touzour koleg dan Lasanble Nasyonale e nou form par nou tou sa lenstitisyon ki nou reprezante. E mon swet zot tou e zot fanmir en Zwaye Noel, mon koleg Dirizan dan Lasanble, *Leader* Zafer Gouvernman ou osi avek ou fanmir en Zwaye Noel e en Bonnane!

Mon osi Mr Speaker, mon le swet, mon *Caucus* an antye, *Caucus US* ki'n devoue e travay akonte mwan, zot tou zot fanmir en Zwaye Noel en Bonnane e tou le meyer ve pour lannen 2024.

Mon osi Mr Speaker bezwen mazin, mon *staff* ki travay dan mon lofis. Mon mazin Eugenia, Nathalie, Nigel, Jossy ki san zot mon pa kapab fonksyonnen, san zot mon pa kapab delivre dan travay ki mon fer. E sipor ki zot in donn mwan, mon vremen, vremen apresye sa ki zot in fer.

E mon kontan lafason ki zot apros zot travay e mon remersi zot e mon swet zot e zot fanmir osi en Zwaye Noel e en Bonnane! Mon osi swet ou Mr Speaker, malgre ki nou'n pa'n ganny mal ganny diferans parfwa, me lefe i reste ki mon swet ou avek ou fanmir.

E mon remersi Sekretarya an pasan, mon swet ou ek ou fanmir en Zwaye Noel en Bonnane! E ki mon swete ki Bondye i anmenn tou le meyer pour tou dimoun, tou *staff* Lasanble, tou manm Sekretarya, mon pa le mank okenn person kot Lasanble, ki'n travay akote mwan panga mon ava mank en non.

Me zot tou, zot in toultan la pe siport nou depi Clerk, Deputy Clerk, son bann lezot *staff*. La e kourtwa e ede e pare pour ed nou, e nou vremen apresye.

Mon pa kapab terminen Mr Speaker, ou a permet mwan san remersye mon fanmir, mon

madanm, mon de zanfan, mon ser. Souvandfwa mon pa la kot lakour, mon dan en *meeting*, mon dan en – mon lo teren, mon pe fer en vizit, e i pa fasil pour zot.

Me mon remerci zot pour zot kouraz, zot rezilyans e zot sipor. Mon terminen Mr Speaker, lo en note pozitiv ki mon demann – ki nou tou nou kapab travay ansanm dan linite, dan solidarite pour nou sirmont okenn defi ki nou pei i kapab met devan nou.

Mon ser i anvoy mwan en mesaz i dir mwan pa bliye pour nonm son non. So mon ser Salima, e mon konnen ki nou tou nou annan en dimoun pros ek nou ki nou ki tan ki ed nou, ki travay avek nou.

E mon swete Mr Speaker, ki lannen 2024 i anmenn tou le meyer pour nou. Mersi bokou Mr Speaker.

MR SPEAKER

Mersi bokou tou Manm Onorab e les mwan partaz sa ki mon pe dir avek Madanm Clerk avek Madanm Deputy Clerk. Premyerman pour remerciye tou bann Manm pour zot swe, ki zot in aporte atraver mwan menm, atraver Clerk e atraver *staff* Lasanble.

Nou konnen poudir nou *staff* ki siport nou e eleman

esansyel ki permet nou fer nou travay. Byensir merci zot tou bann Manm pour zot kolaborasyon e zot kontribisyon dan travay Lasanble.

E mon espere ki nou a kapab regard nou travay lannen prosenn avek otan sinon plis zefor, e devouman. Byensir mon pa kapab mank lokazyon pour zis aport a se moman kot nou devret an festivite, aport nou solidarite avek bann ki pa pour kapab partaz sa moman festivite.

Me solman nou espere ki zot a vwar lazwa dan zot leker tou bann ki'n pas dan letan difisil, dan bann rezyon nor oubyen dan Cascade, oubyen dan lezot rezyon dan nou pei.

I enportan pour nou tou mazin nou fanmir e dimoun ki siport nou, ki pre avek nou. I annan si mon kapab zis repet en mesaz, ki mon krwar en Manm in pase, se ki menm si letan i difisil, i en bon rezon pour nou retourn lo vre mesaz Nwel.

E sa se lanmour, lapartaz e lape. Mersi tou Lepep Seselwa, pour swiv nou e pour pas en letan dan lannen avek nou dan nou travay. Avek sa mon bezwen dir avek en serten soulazman ki mon a *adjourn* Lasanble pour, *adjourn* Lasanble pour sa lannen.

E mon demann nou tou ki nou, get devan pour en moman repo. Me ki nou renouvle nou lenerzi pour travay lannen prosenn. Bonn fet zot tou, Lasanble i ava al dan *Recess* e dat ki nou rebran i ava ganny anonse. Mersi.

(APPLAUSE)

MR SPEAKER

Lasanble i *adjourn*.

(ADJOURNMENT)